

ORA ICANTAIGUË IRAGATANE JESOS

Irocas isanguenaquineri Tiójiro.

1 ¹Ora noguibatëmi, Tiójiro, nasanguenaquemi jirai. Nocomantë gotëri Jesos antagaisati ora icanque aisa ora yogomeantë cara iparintaca ²irooti cara yogainocanaa cara yáganëri Tosorintsi Jonogaguitequë. Teraiquerai iriáte Jesos jonoquë icoigaguequeri iragátane, icomantaiguëri ora inganque. Icomantancari Isère Caninaro Tosorintsi. ³Aroqueque icamaque Jesos icaniatanai yoniagaigapaari iragátane. Tojai Jesos yoniagapinintaigaari arota irogóigue cara aisonori icaniatanai; cara ocaratí 40 cataguiteri iniaigairi. Aisati yogometaiguëri ora iragáantane Tosorintsi.

Aro ocaraque ora igátaiguëri iragátane Jesos.

⁴Cara yapaagaiguëri Jesos icanqueri: —Quero piáigui. Pinëni yaca Jerosarénquëca irooti cara imagantëmiro Pabati Isère Caninaro ora nocomantaiguëmi. ⁵Ibaotísatancaro nija Joan, carari yamai arosataanti cataguiteri iroquemiro Caninaro Isère Tosorintsi obirojeguiquë, inasërepëmi. ⁶Ira botoitacha yosamitaiguëri ira Jesos: —Natingomi, jirai aiti iragáantane omatsiguenga Isirael. Yamai te iraniajiri. ¿Yamaica piguipigairo? ⁷Yotabitanëri Jesos:

—Teni ingogue Pabati pigóiguero ora inganque Iriro. Teatisati pigóte ati ongantima inganquero. Paniro igóti Iriro. ⁸Orari Isère Caninaro Tosorintsi inanquemi omitocoquemi ogabiauquemi. Iroro pingomantaguetocotaguëquena yaca Jerosarénquëca, aisati Joreaquë, aisati Samariaquë, irooti antagaisatiquë quibatsi.

Cara yogainocanaa Jesos.
(*lr. 24.49-53*)

⁹Aroque inibataiguëri Jesos, aique iáque yogainocanaa jonoquë. Ipaniguiagabaqueri irooti cara isorocanaque mingoriquë te iraniaigabajiri. ¹⁰Iroontinta inetsaigabaqueri Jesos cara yogainocanaa, ainta inapë pite ironomire Tosorintsi icapëro iguitsagare catarosonori ¹¹yosamitapëri icampëri: —¿Aintajeguibi, Garireasati? ¿Pairo pinetsabiriti cara Jonogaguitequë? Iriati Jesos ira yáganë Tosorintsi jonoquë, caraguesatantata iribocapae. Cara iáque aisati ingampaima cara iripigaima. ¹²Aro ipigaigapa iragátane cara oguitojaquë jitacha Olibos poro quirometoro irooti Jerosarénquë. ¹³Cara Jerosarénquë yapatoica iragátane Jesos jonoquë pongotsiquë cara itimaiguë. Ainta Peroro, Joan, Santiago, aisati Antiris, Jeripe, Tomás, aisati Baritoromé, Mateo aisati basini Santiago itomi Arijeo, Simón ira nintasantiro ibaísite, aisa Joras imatsiguenga

Santiago. ¹⁴Iquengaigaca përosati cara yamanaigui. Itsibataigari ireinti Jesus, aisati María iniro, aisati tsinanepague.

Icoiguëri Matías ira pëgairine Joras.

(Mt. 27.3-8)

¹⁵Pabisanaque arosataanti cataguiteri.

Yapatoica ira quemisantiri Quirisito icarati 120. Yaratianque Peroro cara aganguisatiquë icanë:

¹⁶—Nopiguemisantacagane, aroque omoncaraca ora isanguenaque David jirai, osanguenatacaqueri Isëre Caninaro Tosorintsi. Isanguenatacoqueri Joras ira obatacaganëri ira águëri Jesus. ¹⁷Ira Joras itsibatabitaiguëna cara naquenguitsatomotiri matsiguenga.

¹⁸Aique Joras ipimantëri Jesus yágancari quirequi. Aique iáque ipariaque Joras itsirapë pisotosetanë iramaretsa. Ira basini matsiguenga yágairi iguireguite yamanantancaro quibatsi cara iritijiri camatsiri paniacha jaanta. ¹⁹Iquemocoqueri antagaisati Jerosarésati, aro ijiquero irinibarequë iguebatsite Asérarama ora ocanti quibatsi asi araatsi. ²⁰Cara jirai osanguenaca iribiroquë jitacha sárimo:

iQuerotasha pairi timapatsi cara itimirori iriro!

Aisati ocanti:

Iripëgairita basiniquerai sërari.

²¹⁻²²Yamai përosati inibatë Peroro:

—Ainta matsiguenga tsipataiguëna cara jirai naniaqueri Joan ibaotisantatagueque aisati itsibataiguina iniaqueri Jesus irooti cara icamaque icaniatanai yogainocanaa. Yamai iroro caninatënguisti nongoiguëri paniro matsiguenga intsibataiguëna cara nongomantëgotëri Jesus cara icaniatanai.

²³Aro iquengaigaca irogaiguëri pite sërari: José aisa ijita Barasabás aisa ijita Jósito, aisati basini sërari ijita Matías.

²⁴Yamanocoqueri:

—Obiro, Natingomi, pigótasantiro iraneingomento antagaisati matsiguenga. Yamai ainta yaca pite sërari. Poniagaiguenari pairi pininti ²⁵pëgairine Joras ira tsipataigabitëna jirai iragátane Jesus aique icantagueto-motimi iáque iraisatiguitequë.

²⁶Aro yosocaiguëro mopëquipague ora irogóontëmari pairiraca ingoiguë Tosorintsi. Aro icoiguëri Matías yogaiguëri intsibatëmari iragátane Jesus icarati 11.

Ora cataguiteri jitacha Pentecosités.

2 ¹Parepa cataguiteri jitacha Pentecosités. Yapatoitaigaca antagaisati ira quemisantiri Quirisito. ²Iroguito iquemaigabaquero cantaca coguentima oquibeguente cara jonoquë. Pipogopë cara inaignasegui pongotsiquë piacaro. ³Oconijatomopëri ocamparo pamaminguero. Ipamagueque antagaisati. ⁴Iroonti Isëre Caninaro Tosorintsi. Aisati pinasërepëri antagaisati irirojegui coshoni pogaigapëri. Iparintaiganaca inibaiganaquero basinipague nibarintsi pinibataganërinta Caninaro Isëre Tosorintsi.

⁵Aroqueque yapatoica cara Jerosarënuquë tojainisonori joríojegui ipaniaguetaca jaapaguenta. Ipocasiti iromanaiguëri irinibaqueri Tosorintsi aroquenta iquemisantasantëri.

⁶Iquemocotaigapëri iragátane Jesus ira nibataguetatsi. Yapatobiripari. Te irogóigue pairoraca inguenguema cara iquemopëro antagaisati irinibaresonori. ⁷Iquenganeintasanotaigapa icampë:

—¿Teco irirojegui Garireasati nibatsica? ⁸¿Atiraca ocanta naquemaigapë inibataguëro nasiati nanibare paniropague? ⁹Ainta yaca matsiguengapague ipaniaigaca Páratiaquë, aisa Meriaquë, aisa Eránquë, Mesopotamiaquë, Joreaquë,

Caparosiaquë, Pontoquë, Asiaquë,
¹⁰Jirijiaquë, Pampiriaquë, Ejípitoquë,
 Iribiaquë aronisatiquë poeboro jitacha
 Sirene. Aintasati Iromasati. ¹¹Irirojegui
 jorío aisati ira aretaigacha quemisantiri
 Tosorintsi aisa icantari jorío
 quemisantiri. Aintasati Queretasati aisa
 Arabiasati. Naroegui naquemaiguëri
 inibataiguëro nasiatiegui
 nanibarepague. Icantaiquë inibatëcoi-
 guëri caninarisonori Tosorintsi
 itasorintsitanoti.

¹²Iquenganeintasantaiganaca
 antagaisati te irogóigue pairoraca
 inguenguema. Yosaminaitobaganaca:
 —¿Pairo ocanti?

¹³Ainta basini icabíntsaquíeri icanque:
 —Isinguitaigacani.

¹⁴Yaratinganë Peroro aisati basini
 iragátane Jesus icarati 11, inibatasantëri
 catsigue Peroro:

—Nomatsiguenga joríojegui, aisati
 obirojegui timaigatsi yaca Jerosarén-
 quëca, pinguemaiguena ora
 nongomantëmi yamai. ¹⁵Icaegui
 matsiguengaca teni irisinguitima cara
 piquengaigaca obirojegui terainta
 irionogate paba. ¹⁶Iroro oca
 isanguenatocoque jirai Joel comantanta-
 siri cara isanguenaque:

¹⁷Icanë Tosorintsi: “Aiquentata
 nomaiquëri Nasëre Caninaro
 noguëneri cara matsiguengapa-
 guequë. Ingomantëgotëna Naro
 pitomijegui aisati pisintojegui.
 Naro oniaguequerine
 oboinapague pairorapagueraca.
 Ira antisiparipague inguisanita-
 gueque. ¹⁸Aisati noguequeronta
 Nasëre Caninaro noguëneri ira
 quemisantina sërari aisa tsinane.
 Aro ingomantëgotëna. ¹⁹Cara
 jonoquë noniagaiquëmiroti ora
 pinguenganeintasantanquima.
 Osobica quibatsica noniagaiquë

miroti basiniati pinguenganeinta-
 santanëma: tojaiti irarara,
 tairingachari, arosonori
 catsiaguetaque inanë. ²⁰Ira paba
 intstitinane aisa ira manchacori
 inguiraanë cantaca araatsi cara
 queroquerai ipoqui Atingomi
 irogótocotaiguëri omagaro
 matsiguenga ingomantëgotaiga-
 përi. Iroro cataguiteri
 cobeingaguiterosonori.
²¹Pairiraca abenquimarine
 Atingomi iromanaqueri aito
 iragabisaicoqueri”.

Aro ocarati ora isanguenaque jirai
 Joel. Përosati cara inibatë Peroro:

²²—Nomatsiguenga joríojegui,
 pinguemaiguena ora nanganquemi.
 Yamai yoniaguëmi Tosorintsi cara
 iniacananatëri Ira Jesus Nasaresati.
 Itasongagueantë, icanquero ora te
 aneiro jirai ora piquenganeintasanta-
 naca cara itasorintsitantageque Jesus
 ora pigóontëmari cara igáqueri
 Tosorintsi icantaguequero pairoraca.
 Pigótabecaro obirojegui. ²³Jiraissonori
 iquianca Tosorintsi, aro igáqueri Itomi
 ingamaque yaca quibatsica. Obiro
 ógaiguëri cara popabaqueri ira basiniati
 matsiguenga catsimari ipëicotaiguëri.
²⁴Irari Tosorintsi itinaajiri yoganiatairi
 aisatitanai. Yamai quero icamaji. ²⁵Jirai
 David isanguenatocoqueri:

Përosati naneiri Natingomi
 catingasatiquë naro. Itsibatëna
 coshoni yoguëna imitocotina ora
 quero notsorogui. ²⁶Iroro
 nacaninasëretaguëque
 ninibatëgotëri caninasati. Aitosati
 nobatsa omagoriaque caninasati
²⁷queronta pijoquinario nasëre
 osobiquë, querootisati
 pinintacaguina pibatsaagui
 nobatsa naronta piniacananatë.
²⁸Aroque poniaguënaró negaraca

cara narequimi carari yamai
përosati nantioמוקמי, obiro
poganinasëretëna naronta
pintsibatëma.

Iroero ora isanguenaque David jirai.
Përosati inibatai Peroro:

²⁹—Nomatsiguengajegui, nanibatëgo-
tëri David catingasati. Igóiguë eiroegui
icamaque David omatsiguengajegui cara
jirai, itiaca yaca përosati irooti yamai.

³⁰Ira David comantantsiri igótasanti
aroque icomantasantëri Tosorintsi
icanqueri:

—David, aiquenta noguëri Itingomi
pigáantomentoquë Irironta
pomatsiguengasonori.

³¹—Teraiquerai intinaajima
Jesoquirisito igótoocoqueri David
inibatëgotëri Quirisito cara inganiatanae.
Icanque David quero ojocagani isëre
osobiquë, queroosatisi pibatsaagui ibatsa.

³²Iriati Jesus icabiriqueri yoganiatairi
Tosorintsi. Naroegui irogo mere Jesus
naniaigairi Irineniati. ³³Tosorintsi
yoguëri Itomi ibacosonoriquë. Aisati
ipëri Isëre Caninaro Iriri icomantasantëri
jirai. Yamai antagaisati oca piniaiguëca
aisati oca piquemaiguëca ipaiguënaró
naroegui Jesus. ³⁴Cara terai iriáte
Jonogaguítequë David icanque:

Tosorintsi icanqueri Quirisito
Natingomi: “Pisobique yaca
nobacosororiquëca ³⁵irooti cara
intingomintaiguëmi ira
quisaneinquemi”.

³⁶—Yamaicari nocoguini irogóigueta
antagaisati jorfojegu Iriati Jesus
pipëcotaiguë obirojegu, aroque
Tosorintsi icanqueri Atingomi aisa Ira
Agabisaicoontatsiri.

³⁷Cara iquemaguetobëro irinibare
Peroro oshabitapëri jorfojegu
iraneingomentoquë, inibataiganaqueri
Peroro aisa basini iragátane Jesus,
yosamitaiganaqueri:

—Nomatsiguenga, ¿Pairo
nangantaiguë?

³⁸Yotabitaiganaqueri Peroro:

—Pingantaigaima yacaqueroca,
pabentaiguemari Jesoquirisito,
pomaotisabiritaiguemari Iriero arota
irojocajimiro Tosorintsi ora picantague-
taigui te onganinate, quero
iquengaimiro. Aro coshoni irogaigana-
jimi ingábintsaigaimi. Aro imasitaiguë
miro Caninaro Isëre aisati.

³⁹Imasitëmiro obirojegu, aitosati
imasitëmari pijaniquitejegu, aisa
antagaisatijegu matsiguenga ira
ingaimë Atingomi Otosorintsite.

⁴⁰Iroroca nibarintsi aisa basini tojai
icomantaguetiri Peroro icanqueri:

—Quero posigajari yamai ica
matsiguengaca icantaguetomotiri
Tosorintsi ora te onganinate, te
inguemisantiri. Pinguemisantiri obiro
Tosorintsi arota iragabisaicoquimi
irojocajimiro ora pintagueti te
onganinate.

⁴¹Aro iraegui quemisanquero irinibare
ibaotisaatagaca icarati 3,000. Yamai
itsibataigacari quemisantatsiri.

⁴²Përosati iquemisantaiguëro ora
yogomeantë iragátane Jesus, iquengasë
retaigaca, yapatotaigaca, yamanaiguë,
itsibatobagaigaca itingaraguequero pan
iquengasëretantaigacari Jesus Ira
camobiqueri. ⁴³Iquenganeintasantaiga-
naquero antagaisati basini matsiguenga
itsorogaiganaquero cara itasorintsita-
gueiguë iragátane Jesus imitocotaiguë
rinta Tosorintsi. ⁴⁴Përosati iquengasëre-
taiganaca ira quemisantatsi aisati
ipaguetobaganaca ora iraisati iriro, te
iromichate. ⁴⁵Ipimantaguequero ora
yasinta quemisantatsiri yotsatengaiguëri
ipaguetëri ira coguitiario pairoraca.

⁴⁶Antagaisati cataguiteri yapatoitopian-
taca cara oquibequë pongotsi irasi
Tosorintsi. Aisati yapaguë pan

ibangopaguequë. Icaninasëretaiganaque. Aisati caninari iraneingomentojegui.

⁴⁷Inibabentocotaiguiri Tosorintsi:

—Icaninatasanoti.

Ira Jerosaresatijegui iniacananataguëri ira quemisantatsiri. Përosati Tosorintsi yogabisaicoqueri ira irirai quemisanqueri Quirisito. Itsibataigari ira botoibiritari Jesoquirisito.

Iquenguitsatagueque Perero oquibequë pongotsi irasi Tosorintsi.

3 ¹Chopiniguite iáiguë Perero aisa Joan itanë cara oquibequë pongotsi irasi Tosorintsi. Iáque iromanaque irinibaqueri Tosorintsi ora yameta jorfojegui. ²Cara omoroquë jitacha caninaro ainta inasegui paniro sërari carancaratasti. Te iranëitëmate cara iboguë jirai irooti yamai. Antagaisati cataguiteri iráganëngani cara omoroquë iromanaguequeri ira bocatsi imëri quirequi. ³Cara inioberë Perero aisa Joan cara inganaqueme yamanobëri quirequi icabëri:

—Píngantaneintëgotina, pomena quirequi.

⁴Inetsaigapëri Perero aisati Joan, icampëri:

—Pinetsena.

⁵Inetsëri ininti irágobëri pairiraca.

⁶Carari icanë Perero:

—Teni irine nasi naguireguite, teatisati oro. Yamaica iroonti ora inatsi nomëmi. Nanganqueri yamai Jesoquirisito Nasaresati iranëitacagajimita. Pingabiritima panëitanë.

⁷Perero yáguëri ibacosonoriquë imitocoqueri cara iraratinganë. Aito cara osintsitanai iguiti aisati igueroqui.

⁸Omanapague icabiritanaca yanëitasantanai. Itsibatacari pitirooti tsomagui oquibequë pongotsi irasi Tosorintsi. Yanëitanë, imatsematsetanë, inibabentocotajiri:

—Caninari Tosorintsi.

⁹Tojainisonori matsiguenga iniaiguëri cara yanëitasegui inibabentocoqueri Tosorintsi. ¹⁰Igóiguëri irironta ira sobigantetatsi cara omoroquë caninaro oquibequë pongotsi irasi Tosorintsi, yamanopiantë quirequi. Iquenganeintasantaigacari matsiguenga. Teni irogóigue atiraca icanca. ¹¹Cara ibeganaa carancaratabetacha te irapabaquëicotiri Perero aisati Joan cara isotocanë. Cara omoroquë jitacha iraisati Saromón isigaigapa matsiguenga iquenganeintasantaigapa. ¹²Perero iniaiguëri matsiguenga yosamitobëri:

—Nomatsiguenga ¿Pairo

piquenganeintasantobiqueri ica? ¿Pairo pinetsabiritaiguëna? Cagaro natasorintsite noganëiantaari.

Querootisati pijitina caninarina naro.

¹³Iriro Tosorintsi iquemisanque Abaram jirai, aisati iquemisanqueri Isac aisa Jacob, acharineegui, Iriro oniagaiguë miri Jesus Itomi Caninarisonori.

Obirojegui págantanëri, pitsoingauguëri catingasatiquë Pirato cara icogabeca iromisotocajiri. Te pinintaigue obirojegui. ¹⁴Pitsoingauguëri Ira caninatasanotatsiri. Te pomaniri Pirato iromisotocajiri Jesus, irianti picogaiguë iromisotocajimiri ógueri. ¹⁵Pógaiguëri Ira timagantatsiri. Icamaque Jesus cariri icabiritajiri Tosorintsi yoganiatairi. Aisatitanai naniaigabajiri. ¹⁶Iriati Jesus përi isintsire ica sërarica. ¿Teco pigótiri? Iquemisanquerinta Jesus, ica yoguibegajica.

¹⁷—Yamai, nomatsiguenga, nigóti naro te pigóigue obirojegui ora picantaiguë cara pogamagaiguëri Jesus. Teatisati irogóigue pitingomipague.

¹⁸Aroque Tosorintsi isanguenatacaganëri antagaisati comantantatsiri jirai icomantëgotiaiguëri Quirisito cara ingamobicái. ¹⁹Pinguengauguema arota

po masiniatitanae yamai quero picantaja pibega jirai. Pabentaiguemari Tosorintsi pinguemisantaiguero arota irojocajimiro ora picantagueigui te onganinate. ²⁰Aro ingábintsaigaimi Tosorintsi intsibatëmi arota iraganinasëretaiquemi. Aisati iragátajimiri Jesus aisati ijita Quirisito Ira Agabisaicoontatsiri Ira icomantëgotaguë comantantatsiri jirai.

²¹Irinaqueni Jesus canta Jonogaguetequënta irooti cara irobetsicaguequero Tosorintsi antagaisati pairoraca yaca quibatsica. Jirai Tosorintsi isanguenatacaqueri, inibatagaiguëri comantantatsiripague ora inganque Tosorintsi yaca quibatsica. ²²Paniri comantantatsiri jitacha Moisés isanguenaque jirai:

Tosorintsi Itingomisonori
iragáquemiri comantantatsiri
aisati inganquina nibega naro.
Iriro omatsiguenga. Pairoraca
ingomantaiguëmi pinguemisan-
taigabaquitiguiri. ²³Ira quero
iquemisantobëri, iriro
iripoguiriaiguë iritsonguëmata,
quero itsibatari imatsiguenga
quemisantatsiri.

²⁴Antagaisati comantantatsiri icomantëgotëro oca piniaiguëca yamai. Iparintaca Samoel aique basini comantantatsiri irooti yamai.

Icomantëgotëro omagaro. ²⁵Aisati obirojegui pomatsiguengatacari ira comantantatsiri jirai. Picharineegui aisati obirojegui iquengaiguëmi Tosorintsi cara icanqueri Abaram:

Nangantocobintaiguëri antagaisati
matsiguenga yaca quibatsica.
Iro ro nagátaguëqueri
pomatsiguenga iragabisai-
cotai-
gaimi obirojegui iraganinasëretai-
gapëri matsiguengajegui.

²⁶Tosorintsi yoguibatëri Itomi igáquemiri ingábintsaiguëmi caninasati arota pijoquiuro obirojegui ora

picantaguëti quimingaro, aro iragabisai-cotaigaimi.

Perero yogomequeri itingomi.

4 ¹Irootita inibataigaseguiri matsiguenga Perero aisa Joan, iriguito ipocaigapë saserirotijegui aisati saroseoegui aisati itingomi ira omisantiro oquibe pongotsi irasi Tosorintsi. ²Iguisanijimpëri inibatobagaigaca:

—¿Pairo yogomebiriqueri matsiguenga? Icomantirini inganiantanae igamagapague aroquenta itinaaja Jesus icaniantanae. Teni onganinate oca yogometirica.

³Aroquenta ochapinitanë, yágagantëri ira Perero, aisati Joan, aisa ira carancaratabetacha, yomingaiguëri irooti cara onguëtaguetanë. ⁴Carari tojaini ira quemaguëri Perero aisa Joan iquemisantaiguëro Irinibare Tosorintsi. Yamai quemisantatsiri icarataigui 5,000 sërari.

⁵Oquëtaguetanai yapatoica Jerosarénquë itingomiegui jorío, antiasipariegui, aisa ira ogomeantiro Sanguenari. ⁶Aintasati Anás itingomi saserirotijegui, aisa Caijás, Joan, Arijantoro, antagaisati imatsiguenga itingomi saseriroti. ⁷Icaimagantëri Perero aisati Joan yogobëri aganguisati, yosamitaigabaqueri:

—¿Ati picanqueri ica pogaguibegajica? ¿Pairo picantancari? ¿Pairi agáquemiro cara picanquero negaca?

⁸Pinantasantaranta Perero Isëre Tosorintsi pinibataqueri caninasati. Aro yotabitanëri Perero:

—Obirojegui itingomi aisati antiasipari, ⁹¿Iriroco posamitaiguëna ica carancaratabetachaca icantaneintë gotëri Tosorintsi? Pinetsaiguero tegotsitatsi ini yamai. ¿Picogaiguinico pigóigüe atiraca icanca cara ibegaja?

¹⁰Pinguemaiguena. Aisati caninataque inguemaigue antagaisati omatsiguenga. Yogabisaicotajiri Jesoquirisito Nasaresati Ira pipëicotaigabitaca obirojegui, carari itinaajiri Tosorintsi yoganiatairi.

¹¹—Ira Jesus aisa icantaro pibega otingomi mopë cara ijocaiguëro jirai ira obetsiquirori pongotsi. Tosorintsi yoguibatëri Itomi Iriro Itingomisonori, carari obirojegui picantari obetsiquirori pongotsi. Pitsongaigabaqueri Jesus pipëicotaiguëri. ¹²Teni irine basini Agabisaicoontatsiri yaca quibatsica ira agabisaicotajáine. Paniro Jesus ipacáiri Tosorintsi.

¹³Inibatasantë catingasati Peroro aisa Joan. Iniaigabaqueri itingomiegui iquenganeintasantanaca inibatobagagaca:

—¿Pairo te intsorogobite pitirooti? Teni irotsatenguero sanguenari tenta irisanguenatasante. Irianti simaguiti. ¿Nega igóiguëro inibatëro ora icanque negaca? Irirojengari ogamequero Jesus cara itsibataigacarari jirai.

¹⁴Aintasati ira obegajacha. Iniaigabaqueri itingomiegui te irogóigue irotopitaigueri Peroro. ¹⁵Aro igáqueri Peroro aisati Joan aisati ira obegajacha: —Atsi pisotocanë canta. Caraquenta nangaimaigaimi.

Aro inibatobagagaca itingomiegui. ¹⁶Icantaiguë:

—¿Atiroco angantiri ira sërarira? Quero itsoingaiguiri eiro antagaisatinta Jerosaresati igóiguë cara itasonganque. ¹⁷Teni onganinate cara inguenguitsatomaguetiri basini matsiguenga. Intsome omitsoroguirri, intsome angantiri: “Quero picomantëgotairi Jesus”.

¹⁸Aisati icaimaigairi iguisatsatëri isintsitsaqueri:

—Quero picomantëgotairi aisati Jesus. Querootisati pogometocotajiri.

¹⁹Peroro aisa Joan yotabitaiganaqueri:

—Pinguengaiguema obirojegui. ¿Teco iraniaigái Tosorintsi? Pingomantina. ¿Caninataqueco nanguemisantaguemi obiro; oraco irasi Tosorintsi nanguemisanque? ²⁰Quero nojocobintiro, nanganquero ora naniaque aisati ora naquemaque.

Yapatoitaigaca quemisantatsiri yamanaiguë.

²¹Yamai yogobeingataiguëri itingomiegui cara igátaigairi. Te iripasabintsatiri aroquenta itsorogaiguëri matsiguengajegui. Icanque matsiguenga:

—Caninari Tosorintsi aisati caninari ira quemisantatsiri yoguibegajiri carancaratsiri.

Iroero te iripasataguëtiri. ²²Aroque yogabisë 40 osarini ira carancaratsi carari itasorintsite Jesus pogabisaicotajiri.

²³Aro itingomiegui yomisotocaigairi Peroro aisa Joan, aique íaiguë cara inaigasegui basini quemisantatsiri. Icomantaguepëri antagaisati ora icanque itingomiegui saseriroti aisati antiasipari. ²⁴Aroque iquemaigabaqueri, yamanaiguëri Tosorintsi icantaiguë:

—Natingomi Tosorintsi, Obiro obetsiquëro Jonogaguete, aisati quibatsi, aisa angaare, antagaisati. Aisati pobetsicaguequeri antagaisati ira inatsi Jonogaguetequë, aisa quibatsiquë, aisa angaarequë. ²⁵Aisati jirai pogomequeri David ira quemisantimi. Pogomeantacari Pisëre ora isanguenantacaro oca:

¿Pairo iguisaneintaguetobiquimi ira basiniatsi matsiguenga? ¿Pairo iquengasëretaguebiritiro joríojegui ora te onganinate?

²⁶Ira itingomiegui iquengaigabitaca icogaigabita iritsonguerime

Atingomisonori aisa Ira
agabisaicoontatsi.

²⁷Yaca Jerosarénquë yapatotaigaca arosonori matsiguenga iguisaneintai-guëri Jesus Pitomi caninari. Iriro poguë Agabisaicoontatsiri. Iguisaneintaiguëri Eroris, Pontsio Pirato, joríojegui, aisati basiniati matsiguenga. ²⁸Jirai pigótiri. Yamai aroque icantaiguëro irirojegui ora piquianca pobetsiquë jirai. Aisati pisëretaca cara ingamobitaiguëna Pitomi Jesus. ²⁹Yamai Natingomi, pinetsaiguëri. Icoquini iromitsorogai-guëna. Pingantocotina querota notsorogaiguëri përosati nanguenguïtsa-tasantëmiro Pinibare. ³⁰Pitasorintsitasa-note, pigaguibegajiri ira janaitatsi arota irogótiri matsiguenga aisonori Iriro Jesus Pitomi aisati iraniacaninataiguëri.

³¹Aroqueque itsonque yamanaiguë, aro posebatanaca pongotsi cara inaigasegui. Pinampari Caninero Isëre Tosorinti icomantasantanquero aisonori Irinibare Tosorinti, te intsorogaiganaque.

Iquengaigaca quemisantatsiri intimaiguë caninasati.

³²Yamai tojaini icarati quemisanta-tsiri. Iquengasëretaiganaca. Ipabacague-tanaca ora iraisati, te iromichate. Te paniro cantatsine:

—Iroroca nasiati.

³³Përosati iquenguïtsatasantë iragátane Jesus icanque:

—Icabiritanaa Atingomi Jesus icaniatanai.

Aisati icábintsaiguëri Tosorinti ira iragátane. Yoganinasëretaiguëri. ³⁴Te paniro tasegatsine. Antagaisatinta yasintagueta togantsipague aisati pongotsipague ipimantaguëtiro yágancaro quirequi. Yamapëri, ³⁵ipapëri iragátaneegui Jesus irotsatengaguëtiro ira coguetatsi paniropague. Icantaneintë

gotëri imitocoqueri irapiguemisantaca-gane. ³⁶Ainta inasegui paniro sërari jitacha José. Aisati iragátane Jesus ijitaiguëri Berinabé ora ocanti caninatagantatsiri. Ipaniaca oboguesiquë jitacha Chípire. Iriro imatsiguenga Irebí. ³⁷Ipimantëro iritogane, yamapë iguireguite, ipapëri iragátaneegui Jesus.

Itsoigaca Ananías aisa Sajira iina.

5 ¹Ainta basini sërari jitacha Ananías aisati Sajira iina ipimantëro iritogane. ²Iquengaigaca iriro aisa iina yágarantobë aganguisati quirequi, yoguëri. Yáganëri basini Ananías ipapëri iragátane Jesus icampëri:

—Jerica quirequi pipënataca cara nopimantëro notogane.

³Antagaisati pigótacaqueri Peroro Isëre Caninero Tosorinti. Icabëri Peroro:

—Ananías, pitsoigani. ¿Pairo pinintacagobiqueri camagari Satanás yamaica inanquimi pineiquë? ¿Pairo pamatobibiritabecaro Isëre Tosorinti cara págarantobë quirequi, poganontacari aganguisati? ⁴¿Cagarico pasi pitogane ora popimantëra, cagarico pasi quirequi? ¿Pairo piquengabiritai-gaca picanque: “Jerica antagaisati quirequi”? Teni pomatobitina naro, Irianti pamatobitabeca Tosorinti.

⁵Iquemobëro Ananías oca nibarintsica, aito ipariganë icamaque. Iquemocotobëtiguëri itSOROGASANTAIGANAQUE antagaisati. ⁶Aique yobetsitaiguëri oboinapague iponancari tocoya, yágaiganaqueri itiaiguëri. ⁷Pabisanaque cosamanisata pipogopë iina Ananías, terai ogóte cara aroque icamaque ojime. ⁸Yosamitobëro Peroro:

—¿Ati icarati quirequi páguë cara popimantaiguëro pitogane? ¿Antagaisatico ica ipapënaca pijime?

Oniaqueri Sajira ocampëri:

—Jee, antagaisati.

⁹Icabëro Peroro:

—¿Pairo piquengabiritaigaca obiro aisa pijime pomatobitaiguëro Isëre Atingomi? Pinetseri ira sërari paguera. Aroque itiaiguëri pijime. Aisati obiro yamai iráganëmi iritijaiguëmi.

¹⁰Aitosati opariganë Sajira ocamaque iguitiquë Peroro. Cara icaigapë oboina, iniaigapëro aroque ocamaque. Yáganëro itiaquero otsibatapaari ojime. ¹¹Aro itorogasantaignaque omagaro ira quemëgotëri Ananías aisati iina.

Iragátane Jesus catingasati cara joríoquë.

¹²Tojai itasongapininti iragátane Jesus imitocoquerinta Tosorintsi. Yoniagaiguëri matsiguenga ora igóontacari Tosorintsi. Iquenganeintasaignanaca matsiguenga. Yapatotaigaca ira quemisantatsiri cara omoroquë jitacha iraisati Saromón.

¹³Itsorogaiguë matsiguengajegui cara intsibataiguëmari, carari icanque:

—Cobeingari ira quemisantiri Jesus, carari aisati caninari.

¹⁴Tojaisonori sërari aisati tsinane quemisantaiguëri Jesoquisito. Itojaigasanoiganaque quemisantatsiri.

¹⁵Yogaiguëri ira janaitaguetatsiri cara abatsiquë. Yoguëri jatasintsiquë aronta inguenopë Peroro iromamegapëri arota irobeganaima. ¹⁶Yapatotaigapa tojaini matsiguenga paniacha basinipaguequë poeboro aroniatiquë Jerosarén.

Yamaigapëri ira janaitatsiri aisati ira inanca camagari. Yogui begajiri antagaisati.

¹⁷Aro iguisaneintanaca itingomi saseriroti aisa ira tsipatachari ijita saroseo. ¹⁸Yágagantëri ira iragátane Jesus yomianqueri iromingamentojeguiquë Jerosaresati. ¹⁹Cara tsitiniriquë yasirianaquineri ironomire Tosorintsi, yomisotocanairi icanqueri:

²⁰—Pijáigue cara oquibequë pongotsi irasi Tosorintsi. Pinguenguitsataiguero ora nibarintsi timagantatsi. Inguemisanquero ca matsiguenga përosati intimaque Jonogaguitequë.

²¹Cara oquëtaguetanë iáiguë cara ibangoquë Tosorintsi yogomeantaguetanë. Iroontita yogomeantagui, itingomi saseriroti aisa ira itsibata icaimaiguëri yapatotaiguëri ira obatsiri jorío icarati 71. Irirojegui saseriroti, antiasipari, aisati ira ogomeantiro ora isanguenaque jirai Moisés. Igáqueri iromeraro:

—Pijáigue omingamentoquë pomaigapënari yaca ira quemisantiri Jesus.

²²Aique iáiguë iromingamentoquë. Te irinaigue. Aro ipigaigapa icomantaigapë ²³icanque:

—Naniaigapëro omingamento ositasantaga sitëcori. Ainta ira omisantiro omoroquë. Cara nasiriabeparo te irinaigue tsomagui.

²⁴Cara iquemaquero oca nibarintsica itingomi ira omisantiro ibango Tosorintsi aisa itingomi saseriroti imabocaca iquenganeintasaignanaca. Yosamitobaganaca:

—¿Ati icanca irirojegui? ¿Nega iáiguë? ¿Atini yamai?

²⁵Iriguito yarepa paniro sërari icampë:

—Ira sërari pomingaigabitaca ainta yamai tsomagui oquibequë pongotsi irasi Tosorintsi yogometaigapairi matsiguenga.

²⁶Aique iáque itingomi ira omisantiro oquibe pongotsi aisa iratirite, yamaigapëri caninasati. Te ingantiri catsimari itsorogaiguërinta matsiguenga. Icanque itingomi:

—Iribasegaiguënaca mopëquë.

²⁷Yamapëri ira iragátane Jesus itingomi aisa ira itsibata, yogaiguëri

aganguisati obatsiriquë. Icabëri itingomi saseriroti:

²⁸—Aroque nacantasantaiguëmi cani: “Quero picomantëgotagairi Jesus”. Yamai pogometaiguëri omagaro Jerosaresati. Pinibatëgotina: “Irirojegui saseriroti ógaiguëri Jesus”.

²⁹Yotabitaiganaqueri Perero aisa basini iragátane Jesus:

—Caninataque nanguemisantaiguëri Tosorintsi. Inganqueca matsiguenga ora basiniati, quero naquemisantiri.

³⁰Aisonori obirojegui ógaiguëri Jesus. Pipëicotaiguëri corosiquë. Carari icabiritajiri Tosorintsi yoganiatairi, Ira iquemisantaiguë omatsiguenga jirai.

³¹Tosorintsi yogainocanëri Ira Jesus. Yoguëri ibacosonoriqüë. Yoguëri Itingomi Obatsisiri aisati Agabisaicoontatsiri icoguininta imëri jorójegui cara ingantaigaima yacaqueroca, ingábintsai-guëri Tosorintsi irojocajineri ora icantaguëti te onganinate quero iquengairo. ³²Aroque nigótasantëro oca nocomantaiguëmica yamai nianasantaguequero. Aisati ocomantaguëti Caninaro Isëre Tosorintsi, Iroro ipëri Tosorintsi antagaisati ira quemisantiri.

³³Cara iquemaigabaquero oca nibarintsica págapëri oshabitapëri iraneingomentoquë itingomiegui, iguisaneintasanoiguëri iragátane Jesus. Icoigaibitanaca iróguirime. ³⁴Ainta sërari jitacha Gamariel. Iriro bariseo aisati yogomeantiro Sanguenari. Iniacaninataiguëri iriro matsiguenga. Aro yaratianque icanque:

—Iráganërita casiriconiati icaegui quemisantirica Jesus. Caraquenta aguipigapairi.

Aro yáganëri sotoquë. Aique icanë Gamariel:

³⁵—Nomatsiguenga, pigamaiguema ora pinganquerira icaegui quemisantiri Jesus. ³⁶Jirai iconijapë Téoras ira

jitabitënguicha itingomi. Yoguiataiguëri tojai irogomere icarati 400 sërari.

Yogamagaiguëri Téoras atingomiegui, yomisigaiganaqueri iratirite iátagueque. Yamai teni nanguemocotajiri. ³⁷Aique cara isanguenatocotaguequeri antagaisati matsiguenga arota iripënabintëri quirequi imposito, iconijapë Joras Garireasati. Aisati yoguiataiguëri tojainisonori irogomere. Aisati yogamagaiguëri ira Joras, iátagueque iratirite. ³⁸Iroro nocomantaguëtaiguëmi yamai caninataque irineta icaegui matsiguengaca. Quero picantaiguëri pairoraca. Iriroca agáqueri matsiguenga ingomantagueque, aro otsonganaquima oca nibarintsica. ³⁹Iriroca agáqueri Tosorintsi tiguëti pingantiri piguimarentiri. Quero pipëgatsatari Tosorintsi.

Cara iquemobëro oca nibarintsica, iquengaganaca.

⁴⁰Icaimagantaigairi ira iragátane Jesus. Ipogopë. Ipasataigabaqueri, icantasantaiguëri:

—iQuero pinibatëgotagairi Jesus!
iQuero pinibatëmati!

Aro igátagairi itingomiegui yomisotocajiri. ⁴¹Iáiguë quemisantatsiri icarati 12 icaninasëretaiganaque aroquenta itsipiriobitaiguëri Jesus ora pasiguitagantsi. ⁴²Antagaisati cataguëteri përosati yogomeantaiguëri cara oquibequë pongotsi irasi Tosorintsi aisati pongotsipaguequë. Icomantëgotagairi Jesus icantopiantë:

—Iriati Jesus Agabisaicoontatsiri Ira oguiaiguë eiro jirai.

Icoigaiguëri ira omitocoontatsiri icarati 7.

6 ¹Itojaiganaque quemisantatsiri. Ainta ira nibatatsi guiriego aisati ira nibatatsi ebereo. Yabenca ira nibatatsi guiriego icantaiguë:

—Antagaisati cataguiteri cara imitocoonti yotsatengaguetiro perinti, omatsiguenga ogamaimentaga pitaseguë. Paniro imitocotiro iroonti ora nibatiro ebreo.

²Aro iragátane Jesus icarati 12 yapatoiqueri antagaisati quemisantsiri. Icabëri:

—Teni ongemeite nojocanëro cara naquenguitsatopiantiro Irinibare Tosorintsi arota nomaguetaiguemiro poperi. ³Yamai, nopiguemisantane, pingoigague 7 matsiguenga omitocoontatsiri ira caninatatsiri, ogótasantatsiri, pinanca Isère Caninaro Tosorintsi. Pomeri itarobacaare ora imantaguetimiro poperi. ⁴Naroequi përosati cara nomanaiquë aisati cara nongomantagueantiro Irinibare Tosorintsi.

⁵Aro iquengaiquëro. Icoigaiquëri Isiteban ira quemisantsanotatsi aisa pinancari Isère Caninaro Tosorintsi. Aisati icoigaiquëri Jeripe, Porócoro, Nicanor, Timón, Párimenas. Aisati icoigüeri Nicorás Antioquíasati, jirai itsibataigacari jorfo iquemisantabecari Tosorintsi, aique iquemisantsantëri. ⁶Aique yamaigapëri cara iragátanequë Jesus. Aro yamanocotaigabaqueri yogaiquëneri ibaco iguitoquë. ⁷Tojai icarati ira quemaiguëro Irinibare Tosorintsi. Aiquero iáque itojaiganaque quemisantsatsiri canta Jerosaránquë. Aisati tojai icarati saseriroti quemisanquero Caninaro Nibarintsi.

Yáguëngani Isiteban.

⁸Tojai icaninasëretasantë Isiteban. Tojai itasongagueanti imitocoquerinta Tosorintsi. Iquenganeintasantaiganaca matsiguenga. ⁹Yapatotaigaca matsiguenga jirai ibimantaga, yamai yomisotocajiri, aintasati Sirenesati, Arijantíríasati, Sirisiasati, Asiasati.

Irirojegui pëgatsacari Isiteban. ¹⁰Teni irogóigue irotopitiri. Igótasanoti Isiteban inibatasantë Iroronta Isère Caninaro Tosorintsi nibatacaqueri.

¹¹Aro tojai ira quisaneinqueri ira Isiteban icantaiguëri basini matsiguenga:

—Intsome ontoiguëgotimari Isiteban. Aro nomaiguëmi quirequi. Pinibatëgotiri: “Naquemaqueri Isiteban. Itsoinguëri Moisés icantocoqueri ora te onaninate. Aisati icantocotaguetasitari Tosorintsi”.

¹²Iquemaiguëri jorfojegui iguisaneintaiganaca antiasipariegui, aisa ira ogomeantiro Sanguenari, antagaisati. Omanapague ipocasipëri yágaigapëri Isiteban yáganëri itingomieguiquë jorfo icarati 71. ¹³Aisati igátaiguëri ira tsoiguëgotëmarine inganque:

—Naquemaqueri Isiteban icantopiantë: “Teni onganinate ibangoca Tosorintsi. Teatisa ora isanguenaque Moisés.

¹⁴Iriroquëro Jesus oquibeca pongotsi. Aisati imasiniatiquero ora nametaiga ora yogomeantaiguëna Moisés”.

¹⁵Aique inetsaiguëri Isiteban itingomiegui jorfo aisati antagaisati ira sobicaigasegatsi. Inetsasantobëri iboroquë Isiteban caninaro aisa icantaborotari ibega ironomire Tosorintsi.

Icomantëgotaca Isiteban.

7 ¹Yosamitëri itingomi saseriroti: —¿Aisonori oca icantocotaiguëmica?

²Yotabitanëri Isiteban:

—Nomatsiguenga, aisati natingomiegui, pinguemaiguena. Jirai itimi omatsiguengajegui Abaram canta Mesopotamiaquënta teraiquerai iragaganëma Jaránquë. Canta yoniagapari Tosorintsi Ira caninarisonori. ³Icampëri:

Pijocanëri pomatsiguenga, pijátaje irooti basiniquë quibatsi ora noniaiguëmira.

⁴Aique ijocanëro Abaram iguebatsite imatsiguenga. Itsibatari iriri cara iáiguë Jaránquë. Aito icamaque iriri. Aro Irroquerai Tosorintsi agaganëri Abaram irooti oca quibatsica cara pitimaigui obirojegui yamai. ⁵Terai imeri Tosorintsi oca quibatsica te imëmatiri arosata. Patirotiro icanqueri:

Aiquenta nomëmiro pintimenta yaca. Pingamaqueca obiro, aro intimaigüë pitomijegui yaca.

Terai irine itomi Abaram. ⁶Aisati icanqueri Tosorintsi:

Aiquenta intimaigüë arosonori pitomijegui aisati picharineegui cara iguebatsitequë basiniati matsiguenga, iromerataigabaquimari tojai osarini ongaraque 400 ingantaguequeri ora catsimari.

⁷Aique nangasitígataiguëri ira merataiguëmarine. Aro irisotocaigae pomatsiguenga naguipigaigairi yaca quibatsica, inguemisantaiguëna yaca.

⁸Nocogui yamai pitotima irogóontima matsiguenga piquemisanquina.

Aro iquengaigaca Abaram Tosorintsi. Cara inë itomi Abaram jitacha Isac, pabisanaque 8 cataguiteri itoqueri cara yametaiga joríojegui. Aisa inë itomi Isac jitacha Jacob, itoqueri. Aisati Jacob itomintacari itomi icarati 12, itotaguequeri. ⁹Ainta paniro itomi Jacob jitacha José. Iriati ireinti icarati 10 iguisaneinqueri José ipimantaiguëri. Yaganëri matsiguenga canta Ejípitokuë. ¹⁰Itsibatari Tosorintsi imitocoqueri icábintsëri, icanqueri ira Baraón itingomi Ejípitosati iniacananatëri José. Yoguëri Baraón aganguisonoriquë, aisati itingomibiriqueri José cara itingomibintaiguëri antagaisati Ejípitosati aisati imatsiguenga Baraón.

¹¹Përosati inibatasegui Isiteban icanë:

—Pabisanaque cara pipoque itasegasanoiguë antagaisati Ejípitosati aisa omatsiguenga yaca Canánquëca. Te inae iraperiegui. Canta Ejípitokuë José yoguëro tojai perintsi. ¹²Iquemocoquero perintsi Jacob canta Ejípitokuë. Aro igáqueri acharineegui itomijegui Jacob. Patiroti iáiguë. ¹³Cara iáigai aisati, yoniagaigabacari José igóigapëri ireinti. Aisati Baraón itingomi igóigabaqueri imatsiguenga José. ¹⁴Aique icabëri José: Atsi pijáigue, pingantiri Apati iribocapë yaca aisati antagaisati imatsiguenga.

¹⁵Aro iáiguë irooti Ejípitokuë Jacob aisati imatsiguenga icarati 75. Canta, icamaque Jacob aisati canta icamaiguë acharineegui. ¹⁶Aiquenta yágaiganaqueri igamagapague itiaqueri Siquemiquë cara quibatsiquë ora yamanantë Abaram jirai ipimantë itomijegui Emor.

¹⁷Përosati icanti Isiteban:

—Cara aronibati omoncaraquima ora icanqueri Abaram Tosorintsi jirai, itojaiganaque omatsiguenga canta Ejípitokuë. ¹⁸Aique ipoque irirai itingomi te irogótiri José.

¹⁹Yamatobitaiguëri omatsiguenga icanqueri cara irojocagueri itomijegui arota ingame. ²⁰Aro inë Moisés. Iniacananatëri Tosorintsi. Maba manchacori iquibianë ibangoquë iriri, iniro pimánopitëri Ejípitosati. ²¹Cara ojocanëri sotoquë oniopëri irisinto Baraón, págairi ocanqueri iriro asi otomi. ²²Yogometasantëri Ejípitosati antagaisati ora igóigui iriro. Catingasati inibati Moisés. Caninasati icantaguetiro pairoraca intagueti.

²³Aisati icanë Isiteban:

—Ora irosarinite Moisés ocarati 40, aro iquianqueri iraniaqueri joríojegui imatsiguenga. ²⁴Aique iáque. Iniopëri Ejípitosati iguisasiguiri paniro jorío.

Yogamagapëri Moisés ira Ejípitosati;
²⁵ijique irogóigueme imatsiguenga cara
 iriro iragabisaicoantaiguemarime
 Tosorintsi carari te irogóigue. ²⁶Cara
 oquétagnetanë iniopëri pite
 imatsiguenga iguisabacagasega.
 Icgabeca Moisés iraguimairerime.
 Icantabecari:

¿Pairo piguisabacagobita? ¿Cagarico
 pomatsiguenga?

²⁷Aro yosibitobëtiguiiri ira
 quisasanoquenguicha, icabëri:

¿Pairi agáquemi obiro yaca
 pingampëma natingomi?
 ¿Picoguinico pomerataiguena?

²⁸¿Póguënanico naro pibiaqueri
 Ejípitosati chopi ira pogamaguë?

²⁹Iquemobëro Moisés itsoroganë
 isiganaca irooti basiniquë quibatsi
 jítacha Matían. Irooti itimantapa. Canta
 yágapë iina, inë pite itomi.

³⁰—Pabisanaque 40 osarini
 itiomoqueri iriconguiri Moisés. Aiti
 pinasegui piriabatsaro cara aronisatiquë
 oguitoja jítacha Sinaí. Yomisantëneri
 Moisés iroishate iriconguiri,
 iconijatompëri ironomire Tosorintsi
 irisaanganetsite cara totseisiquë
 itairingopa yosiacaro tsitsi carari te
 otogatima totseisi. ³¹Iquenganeintasan-
 tanaca Moisés yotsitiparo totseisi icoque
 iranasantiro tsitsi. Iquemobëtiguiiro
 Irinibare Tosorintsi. ³²Icabëri:

Naro Tosorintsi; iquemisantina
 picharine Abarám aisati
 iquemisantina Isac, aisa
 iquemisantina Jacob.

Aro imogomogoatanaca Moisés
 itsoroganë te iranetsanajiro. ³³Aisati
 icanqueri Tosorintsi:

Piguëtiri pisapatote paratianquenta
 cara quibatsiquë caninaguitero
 catingasatiquë Naro
 Pitosorintsite, pinguemisantatsa-
 tina. ³⁴Naniaiguëri

pomatsiguenga Ejípitokuë.
 Naquemaiguëri cara
 yabentaigaca. Yamai
 nangábintsaiguëri. Iroro
 nipocasitaguëqueri. Yamai
 nagáquemini Ejípitokuë.

³⁵Jirai itsoingaigabitacari ira Moisés
 icanqueri: “¿Pairi agáquemi
 pingampëma natingomi?” Iriati Moisés
 igáque Tosorintsi yamai icanqueri
 itingomi cara iragabisaicoantaiguëri
 imatsiguenga. Iroro igátaguëqueri
 ironomire Tosorintsi ira conijatomoqueri
 totseisiquë. ³⁶Iriro Moisés ágaiganaqueri
 imatsiguenga acharineegui. Itasongoben-
 taiguëri cara Ejípitokuë aisati cara
 yoguimontiaiganaqueri angaarequë
 tsonaaro aisati quibatsiquë piriabatsaro.
 Itasongobentaiguëri 40 osarini.

Aisati icanë Isiteban:

³⁷—Iriati Moisés icantaiguëri
 jorjogui:

Tosorintsi agáquemirine
 comantantsiri aisa inganquina
 nibega naro. Iroro pomatsiguenga.
 Pairoraca ingomantaiguëmira
 pinguemisantaigabaquitiguiiri.

³⁸Aisati Moisés itentaigari jirai
 omatsiguenga quibatsiquë piriabatsaro,
 aisati inibatobaca irisaanganetsite
 Tosorintsi oguitojaquë jítacha Sinaí.
 Aisati iriro iquemobëro Irinibare
 Tosorintsi timagantatsiri ora igóontacari
 Tosorintsi. Isanguenataigáiro.
³⁹Acharineegui te inguemisantiri Moisés
 itsoingaiguëri. Icgogaigabitaca
 iripigaimame Ejípitokuë. ⁴⁰Iroontita inë
 Moisés jonoquë oguitoja, icantaiguëri
 Aarón ireinti Moisés:

Nocogaiguini pobetsiquinari basini
 nobabane irirai irobataiguëna
 naguiatanëri, tenta nogóigue
 negaraca ipiaca Moisés ira
 maigapëna cara Ejípitokuë irooti
 yaca oguitojaica jítacha Sinaí.

⁴¹Aro yobetsicaiguëneri yosiacagantëri itiomijani baaca. Ijiqueri ibabane yógaiguëneri itaquineri oisha, icaninasë rebiritaiganaqueri ira yobetsicasitaca.

⁴²Aro ijocaiganaqueri Tosorintsi iromanocotirita paba, manchacori, aisa jonogasatipague. Jirai isanguenatocoqueri comantantatsiri jitacha Amós:

Obirojegui jorío, ¿Teco pógaiguenari oisha cara jirai tojai osarini ocarati 40 canta piriabatsariquë quibatsi? ⁴³Teni. Iroonti panataiguëri pobabane Moroc, aisati panataiguëri irosiacagomento jonogasati jitacha Repam, pitirooti posiacagantë pobetsicasitaigari obiro pamanocotasitaigari. Iroro nojocaguëquemi piguebatsitequë, nagátaiguëmi canta jaanta Babiróniaquë.

Aroque isanguenaque negaca Amós jirai.

⁴⁴Përosati icanai Isiteban:

—Cara piriabatsaroquë quibatsi jirai yanataiguëro omatsiguenga ibango Tosorintsi iroonti tocoya cara yoguëro osanguenataga mopë. Moisés yobetsiquë neri ibango Tosorintsi aisati ocantaro pibega ora icomantasantëri Tosorintsi yoniaguëri. ⁴⁵Ora ibango Tosorintsi yágobëro acharineegui cara ipëri Tosorintsi, aique yanataiguëro itsibataigari Josoé cara yágabitsaqueri iguebatsite matsiguenga catsimari. Ijocaiguëri matsiguenga Tosorintsi ipëri iguebatsite acharineegui. Përosa pini pongotsi irooti cara itimi David.

⁴⁶Inicaninatëri David Tosorintsi. Yamanabetari David: “Pabati Tosorintsi, jirai iquemisantimi Jacob. Obiro Itosorintsite. Yamai nocoguini nobetsiquëmiro caninaro pobango irorai ora pintimantima”. ⁴⁷Carari te irobetsiquineri David. Saromón itomi

yobetsiquëneri ibango. ⁴⁸Carari Tosorintsi jonoquënintaberi teni intime pongotsiquë ora yobetsiquë matsiguenga. Aroque icanque comantantatsiri:

⁴⁹Icanë Tosorintsi: “Ora Jonogaguitequë iroro nisobiganta, cagaro yaca quibatsica. ¿Ati pinganquinaro pobetsiquinaro nobango? ¿Nega nomagoriaque? ⁵⁰¿Teco Naro obetsiquërone antagaisati?”

⁵¹Te pinguenganeintasëretima obirojegui. Aisati picantari ibega basiniati matsiguenga te irogótiri Tosorintsi. Te pinguemiri Tosorintsi, teatisati pinguemisantiri. Përosati pipëgatsataro Isëre Caninaro. Picantari ibega ira picharineegui ipëgatsataro cara jirai. ⁵²¿Aintaca paniro comantantatsiri te inguisaneintiri picharineegui? Teni. Yogamagaiguëri antagaisati ira comantantatsiri icanque iribocapë Ira Caninarisonori. Yamai aroque ipogopë Iriro Jesoquisirito, págagantaiguëri pógaiguëri obirojegui. ⁵³Teni pinguemisantiro Irinibare Tosorintsi obirojegui ora yogometaguëmi ironomire.

Aroque inibatë Isiteban. Itsonquero.

⁵⁴Cara iquemaigabaquero irinibare Isiteban oshabitapëri iraneingomentoquë iguisaneintasantanëri itingomiegui jorío, itsicaguitenatanëri. ⁵⁵Aro pinancari Isiteban Isëre Tosorintsi, inetsë jonoquë iniaqueri ironomire Tosorintsi. Aisati iniaqueri Jesus yaratingasegui ibacosonoriquë Tosorintsi. ⁵⁶Icanque Isiteban:

—iPinetsaigue! Canta Jonogaguitequë naniaqueri Jesus Ira paniacha Jonogaguitequë otsomaaqueri iniro jirai, imatsiguengatasantapë. Naniaqueri yaratianque ibacosonoriquë Tosorintsi.

⁵⁷Aro yamai catsigue icaimë itingomi joríojegui ishapiguemitatanaca isigasipari yágaiguëri. ⁵⁸Yágaiganaqueri sotoquë Jerosarén, ibasiaqueri mopèquë. Ira comantëgotëri Isiteban ijocaiganaquero iguitsagare iguitiquë Saoro oboina sërari omisantëneri iguitsagare. ⁵⁹Iroontita ibasegaseguiri, yamanaque Isiteban icanque:

—Jesús Natingomi, págobënaró nasëre.

⁶⁰Yobaticagueritoca, icaimë catsigue yamanocotajiri ira basiaqueri:

—Natingomi, quero poguibitacaiguiri oca icantagueiguëna icaegui ora te onganinate.

Aroque icanque Isiteban negaca, irooti icamantaca.

Inetsëri Saoro icanque:

—Caninataque. Icamaque yamai.

Iáiguë quemisantatsiri canta Samariaquë.

8 ¹Irooti catagüiteri iparintaigaca joríojegui icantaguequeri catsimari ira botoibiritari Jesoquisito canta Jerosarénquë. Iátagueque antagaisati, isigaiganaca Joreaquë aisati Samariaquë. Irinibani inaiuguënguitsi Jerosarénquë iragátane Jesús. ²Ainta matsiguenga quemisantasantëri Tosorintsi itiaiguëri Isiteban tojai iracoqueri. ³Iriroque Saoro përosati icantaguequeri catsimari ira botoibiritari Quirisito. Icoqabeta iritsongauguërimë. Icanaque ibangopaguequë quemisantatsiri yágapëri inosicanëri sërari aisati tsinane, yomianqueri cara iromingamentoquë.

Iquemisanque ira timatsi basiniquë poeboro.

⁴Ira quemisantatsi iátagueque icomantobaguecaro Irinibare Tosorintsi.

⁵Jeripe omitocontatsiri yareca

Samariaquë. Icomantëgotapëri Jesoquisito. ⁶Yapatoica matsiguenga iquemaigabaqueri Jeripe ora icomantaguepëri aisa iniaigabaqueri cara itasongampë. ⁷Yogabisaicotajiri tojai matsiguenga ira inanca camagari. Icaimaiguë camagarijegui cara isotocaiganaji. Aisati yoguibiaguetajiri tojai emëngari aisati tarancaratsi. ⁸Irooti icaninasëretanagana antagaisati Samariasati.

⁹⁻¹¹Cara poeboroquë ainta sërari jítacha Simón. Jirai iriro matsi. Itasongabitaca. Aisati yamatobitaiguëri tojai matsiguenga tojai osarini. Ijitaiguëri iriro itingomi. Antagaisati matsiguenga iquemisanqueri. Iquenganeintasantanëri icantocotaiguëri icanque:

—Itasonganti Simón. ¿Iriromë tosoncaguiri Tosorintsi? Intsome antingomintimari.

¹²Aro ipogopë Jeripe icomantaguetiri matsiguenga Irinibare Tosorintsi aisa ati ocanta iragántane Tosorintsi. Aisati icomantëgotëri Jesoquisito. Ibaotisataigapëri ira quemisantaiguëri Jesús, sërari aisati tsinane. ¹³Simón aisati iquemisanque ibaotisataca yoguiatëri Jeripe. Iquenganeintasantanaca Simón cara itasonganti Jeripe.

¹⁴Përosati ini iragátane Jesús Jerosarénquë. Cara iquemocotaigabaqueri ira Samariasati cara aisati iquemisanqueri Jesús, aro igáiguëri Perero aisati Joan. ¹⁵Iáiguë canta. Yamanocotaigapëri Samariasati cara coshoni oganëri Isëre Caninaro Tosorintsi, ¹⁶terainta iroguineri Tosorintsi Isëre iriroquë. Patiro ibaotisabiritabecari Atingomi Jesús. ¹⁷Aro Perero aisati Joan oguëneri ibaco iguitojeguiquë, yágasëretobëro Isëre Tosorintsi pinampari.

¹⁸⁻¹⁹Cara iniaqueri Simón icabëri ira Perero:

—Jerica quirequi. Nocoguini pogometajinaro natasonganqueni naro nangantimi pibega obiro cara pitasanganti. Nocoguini noguëroca nobaco matsiguengaquë irágasëretanti-maró Isëre Tosorintsi iriro.

²⁰Icanqueri Peroro:

—Pijáte Sharincabeniquë aisati páganëri piguireguité. Pijitasica obiro pomanantëro itasorintsite Tosorintsi.

²¹Teni pingantina nibega naro. Igóquimi Tosorintsi te onganinate paneingomento.

²²Te onganinate ora piquengasëretabita-taca. Pingantajima yacaqueroca pijoqui ora picantagueti te onganinate. Pomaniri Tosorintsi ingábintsaimi, irojocajimirota ora picantagueti te ongomeite. ²³Nigóquimi pomichatasantini, picoguini iraniacaninataiguemi matsiguenga. Aroque pagobiaquemi yamaica ora picantagueti quimingaro.

²⁴Yotabitanëri Simón:

—Pomanocotina naro querota niáti Sharincabeniquë.

²⁵Aique Peroro aisati Joan icomantanquero Irinibare Atingomi, iquenguitsatocotiro. Iquenaguetané poeboropaguequë cara Samariaquë, icampëri:

—Aroca pinguemisanqueri Jesus, aro irojocajimiro Tosorintsi ora picantagueti te onganinate, iragabisaicotajimi.

Cara itsonquero icomantaguequeri ira Samariasati, ipiganaja cara Jerosarénquë.

Iquemisanque Etiopíasati.

²⁶Irisaanganetsite Tosorintsi iconijatomopëri Jeripe icampëri:

—Pingabiritanëma pijáte irooti poeboroquë jitacha Gasa. Pinguenaque abatsiquë paniacha Jerosarénquë oquenaque piriabatsariquë.

²⁷Aito icabiritanaca Jeripe iáque. Itonguibocari matsiguenga paniacha

Etiopíaquë irágaguitsotaga. Iriro otingomibintë Cantase. Iroro tsinane itingomi Etiopíasati. Yomisantënero oguireguité. Iquemocoqueri Tosorintsi iriro, iátasiqueri canta Jerosarénquë, icoque irogótiri Tosorintsi. ²⁸Yamai ipigaa isobiaque iriscómentoquë inibataseguero isanguenare Isaías, comantantatsiri cara jerai. ²⁹Iroro Isëre Tosorintsi cantëri Jeripe:

—Pijáte pitonguibotobëmari iriscómentoquë.

³⁰Isigopa Jeripe itonguibocaro iquemaqueri inibatëro isanguenare Isaías. Yosamitapëri:

—¿Piquemaquero Sanguenari?

³¹Yotabitanëri:

—Teni nanguemiro tenta irine ira ogomequenarone. Potetima pisobigopë yaca pogomepëna obiro.

³²Aro isobigopë Jeripe. Ora Sanguenari inibatasegui ocanti:

Cara imaireti itiomijani oisha cara yapeitiri, aisa icanta Quirisito imaireti, te irinibate cara ira quisaneinqueri yáganëri yogamagaiguëri aisa icantari ibega oisha cara yogamaguiri.

³³Yógasitacari catsimari. Quero ini itomi aroquenta yóguëri.

³⁴Yosamitobëri Jeripe Etiopíasati:

—Nocoguini pingomantina ¿Pairi isanguenatocoque comantantatsiri? ¿Iriatico comantëgotacha? ¿Basinico iquenguitsatocoti?

³⁵Aito iparintaca Jeripe icomantasantëri ora inibatasegui Sanguenariquë. Icomantëgotëri Jesus. ³⁶Iátocoque abatsiquë irooti cara yarecaro nija. Yosamitëri Etiopíasati icanqueri: —Iroro nija oca. ¿Caninataque nomaotisatëma?

³⁷Icanqueri Jeripe:

—Piquemisantasantirica Quirisito, caninataque pomaotisatëma.

Yotabitanëri:

—Jee, naquemisantasantiri

Jesoquisiriso Iriro Itomi Tosorintsi.

³⁸Yogaratianquero irisícómento. Aito yaguëtanë pitirooti itsibatanaçari cara nijaaquë. Ibaotisatëri Etiopíasati Jeripe.

³⁹Ipiganaça irisícómentoquë. Aito isaanganë Jeripe, páganëri Isëre Tosorintsi. Te iraniobairi Etiopíasati. Paniro iátaji icaninasëretanë. ⁴⁰Iriroque Jeripe iconijapë poeboroquë jitacha Asoto. Yogaganaca cara Asotoquë irooti poeboropaguequë. Icomantëgotaguequeri Jesus icanque:

—Pinguemisantiri Jesus, aro iragabisaicotajimi Tosorintsi.

Irooti, cara yareca Sesareaquë.

Ipasiniatitanai Saoro.

9 ¹Përosati ainta Saoro Jerosarénquë isariacari irócaiguëri antagaisati ira quemisantaiguëri Atingomi Jesoquisiriso. Iroro iátaguëque iraniaqueri itingomi saseriroti.

²Yamanopëri icampëri:

—Nocoquini pomena pisanguenare.

Náganëneri canta Tamásicoquë, nomëri ira obatacaguiri jorío cara yapatotaigaca. Pisanguenatinaro pingantiro negaca: “Pomitocotiri Saoro iráguiri antagaisati ira quemisanqueri Jesus, sërari, tsinane, omagaro. Iromapëri yaca Jerosarénquëça”.

Aro isanguenaquineri. ³Aique iáque Saoro. Pënibaque irarequimaro yomángue cara iroquito iniobëro Saoro tamásueguitetocopëri Tosorintsi.

⁴Ipariganë quibatsiquë, iquemobëro irinibare Jesus:

—Saoro, Saoro, ¿Pairo picantobiquinaro catsimari?

⁵Yotabitanëri Saoro:

—¿Pairo pijita, Natingomi?

—Naanti Jesus Ira piguisaneinti.

Obiro aisa picantari sërari baaca cara

imeratëmanica iripasaqueri casintari.

Ira baaca iragaitguitetabequimari carari iratsipiriopiantë. Aisati obiati casitígatacha cara piguisaneinquina.

⁶Istoroganë Saoro imogomogootanaca, icanë:

—Natingomi ¿Pairo picogui nanganque naro?

Aro icanëri Jesus:

—Pingabiritima pijáte Tamásicoquë. Canta, nongomantëmiro ora pinganque.

⁷Ira sërari itsibataigapa Saoro iquenganeintaiganaca. Iquemasicaro irinibare, carari te iraneiri ira nibaquenguitsi. ⁸Icabiritanaca Saoro yoquiriabetanaa, te iraniaje. Icatsatanëri ibacoquë irooti Tamásicoquë. ⁹Canta, yogabisë maba cataguiteri te iranee, te irapae, teatisa iróguima nija.

¹⁰Ainta Tamásicoquë quemisantatsiri jitacha Ananías. Iconijatomopëri Atingomi icaimapëri:

—iAnanías!

Yotabitanëri Ananías:

—¿Pairo, Natingomi? Aintana naro yaca.

¹¹Icampëri Atingomi:

—Pingabiritima, pijáte cara abatsiquë ora catinapoquiri. Cara ibangoquë Joras pingoquiri sërari jitacha Saoro ira Tárisosati. Ainta yamai yamanini.

¹²Aroque noniaguëri cantaca quisanitagantsi carari te irisome, iniaquemi obiro pinganaque poguineri pobaco iriroquë arota iranianae.

¹³Icanqueri Ananías:

—Tojai naquemocoqueri ira picomantëna yamai. Icantobiqueri catsimari ira quemisantaiguimi canta Jerosarénquë. ¹⁴Aisati naquemocoqueri cara igáqueri yaca itingomi saseriroti irágaiguëna antagaisati ira abentaiguë mira.

¹⁵Icanëri Atingomi:

—Pijáte. Aroque nocoiguëri ingomantëgotina joríojeguiquë, aisati

basiniatiegui matsiguenga, aisati itingomieguiquë. ¹⁶Aisati noniaguëri cara tojai iratsipiriobiquina.

¹⁷Aique iáque Ananías. Icapë pongotsiquë cara inasegui Saoro yoguëneri ibaco, icampëri:

—Saoro, yamai obiro nopiguemisan-tane. Igáquina Atingomi Jesus ira conijataequimi cara abatsiquë cara piquenopë. Igáquina cara aisati naniacagajimi, aisati inampëmi Isëre Caninaro Tosorintsi.

¹⁸Aito cara oparibentaguitanai ora iroquiquëti cantacha simabentaqui inatabecari, aro iniasantanai. Icabiritanaca Saoro ibaotisataca.

¹⁹Aisati yapasanotanai, isintsitanai. Arosataanti cataguiteri itimotaiguëri quemisantatsiri canta Tamásicoquë.

²⁰Aique icomantëgotëri Jesus pongotsiquë cara yapatoita joríojegui. Icanque Saoro:

—Jesus Irianti Itomi Tosorintsi.

²¹Iquenganeintasantaiganaca antagaisati ira quemaiguëri. Yosaminatobagaigaca:

—¿Teco iriro tsongaiguërinime ira quemisantatsiri Jerosarénquë? ¿Teco iriro boquënguitsi yaca iraguëshotaguë rime ira quemisantiri Jesus, irágaigana-querime itingomiquë saserirotijegui?

²²Aiquero otojaiganaque icomantëgo-tasantëri Jesus Saoro. Iquenganeintasan-taiganaca joríojegui Tamásicosati cara igótacagasantaiguëri Saoro. Icanqueri:

—Aisonori Iriro Jesus Agabisaicoonta-siri. Ipaniaca Jonogaguitequë. Igáqueri Tosorintsi.

²³Pabisanaque cataguiteri tojai. Iquengaigaca joríojegui iróguirime Saoro. ²⁴Carari Saoro iquemocoqueri. Antagaisati cataguiteriquë aisati tsitiniriquë imaguëtabecari jorío cara omoroquë poeboro. Icoagaigabitacari Saoro irágobëri irógaiguëri.

²⁵Carari tsitiniriquë ira quemisantatsiri yotequeri Saoro oquibequë cantiri yoguëtocoqueri sotoquë oticoro irooti osobinta. Isiganaca. Carari te iraniobairi jorío. ²⁶Yaretaja Saoro canta Jerosarénquë. Icogabeca intsibatima-rime quemisantatsiri. Iriro te iraninte, itsorogobëtiguiri. Ijitasicari te inguemisante.

²⁷Carari yáganëri Saoro Berinabë catingasati iragátanequë Jesus inibabenqueri. Icomantëgotaguequeri Saoro cara abatsiquë inioberí Atingomi inibatobëri ipasiniatitanai Saoro. Aisati Tamásicoquë iquenguitsatocotasantëri Jesus. ²⁸Yamai itsibataigari quemisanta-tsiri cara Jerosarénquë. Perosati iquenguitsatocotasantëri Jesus. Te intsorogue Saoro. ²⁹Icomantaiguëri joríopague ira nibatatsi guiriego. Ipëgatsacari icogabeca jorío irógaiguerime Saoro. ³⁰Cara iquemocoquero quemisanta-tsiri, yágaiganaqueri Saoro irooti Sesáreaquë. Aique yogabisëri Tárisoquë.

Itasonganque Peroro.

³¹Aique caninasati yapatoibiritari Jesus canta Joreaquë, Garireaquë, aisa Samariaquë. Iquemisantasantaiguëri Atingomi. Iniacobeingataigacari. Itojaiganaque quemisantatsiri.

Poganinasëretaiguëri Isëre Tosorintsi. ³²Iquenaguetanë Peroro basinipaguequë poeboro imitocotaiguëri quemisanta-tsiri, yareca Iriraquë. ³³Canta, ainta matsiguenga jitacha Eneas inasegui irisomamintuquë. Iriro emëngari, te iranëite ocarati 8 osarini. ³⁴Icampëri Peroro:

—Eneas, iragaguibegajimini Jesoquisito. Pingabiritima pobetsicanëro pisamamento.

Aito cara icabiritanaca yanëitanai. ³⁵Iniaiguëri antagaisati Iriarasati aisa Sarósati iquemisantaiguëri Atingomi.

³⁶Cara basiniquè poeboro jitacha Jope otimabeta tsinane quemisantatsiri ojita Tabita ora ocanti maniro. Iroso caninaro. Përosati omitocotaguetiri otimanamitane. ³⁷Aro ojanaitè Tabita ocamaque. Paquibatëro ogamaga poguëro jonoquè pongotsi cara pini sitomencorentsi. ³⁸Iquemocoqueri ira Peroro. Ira Jopesati igáqueri pite sërari ingaimëntiri Peroro cara Iriraquè ocosamanisatanè. Icampëri:

—Omanapague popogopë.

³⁹Aro yoguiatëri Peroro omanapague itencari. Yáganëri jonoquè cara pinasegui ogamaga Tabita. Oshongabocaro antagaisati ora ogamaimentaga piraicoquero Tabita. Poniagaigabaqueri Peroro oguitsagare-pague ocantaigabaqueri:

—Pinetsero oca. Cara terai ongame Tabita pobetsiquinaro antagaisati ocapague.

⁴⁰Yomisotocaiguëro antagaisati Peroro, yobaticagueritopa yamanocopëro. Aique inetsëro ogamaga icampëro:

—iTabita, pingabiritima!

Aro poquirianai, onetsëri Peroro, pisobicanè. ⁴¹Yágobagotairo Peroro icabiriquero, icaimaigairi quemisantatsiri aisati ogamaimentaga.

Yoniagaigairi Tabita cara ocaniatanai.

⁴²Aro iquemocotaiguëro antagaisati Jopesati. Tojai matsiguenga iquemisanqueri Atingomi. ⁴³Cara Jopequè itimaque Peroro tojai cataguiteri ibangoquè Simón masitsiberi.

Iquemisanque Coronerio itingomi soraro icarati 100.

10 ¹Canta Sesáreaquè ainta sërari jitacha Coronerio. Iroso capitán itingomi soraro icarati 100 Itariasati.

²Iquemisantantiri Tosorintsi aisati

iniacobeingacari. Aisati imatsiguenga quemisantatsi. Tojai imitocoiguëri matsiguenga icábintsaiguëri. Përosati cara yamanopianti. ³Aroque ochapinitanè cara iconijatompëri ironomire Tosorintsi irisaanganetsite icampëri:

—Coronerio.

⁴Inetsëntobëri Coronerio itsorogasantanëri yosamitobëri:

—¿Pairo ojita, Natingomi?

Icampëri:

—Iquemaquemi Tosorintsi cara pamanopiantëri. Aisati iniaquemi cara pomitocoiguiri matsiguenga. ⁵Yamai pigátiri matsiguenga cara Jopequè ingaimëntiri Simón, aisati ijita Peroro. ⁶Itimi ibangoquè isometi Simón ira masitsiberi. Aiti ibango onamijaquè angaare. Iroso cantëmine ora pinganque.

⁷Cara isaanganai ironomire Tosorintsi ira comantapëri Coronerio, icaimè pite iromeraro aisati paniro isorarote, maba quemisantiri Tosorintsi. ⁸Icomantague-queri antagaisati ora iniaque, igáqueri Jopequè. ⁹Itimanè abatsiquè. Oquëtaguetamananaque iquenaque irooti catinga. Pënibaque irarequima Jopequè. Itanè Peroro jonoquè pongotsiquè yamanaque. ¹⁰Itasegasantè icoque irape Peroro. Iroontita osobira pobetsiquëro perintsi tsinane, iniobëro Peroro ora cantaca quisanitagantsi igaguitaga iriro. ¹¹Jonoquè yamanasegui Peroro iniabetobacaro paguëpë oquibemaronca tocoya yoguëshotaguequero Tosorintsi yoguëtopiantëro. ¹²Ainta yoguëtoco-queri pairiraca quimingaripague:

chancho, marangue, saniri, paguitsa, tiso, antagaisati ijiqueri quimigari jorójegui. ¹³Aisati Peroro iquemobëro Irinibare Tosorintsi. Ocampëri:

—Pingabiritima, Peroro. Póguiri pijagueri.

¹⁴Carari yotabitanëri Peroro:

—Quero naaguiri, Natingomi, irianti quimingari.

¹⁵Aisati icanqueri:

—Ira noguëtetai Naro, quero pijitiri quimingari obiro.

¹⁶Aro pipiganaja tocoya jonoquë, paguëtopiantë, mabataque iniojëro Peroro paguëque aro pogainocanaca.

¹⁷Iroontita iquianquero Peroro ora iniaque aisati ora iquemobë, yaretaigaca maba sërari iragátane Coronerio. Yosamitëcobempëri nega itimi Simón. Yaretaigapa omoroquë ibango.

¹⁸Icaimapëri yosamitapëri:

—¿Aro itimi Simón yaca aisati ijita Peroro?

¹⁹Përosati cara iquianca Peroro, aro ocomantëri Isëre Tosorintsi:

—Pinetse ainta maba sërari icoguimini. ²⁰Pingabiritima piguëtanë piguiatanëri aroquenta nigáquemiri Naro. Quero pitsoingui.

²¹Yaguëtanë Peroro icabëri sërari:

—Naro picogaigui. ¿Pairo pipocasiti?

²²Yotabitaiganaqueri:

—Nopaniaca Sesáreaquë. Igátaiguëna Coronerio, igapitante isorarote icarati 100. Iriro caninari. Iniacobeingacari Tosorintsi. Aisati iniacaninatëri iriro joríojegui. Cani iconijatomoqueri ironomire Tosorintsi icanqueri: “Yamai pigátiri matsiguenga iromapëri yaca pobangoquë ira Simón aisati ijita Peroro. Pinguemisantiri cara ingomantëmiro Irinibare Tosorintsi”.

²³Icabëri Peroro:

—Pingapë. Yamai pintimopë yaca. Naramani naguiatëmi.

Oquëtaguetanë iáiguë Peroro, iromeraro Coronerio, aisati itsibataigacari quemisantatsiri. ²⁴Otsitinitanë, oquëtaguetanai yaretaigaca Sesáreaquë. Ainta Coronerio aroque yapatotaiguëri ibangoquë tojai imatsiguenga aisati

itimanamitane. ²⁵Icapë Peroro, yobetsatobacari Coronerio yobaticague-ritotasitobacari. ²⁶Icabiriqueri Peroro icanqueri:

—Pingabiritima. Cagarina naro Tosorintsi. Naanti matsiguenga aisa nacanta pibega obiro.

²⁷Inibatobaca pitirooti, icapë Peroro iniopëri tojai matsiguenga botoitachari. ²⁸Icantaigapëri:

—Naro jorío. Pigóigui obirojegui te iranintacaguina nomatsiguenga nantsibatimari basinati matsiguenga. Teni iraninte naniaiguemi. Carari yogomequinaro Tosorintsi cara quero najitajiri pairiraca quimingari. ²⁹Iroro nipoguëpë omanapague cara picaimagantëna. Yamai nosamitapëmi, ¿Pairo picaimagantobiquina?

³⁰Yotabitanëri Coronerio:

—Cani otsibasati cataguiteri aroque ochapinitanë canoca namanaque yaca nobangoquë, aro naniobëri matsiguenga iquitsagataro catarisonori iguitsagare.

³¹Icampëna: “Coronerio, iquemaquemi Tosorintsi cara pamaniri. Aisati iniaquemi cara pomitocoiguiri matsiguenga. ³²Yamai canta Jopequë pingaimagantiri Simón aisati ijita Peroro. Itiomoqueri basini Simón ira masitsiberi timatsi onamijaquë angaare”. ³³Aito cara nigáqueri nomeraro ingaimëntimi. Yamai caninataque cara pipogopë. Ainta napatoitomocari Tosorintsi. Nocogaiguini yamai pingomantaigapë naro pairoraca igáquemi Atingomi.

³⁴Aique iparintaca inibatë Peroro icanqueri:

—Yamai nigótasantë aisonori Tosorintsi te ingasiriconiatitiri matsiguenga antagaisatinta aisati icantaiga nibegaiga naro. ³⁵Pairiraca niacobeingatiri quemisanqueri Tosorintsi aisati icantaguequero ora caninaro, aro

iraniacananatèri Tosorintsi. ³⁶Naro jorío. Pigócotobèro Irinibare Tosorintsi. Yoguibaiguènaro Irinibare icomantaiguèna: “Aroca pinguemisantai-guèri Jesoquirisito caninasati pintimaiguè”. Aitosati pingantina nibiaca naro yamai Irironta Jesoquirisito Itingomi antagaisati matsiguenga. ³⁷Piquemocotaigabaquero ora icanque Jesus. Aroqueque Joan iquenguitsatoco-queri: “Pomaotisabiritimari Quirisito”. Aique iparintaca Jesoquirisito icomantaguequeri Garireaque irooti antagaisati-què Jorea. ³⁸Pigócotobèri Jesus Nasaresati, ati icantacacari. Imitocoqueri Jesus Tosorintsi. Ipasèrequeri Isère aisati ipèri itasorintsite. Irooti iátagueantaca icantaguequero caninaro aisati irooti yoguibegantacari ira inanca camagari, imitocoquerininta Tosorintsi coshoni yoganèri Jesus. ³⁹Naroegui iragátane Jesus naniaiguèri antagaisati ora icantagueque Jesus iboeborotepaguequè nomatsiguenga aisati canta Jerosarénquè. Aisati naniaiguèri cara yógaiguèri, ipèicotaiguèri corosiquè. ⁴⁰Maba cataguiteri itinaajiri Tosorintsi yoganiatairi yoniagainari. ⁴¹Te ironijagajimari basini matsiguenga, naantijegui yoniagaa. Naroegui icoigaiguè naniaigairinta cara icaniatai Jesus. Aroque icamasantabitaca, icaniatanai, napaagobairi aisati nógagobaari. ⁴²Igáquina nongomantaguequeri matsiguenga: “Yoguèri Jesus Tosorintsi arota ingomantègotìri antagaisati matsiguenga pairoraca inganque aisati negaraca iriáiguè, ira caniari aisa ira camatsi”. ⁴³Jirai icomantègotèri Jesoquirisito antagaisati comantantatsiri icanque: “Pairiraca quemisanquerine Jesus aro ingábintsairi Tosorintsi irojocajineri ora icantagueti te ongomeite, quero iquengaineri aisati”.

⁴⁴Irootita inibatasegui Perero, aro pipocasipèri Isère Tosorintsi pinantaiga-pari antagaisati ira quemisanquero irinibare Perero. ⁴⁵Aro iquenganeintasan-tanaca ira jorío quemisantatsiri itsibatapa Perero. Yamai igóque aisati ipèri Isère Tosorintsi ira basiniati matsiguenga cagari jorío. ⁴⁶Iquenganeintasantacari iquemaiguèrinta imatsiguenga Coronerio aisati inibataiguè basiniati nibarintsi. Icantaguè:

—Caninari Tosorintsi.

Aro icanti Perero:

⁴⁷—Yágasèretai-guèro Isère Tosorintsi aisa icantaiguèna nibega naro jirai. ¿Teco caninataque imaotísataiguèma?

Icanque jorío ira itsibatapa Perero:

—Jee, caninataque.

⁴⁸Aro ira Perero icanqueri imatsiguenga Coronerio:

—Pomaotísatobitaiguemari

Jesoquirisito, ora irogóontaiguèmi matsiguenga cara piquemisantiri Quirisito. Yotabanèri:

—Aro pomaotísataiguena.

Ibaotísatobitaigacari Quirisito. Aique yamanaqueri Coronerio:

—Pintiomopèna arosataanti

cataguiteri pogometaigapèna.

Iquemocoqueri Jerosaresati cara quemisanque basiniati matsiguenga.

11 ¹Canta Jerosarénquè iragátane Jesus aisati basini quemisantatsiri iquemocoqueri cara aroque quemisanqueri Jesus basiniati matsiguenga ira cagari jorío. ²Cara itonganaji Perero ipigapaa Jerosarénquè, iguisabiritobèri jorío ira quemisantatsi aisati ijique caninataque iritotima basiniati matsiguenga cara inguemisanque. ³Yosamitaigabaqueri: —¿Pairo piábirique canta basiniatiqué matsiguenga? ¿Pairo papaagobiqueri? Picanquero ora te onganinate.

⁴Aique Perero iquenguitsatomotaiga-përi antagaisati, icampëri:

⁵—Ainta ninasegui naro Jopequë. Namanasegui cara naniobëro ora cantacha quisanitagantsi. Oquenopë Jonogaguitequë paguëpë oquibemaronca tocoya yoguëshotague-
quero Tosorintsi yoguëquinaro.
⁶Nanetsasantobëro. Ainta tso magui pairiraca quimingaripague: chancho, marangue, secari, tiso — antagaisati najiqueri quimingari. ⁷Aisati naquemobëri Tosorintsi icanquina: “Pingabiritima, Perero. Póguiri pijagueri”. ⁸Nacanë naro: “Quero naaguiri, Natingomi, irianti quimingari”. ⁹Icantajina aisati Tosorintsi: “Ira noguëtetai Naro, quero pijitiri quimingari”. ¹⁰Mabataque yogatsitainaro, aro pogainocanaa Jonogaguitequë. ¹¹Aito cara yarepa maba sërari pongotsiquë cara natimaque. Ipaniaca Sesáreaquë icampë: “Igáitënanani”. ¹²Pigáquina Isère Tosorintsi: “Piguiatanëri. Quero pitsoingui”. Aro niáque. Aisati yoguiataiguëna ica nopiguemisananeca icarati 6. Nacai gapë ibangoquë ira cajemacagantëna. ¹³Icomantaguetobëna cara iconijatomoqueri ironomire Tosorintsi icampëri: “Pigátiri matsiguenga Jopequë ingaimëntiri Simón aisati ijita Perero iribocapë yaca. ¹⁴Ingomantëmiroti Irinibare Tosorintsi pabisaicoontëma obiro aisati pomatsiguenga pobangoquë”. ¹⁵Cara noparintaca nocomantaguetagapëri, aro pipocasipëri Isère Tosorintsi pinampari aisa icanquina nibega narogui cara pipocasipëna jirai. ¹⁶Naquianquero ora icomantacái jirai Atingomi icanque: “Iroro nija ibaotisantanta Joan, carari obirojegui iroquemiro Isère Tosorintsi Caninaro”. ¹⁷Jirai cara aquemisantai-guëri Atingomi Jesoquisito ipaigacáiro

igacáiro Isère Tosorintsi. Yamai aisati ipaiguëri Isère basiniati matsiguenga. ¿Pairo najica naro cara nopëgatsaqui-mari Tosorintsi?

¹⁸Iquemaigabaquero irinibare Perero quemisantatsi Jerosaresati, te irinaje yamai pëgatsatimarine Perero. Iroonti icantaiguë:

—Iriro caninari Tosorintsi. Aisonori icoigaiguëri aisati basiniati matsiguenga imasiniatitanae ora iriátantajima Jonogaguitequë.

Yogomeque Berinabé aisa Saoro Antioquíaquë.

¹⁹Aroqueque yogamagaiguëri Isiteban, iparintaigaca icantobiqueri catsimari ira quemisantiri Quirisito. Isiaguetanaca canta jaanta irooti Jenisiaquë, aique Chípirequë, aisati irooti Antioquíaquë. Íatagueque icomantëgotëri Jesus. Paniro iquenguitsatomotaguepëri joríojegui.

²⁰Yaretaigaca Antioquíaquë matsiguenga ipaniaca Chípirequë aintasa ipaniaca Sirenequë. Icomantaigapëri matsiguenga guiriego, cagari jorío. Icomantëgotëri Jesus: —Pinguemisantiri Jesus iragabisaico-tajimi.

²¹Imitocotasantëri Tosorintsi, aro iquemisantacaqueri tojai matsiguenga cagari jorío, yabentaigacari Atingomi. ²²Ira botoibiritari Quirisito canta Jerosarënuë iquemocotaiguëri, igáqueri Berinabé Antioquíaquë.

²³Yareca Berinabé iniopëri irirai quemisantatsi, igópëri icábintsaiguëri Tosorintsi. Icaninasëretapë, icampëri: —Coshoni poganëri Atingomi. Quero pomaguisantiri. Pinguemisantasantanëri.

²⁴Iriro caninari Berinabé. Iquemisantasanotiri Atingomi, aisati pinancari Isère Tosorintsi. Iroro ora aiquero itojaigaguëtanë quemisantatsiri.

²⁵⁻²⁶Aique íaque Berinabé cara Tárisoquë íatasiqueri Saoro. Iniaqueri, yáganairi cara Antioquíaquë. Patiro osarini itimaque pitirooti Berinabé aisati Saoro yogomequeri ira botoibiritari Quirisito. Arosonori matsiguenga ira yogomeque. Cara Antioquíaquë ira quemisantiri Quirisito iritsita jitaiguënguicha quirisitano, ira iraisati Quirisito.

²⁷Iroontita yogometaigaseguri matsiguenga Berinabé aisati Saoro, ipogaigapë basini comantantatsiri ipaniaca Jerosarénquë. ²⁸Paniro ijita Agabo yaratingopë aganguisatiquë ira quemisantatsiri. Ora Isëre Tosorintsi ocantacaqueri Agabo icampë coraque opoque cara iritasegasanoigüë tojai matsiguenga omagaroguitequë. Aro ocanca cara itingomibintanti itingomi jitacha Caraorio. ²⁹Aique ira quemisantatsiri Antioquíaquë iquengaigaca imagantaigüeri quirequi irapiguemisantane canta Jerosarénquë. Ira casintachari ipëri tojai, ira te irine tojai iguireguita ipëri arosata. ³⁰Aro ipagantëri canta Jerosarénquë. Yáganëri Saoro aisa Berinabé. Ipëri ira omisantiri irapiguemisantane.

Eroris yomianqueri Peroro.

12 ¹Ainta itingomi ijita Eroris canta Jerosarénquë yágagantëri atiraca icarati ira quemisantatsiri, cara ingantaguequeri ora catsimari. ²Yobatëantacari sabiri ira Santiago ireinti Joan. ³Cara yoganinasëretaiga joríojegui, asiati Eroris yágagantëri Peroro. ⁴Yágagantëri cara yapaisiguero pan joríojegui ora te ingonaguero piponganta. Oca jiesita jitacha Pásicoa. Aroque yágagantëri Peroro, Eroris yomianqueri iromingamentoquë. Ainta soraro yomisantëri icarati itsibasati coniamaniquë. Ainta basini itsibasati

catingaquë. Basini irirai itsibasati soraro chopiniquë, aisa basini itsibasati aganguite. Icogabeca Eroris aroca abisanaque Pásicoa iráganëri Peroro cara yapatoita matsiguenga ironijagantë rime. Icogabeca Eroris iranetsaiguëri matsiguenga cara iragamaguëri Peroro. ⁵Ainta Peroro iromingamentoquë Eroris. Yomisantëri soraro. Ira quemisantatsiri botoibiritari Jesus yamanocobintantëri Peroro.

Yomisotacajiri Peroro Tosorintsi.

⁶Irooti tsitiniriquë cara queroquerei yoniaguiri Eroris matsiguengaquë isamasigui Peroro yoguëshosigaro pite sogatsa coshori. Icarasiguiri pite soraro, poro ibacosonoriquë poro imatequë. Ainta basini pite soraro omoroquë. ⁷Iriguito iconijapë irisaanganetsite Tosorintsi yogonijaguitepëro tsomagui, icabocapëri Peroro icampëri:

—Pingaguite pingabiritima yamaica.

Aro otsaanaca ironeni ora yoguëshosiga ibacoquë aisa iguitiquë.

⁸Aisati icampëri ironomire:

—Pomatsaguitima coshooti pomanchaquiquë. Poguimari pisapatote.

Aro icanquero Peroro. Icanai irisaanganetsite Tosorintsi:

—Pogaimaro pomanchaqui ora pobicota. Intsome, piguiatanëna.

⁹Isotocanë Peroro yoguiatanëri ironomire Tosorintsi. Te irogóte iroroca aisonari ora icanque irisaanganetsite, iquisanitasicaroco.

¹⁰Yabisanaqueri soraro omoroquë, aique basini soraro, te iraniobairi. Yareparo oquibequë sitëcori coshori pasirianaca ironeni isotocanë Peroro. Yáganëri ironomire Tosorintsi irooti cara págaboquiobaga abatsi yoganairi isaanganai te iraniobairi. ¹¹Icanë Peroro iquenganaca:

—Yamai nigóque. Aisonori igáquinari ironomire Tosorintsi cara iromisotocajina iragabisaicotajina cara icogaigabitaca Eroris aisa jorfojegui iróguiname.

¹²Iquianca Perero, íáque cara obangoquë Maria iniro Joan. Joan aisati ijita Maricos. Cara, inaisigui tojai matsiguenga yamanaigasegui.

¹³⁻¹⁴Itaapëro sitëcori Perero ton ton ton. Pipogopë onamire María ojita Irore. Oquemobëri pigótsatobëri ora irinibare Perero ocaninasëretanë. Te osirecotiri. Pisiganëtiga tsoماغui ocomantaigapëri matsiguenga:

—iAinta Perero sotoquë!

¹⁵Icantaigabaquero matsiguenga:

—iTeni pineicotima!

Irore ocanatanë:

—Jee, aisonori iriro Perero.

Icantaiguë:

—Cagari Perero; irianti ironomire Tosorintsi omisantiri Perero.

¹⁶Iroontita inibatobagaigaca tsoماغui, përosati cara itaapiantëro Perero sitëcori. Cara yasirecoqueri iniobëri imabocacari. ¹⁷Icanaque Perero yacopëri imairetanë. Icomantapairi cara yomisotocajiri Atingomi. Icampëri:

—Pingomantiri Santiago aisati ira quemisantatsi.

Aique íáque Perero basiniquë pongotsi. Imánaca.

¹⁸Cara oquëtaguetanë itsorogaiganaque soraro cara icogabetajari Perero. ¹⁹Igáantairi Eroris ingogajiri. Te irinaje. Eroris yosamitasantëri isorarote ira omisantëri Perero. Te. Aro igáqueri basini soraro iróqueri ira omisantabitacari. Aique íáque Eroris cara Joreaquë irooti basiniquë poeboro jitacha Sesárea.

Icamaque Eroris.

²⁰Eroris iguisaneinqueri ira timaigatsi pitéquë poeboro jitacha Tiro aisa Sirón.

Iriroqueraiegui iquengaiganaca iromanaiguëri Eroris iraniacananatëri aronta opaniaca tojai iraperi iragáanta-nequë Eroris. Ipaigapëri quirequi ira Barásito iromeraro Eroris arota irinibabintëri caninasati. ²¹Iquengaigaca cara cataguitერიquë. Cara yaretaigaca matsiguenga, icanaquero Eroris imanchaqui caninari, isobiaque cara iragáantomentoquë inibataigapëri Tirosati aisa Sirósati. ²²Iparintanaca Tirosati aisa Sirósati icaimanë:

—Cagaro irinibare matsiguenga. Iroonti irinibare Tosorintsi.

²³Aito cara itsirishobitanacari Tosorintsi igáqueri insaanganetsite yoanaitëri Eroris tenta ingomantëgotima cara irianti matsiguenga cagari Tosorintsi. Aito cara yaaganaqueri isitsane icamaque.

²⁴Yamai otojaiganaque Irinibare Tosorintsi iquemaigabaquero omagaroguitequë. ²⁵Aroque itsonquero ora igáquengani Berinabé aisa Saoro cara Jerosarénquë, ipiganaja Antioquíaquë. Yáganëri Joan aisa ijita Maricos.

Iátagueque Paboro aisa Berinabé.

13 ¹Cara yapatoibiricari Jesoquisisito Antioquíaquë ainta comantantatsiri aisati ogameantatsiri. Ainta Berinabé aisa Saoro, Irosio Sirenesati, Simón aisati ijita Tsitari, aisa Manaem itsibatari Eroris itingomi cara iquibiaiganaque pitirooti. ²Cara yapatoibiricari Atingomi aisati cara ititaigaca ocanque Isère Caninaro Tosorintsi:

—Poguinari casiriconiati Berinabé aisa Saoro. Nacaimëriini nagáqueri ingomantagueantë Nanibare.

³Cara itsongaiguë yamanaiguë aisa itsongaiguë cara ititaiga, aro yogaiquëneri ibacojegui iguitoquë Saoro aisa iguitoquë Berinabé. Igátaiguëri.

⁴Aroqueque pigáiguèri pitirooti Isère Caninaro Tosorintsi, iáiguè Serosiaquè yotetaigapa oquibequè pitotsi iquenocoque irooti oboguesiquè jitacha Chípire. ⁵Yaretaigaca poeoroquè jitacha Saramina yaguètaigapè. Iparintaigapa icomantagueantapèro Irinibare Tosorintsi cara yapatotaiga joríojegui. Aisati itencari Joan Maricos imitocotaguètiri. ⁶Yogagaiganaca irooti poeoroquè jitacha Pajos. Iniaigapèri jorío jitacha Barajesos. Irro matsi, aisati comantantatsiri matobiantatsiri. ⁷Ira matsi itsibatacari tininti ijita Sérjio Paoro ogótatsiri. Ira tininti icaimagantaiguèri Berinabé aisa Saoro. Icoque inguemobèro Irinibare Tosorintsi. ⁸Ira matsi, aisati ijita Erimas, ipègatsatobacari tenta iranintacaguiri inguemisante tininti. ⁹Saoro, aisati ijita Paboro, inibatancari Isère Caninaro Tosorintsi. Inetsasantèri matsi, ¹⁰icanqueri:

—Obiro matobiantatsiri, cantagueta-tatsiri, aisa picantari ibega camagari, te pinintèmatiro ora aisonori nibarintsi. ¿Te pingaratèmate cara pitsoinguèro Irinibare Tosorintsi? ¹¹Yamaica ingasitgátèmini Tosorintsi pingomaraja-queri, cosamani quero piniajiro cataguiteri.

Aito cara icomarajatanè matsi. Itsitiniatanè iroquiquè. Icoque pairiraca catsatajirine. ¹²Cara iniaqueri tininti, iquenganeintasantanèro Irinibare Tosorintsi. Aito cara iquemisantànèro iriro.

Iquenocoque irooti Asiaquè.

¹³Cara Pajoquè yotetaiganaca Paboro aisa itsipa cara pitotsiquè iquenocoque irooti Pérejequè cara quibatsiquè jitacha Pampiria. Aito ijocanèri Joan. Iriroque pigaacha irooti Jerosarénquè.

¹⁴Yogaganaca Berinabé aisa Saoro irooti

basiniquè poeoro aisati ojita Antioquia cara aronisatiquè Pisiria. Ora cataguiteri comagoriantague icanaque pitirooti cara yapatoita jorío, isobigopè. ¹⁵Cara aroque inibataiguèri matsiguenga ira obatasti, inibatèro ora isanguenaque Moisés aisa ora isanguenaque comantantaguètatsiri, aro icantaigaba-queri Berinabé aisati Paboro:

—Nomatsiguenga, aitica ora pininti pinibatiri ica matsiguenga, atsi pinguengabaguitomotiri.

¹⁶Aro icabiritanaca Paboro yacopèri matsiguenga imaireitanè icanè:

—Nomatsiguenga joríojegui aisati obirojegui quemisantantatsiri Tosorintsi, pinguemina. ¹⁷Itosorintsite Israel icoigaiguè nomatsiguenga jirai, aisati yomitojaiganaqueri cara itimiquerai Ejípitoquè. Tosorintsi oniagaiguèri Ejípitosatiegui itasorintsite ora yágantajari nomatsiguenga ¹⁸irooti canta te ontimingani, iroonti piriabatsaro quibatsi. Te ine anchatò tenta ine tojai angani. Itsirishacari Tosorintsi tenta inguemisantaiguèri 40 osarini; tojai itsoingaiquèri. ¹⁹Aisati Tosorintsi ipoguiriaiguèri basiniati matsiguenga ira nibataiguero siete basiniati nibarintsi. Yágabitsaqueri iguebatsite, ipaiguèri nomatsiguenga jirai. ²⁰Pabisanaque osarini ocarati 450. Ipaiguèri Tosorintsi basinipague itingomi ira comantègotantatsiri aisati ijita joes irooti cara inè Samoel comantantatsiri ibatacagaiguèri. ²¹Yamanopiantaiguèri Samoel: “Pomaiguenari natingomi”. Ipaiguèri Tosorintsi ira Saol itomi Sis iriro imatsiguenga Benjamín jirai. Itingomibintanque Saol 40 osarini, ²²aro yágabitsaqueri Saol Tosorintsi, yoguèri David irirai itingomi joríojegui. Icantocoqueri David Tosorintsi:

Naniacaniatèri David itomi Isái, nanintiri. Inganquero antagaisati

ora nongocaqueri, catingasati inguemisanquina.

²³—David icharinencari Ira Jesus. Jirai Tosorintsi icomantëri David cara iragáqueri iragabisaicotajiri matsiguenga. Yamai igáqueri Jesus iragabisaicotaigairini Isirael cara icanque Tosorintsi jirai. ²⁴Teraiquerai iriboque Jesus, Joan icomantaguequeri joríjogui cara iriocairo ora icantagueti te onganinate inganaima yacaqueroca, imaotisataiguëma. ²⁵Cara pënibaque iritsonguëro Joan cara ingomantaguequeri matsiguenga Irinibare Tosorintsi, icanque: “Cagarina naro Agabisaicoontatsiri ira poguiaiguëra. Aique naro coraque iribocapë basini Itingomisonori. Teni aisa nangantimari ibega Iriro. Teni onganinate nantsaitiri isapatotsate. Ibaquina Irironta Itingomisonori, nitsoingaa naronta cantaca iromeraro. Naanti matsiguenga”. ²⁶Nomatsiguenga, irasiquë itomi Abaram, aisati obirojegui quemisantantiriri Tosorintsi, nongomantaiguëmini aroca anguemisantiriri Jesus, aro iragabisaicocái Tosorintsi.

²⁷—Ira Jerosaresati aisati itingomipague te irogógueri Jesus pairiraca ijita Iriro. Teatisati inguemiro Sanguenari ora isanguenataiguë jirai comantantatsirijegui isanguenatocotai-guëri Jesus. Antagaisati cataguiteri comagoriantague inibataigabitaro Sanguenari Jerosaresati carari te inguemiro, te iraneiri Jesus Sanguenariquë. Iroro imoncaraqueero Sanguenari cara inibatëcoiguëri Jesus: “Ingameta”. Te irogógueri. ²⁸Cara te ingantëmatiro Jesus ora te onganinate, yamanaiguëri ira Pirato cara irócagantëri. ²⁹Aroqueque omoncaraca ora isanguenatocoqueri Jesus, aro ipëicoqueri corosiquë irooti cara icamaque. Yoguëtajiri cara corosiquë

yáganëri itiajiri. ³⁰Carari Tosorintsi icabiriqueru itinaajiri yoganiatairi.

³¹Tojai cataguiteri Jesus iconijatomotai-gapairi ira tsipataigari jirai abatsiquë cara iáiguë Garireaque irooti Jerosarénquë. Yamai ira tsipataigari Jesus jirai iriro comantëgotai-guëri matsiguengaquë. ³²Naroegui comantaiguëmine yamai Caninano Nibarintsi cara aroque omoncaraca ora icanqueri Tosorintsi omatsiguenga jirai cara iragáqueri Agabisaicoontatsiri. ³³Naroegui itomijegui jirainisati imoncaraquinaro Tosorintsi ora icantocobintëri Jesus jirai. Cara sárimoquë pite icanque Tosorintsi:

Obiro Notomi, yamai notomintëmi najiquimi obiro Notomisonori.

³⁴Aisati Tosorintsi icantocoqueri cara ingabiritajiri igamaga arota quero ibatsagui cara icanque:

Nomoncaratasantëmiro ora nocomantëri David jirai.

³⁵Iroro aisati icantocoqueri Jesus David basiniquë sárimo:

Quero pinintacaguina nibatsagui Naronta piniacaninati Pitomi.

³⁶Cara iquemisanquero David aisati icanquero ora icocaqueri Tosorintsi, aro icamaque, itiaigairi ira icarati imatsiguenga jirai, ibatsaque. ³⁷Carari igamaga Jesus Ira icabirique Tosorintsi yoganiatairi te iribatsague.

³⁸—Nomatsiguenga, nocoguini pigóigue obirojegui ora nongomanta-guetaiguëmi, yamai Tosorintsi irojocajimiro ora picantagueti te onganinate pinguemisanquerica Jesus tenta ojocajimiro cara piquemisanquero ora isanguenaque Moisés jirai.

³⁹Iraniacaninatëriini Tosorintsi pairiraca quemisanquerine Itomi. ⁴⁰Obirojegui, pigamaiguema querota pomoncarataigaro ora isanguenataiguë comantantatsiri cara icantaiguë:

41 ¡Pinetsaigue, tsoengatsiri!
 ¡Pinguenganeintasantaiguema,
 pingamaiguëni pitsongaiguëma!
 Naronta Tosorintsi natasonganta-
 santëni. Cara piniaguëro quero
 piquemisantiro, aisati pairiraca
 comantabitimirone quero
 piquemisantiro.

42-43 Cara itsonganaquero inibatëro,
 isotocanë Paboro aisa Berinabé cara
 yapatoica jorío, yamanaiguëri
 matsiguenga cara ingomantaigairi aisati
 cara basiniquë cataguiteri comagorian-
 tague. Arosonori jorío iquemisantiri
 Tosorintsi aisati matsiguenga ira cagari
 jorío yoguiataiguëri Paboro aisa
 Berinabé. Iriroque Paboro aisa Berinabé
 inibataigairi cara përosati inguemisan-
 taigueri Tosorintsi arota ingábintsai-
 gueri. 44 Cara basiniquë cataguiteri
 comagoriantague yapatoica pënibaque
 omagaro matsiguenga cara poeboroquë
 arota inguemiro Irinibare Tosorintsi.
 45 ¡Jonaqueri jorío cara iniaigabaqueri
 tojai matsiguenga, aro iguisaneintobi-
 queri Paboro aisa Berinabé. Aisati ira
 jorío icantocotaguetasicari Paboro aisa
 Berinabé itsoiguëgotasitacari. 46 Te
 intorogue Paboro aisati Berinabé,
 icanqueri:

—Noguibatëmi obirojegui jorío
 nocomantabitémiro Irinibare Tosorintsi,
 yamai tenta pinintaigue págobëro
 pinguemisantobëro, quero pitiomotiri
 përosati Tosorintsi Jonogaguitequë,
 yamai najátasitiri basiniatiegui
 matsiguenga ira cagari jorío. 47 Naronta
 igáque Atingomi icanque:

Obiro noguë aisa pingantimaro
 obotagantsi poniagaigueri
 pigótacagaigueri omagaro
 potsatenganëri matsiguengapague
 cara iragabisaicoiguëri Tosorintsi
 cara inguemisanqueri Itomi
 jitacha Jesoquirisito.

48 Cara iquemobëro oca ira cagari
 jorío, icaninasëretaiganaque
 icantocobentaiguëro Irinibare Atingomi
 caninaro. Iquemisantaiguëro antagaisati
 ira icoigaiguë Tosorintsi intiomoqueri
 jonoquë. 49 Aro icomantantaguetiro ora
 Irinibare Tosorintsi omagaroguitequë
 quibatsi. 50 Ira joríojegui inibaiguëri ira
 obataguetatsi cara poeboroquë, aisati
 inibaiguëro tsinanepague obatsi ora
 cogabitacha ogótiri Tosorintsi. Icanqueri
 jorío cara ingantobitaiguëri ora
 catsimari ira Paboro aisa Berinabé irooti
 cara ijocaiguëri. 51 Cara iáiguë pitirooti
 ipotetanëneri pojongamamori
 isapatotequë, icanque:

—Tenta pinguemisantiri Tosorintsi,
 ingasitfgataiguemita.

Irooti yogagantanaca cara poeboroquë
 jitacha Iconio. 52 Irari quemisantatsiri
 icaninasëretaiganaque aisati pinancari
 Isëre Caninaro Tosorintsi.

**Paboro aisa Berinabé iquemisantacaqueri
 tojai basiniati matsiguenga.**

14 ¹Canta Iconioquë icanaque
 Paboro aisa Berinabé
 pongotsiquë cara yapatotaiga jorío.
 Icomantëgotapëri Jesus; iquemisantaca-
 queri tojai matsiguenga, jorío aisati ira
 cagari jorío. ²Ainta jorío, ira te
 inguemisante, icantocotaguetasicari
 Paboro aisati Berinabé. Ira jorío
 botoitëri basiniati matsiguenga
 iguisaneintacaqueri ira quemisantatsiri.
³Tojai cataguiteri itimaque Paboro
 aisati Berinabé icomantëgotaguetiri
 Atingomi, te intorogue. Ira Atingomi
 imitocoqueri Paboro aisati Berinabé
 itasongobentaiguëri matsiguenga, ora
 irogóontaiguëmari matsiguenga cara
 ingábintsaiigairi Tosorintsi. ⁴Te
 inguengaiguema matsiguenga Iconiosati.
 Ainta ira aguaiguëri jorío. Aintasati
 basini aguaiguëri ira quemisanqueri

Jesus. ⁵Cara icoque jorío aisati basiniati matsiguenga aisati itingomipague iquengaigaca ingantobiquerime catsimari Paboro aisa Berinabé, icogabeca iribasegaiguerime. ⁶Cara iquemocoqueri Paboro aisati Berinabé isiganaca poeboroquë aitoniatu jitacha Irísitira aique yogaganaca basiniquë poeboro ojita Térebe, iroro pitirooti poeboro Iricaoniaquë. Aisati iátaiguë basiniquë poeboro aronisati.

⁷Yotsatenganëri matsiguenga icomantaguetanëri Caninaro Nibarintsi.

⁸Canta Irísitiraquë iniopëri isobiaque sërari carancaratsi te iranëitëmate përosati cara inë irooti cara yarepa Paboro. ⁹Iquemobëri Paboro. Inetsapëri iriro Paboro igótopopëro cara iquemisanqueri Atingomi yoguiaqueri iragaguibegajiri. ¹⁰Icampëri:

—iPingabiritima!

Aro omanapague icabiritanaca yaratinganë yanëitanë. ¹¹Iniaiguëri tojai matsiguenga, igóiguë cara yoguibegajiri Paboro, icaimëgotobëri icantaiguë:

—Yamasobingopë nobabane icampari sërari.

Inibataiguëri irinibarequë Iricaoniasati. ¹²Ira Berinabé ijitaigabaqueri Seos. Irirouque Paboro ijitaigabaqueri Erimes irironta comantantatsiri.

¹³Cara poeboroquë aiti pongotsi irasi Seos ibabane Iricaoniasati. Ainta saseriroti irasi Seos. Yamapë sërari baaca aisati santotega. Itsibataigacari matsiguenga ira saseriroti cara icogaigabitaca iróquinerime baaca Berinabé aisati Paboro.

¹⁴Iquemocoquero pitirooti iragátane Jesus, itisaraanëro iguitsagare tenta iraninte iriro iróguineri baaca, isigasitanacari cara yapatoica matsiguenga. Icaimaiguëri ¹⁵icanque:

—Matsiguenga ¿Pairo pintaigui?

Cagarina naro pobabane. Naanti

matsiguenga aisati nacantaiguimi pibega obirojegui. Ora nipocasiti nongomantaiguëmiro pijoquiro oca picantaguëti te onganinate. Aisati pijoquiri pobabane ira cagari Tosorintsi. Pinguemisantaiguëri Tosorintsi Ira catimanerisonori Ira obetsiquëro Jonogaguëte, aisati quibatsi, angaare, antagaisati ora inaguetatsi, omagaro yobetsiquëro. ¹⁶Jirai yabetaiguëri matsiguenga ira cagari jorío cantaguetiro pairoraca. ¹⁷Përosati yoniagacari jirai Tosorintsi, aisati yoniagaiguëmi, icábintsaiguëmi, yobariaquemiro angani, ipaiguëmiro poperipague papasanoiguë piquemaiganaca ora picaninasëretantaigaca.

¹⁸Tojai ora icomantaguequeri, pënibaqueme iritaineri ibaacate carari te ingantiro. ¹⁹Aique ipocaigapë jorío ipaniaca Antioquiaquë aisati Iconioquë. Ijitaicagopëri aisonori ira matsiguenga icampëri:

—Pigamemari Paboro. Itsoigani. Iriro matobiantatsiri. Intsome obaseguiri.

Aro iguisaneinqueri Paboro matsiguenga, ibasegaiguëri ijitaigabitaca yogamagaiguëri. Inosicaiganaqueri igamaga sotoquë poeboro, ijoqueri.

²⁰Iátasiiguëri quemisantatsiri ishongopari Paboro irooti cara itinaanaa icabiritanaa ipigapaa poeboroquë. Oquëtaguetanë iátacaqueri Berinabé irooti Térebequë. ²¹Icomantëgotëri Jesus. Tojaini matsiguenga ira iquemisantacaque. Aro ipiganaja Paboro aisati Berinabé Irísitiraquë aique Iconioquë aique Antioquiaquë. ²²Cara iátagueque pitirooti yapatoiqueri quemisantatsiri icomantasantaigapëri:

—Coshoni poguëri Atingomi. Përosa cara pinguemisantasantotiri. Quero pipasiquitiri. Aiquenta tojai pitsipireicobintëri Jesus cara queroquerai paretta Jonogaguëtequë.

Icomantasantapëri oca, yosintsisèretèri ira quemisantaigatsi. ²³Aitosati cara yapatoibiricari Quirisito ira quemisanta-tsiri, Paboro aisati Berinabé yogaigapëri antiasipari ira omisantirine irapiguemisantane. Itica Paboro aisati Berinabé, yamanocoiguèri ira omisantiri icanque:

—Natingomi, pomitocotiri ica iromisantasantaiguèri irapiguemisantacagane.

²⁴Aique iquenaque Pisiriaquè, irooti cara yareca Pampiriaquè. ²⁵Cara poeboroquè jitacha Péreje aroque icomantëgotaguepëri Jesos, aro yogaganaa basiniquè poeboro jitacha Ataria ²⁶cara yotetanacaro pitotsi iquenocotaji irooti Antioquíaquè cara ipaniaca, cara jirai igátaiguèri quemisantatsiri yamanocoiguèri Tosorintsi icanqueri:

—Pingábintsaiguèri ica cara iriáguè ingomantagueantëro Pinibare pasiati.

Yamai ipigaa aroque icomantagueantëro. ²⁷Aro yarepaa Paboro aisati Berinabé. Yapatoiqueri quemisantatsiri iquenguatsatomotaigapëri antagaisati ora icantacacari iriro Tosorintsi. Aisati icomantapëri cara Tosorintsi yoniagaigacari basiniati matsiguenga iquemisantaiguèri Jesoquisito aisati. ²⁸Aro tojai cataguiteri itiomotaigapëri irapiguemisantane Antioquíaquè.

Yapatoica ira obatatsi iquemisanti.

15 ¹Cara Antioquíaquè yaretaigapa jorío quemisantatsiri ipaniaca Joreaquè. Yogometaigapëri irapiguemisantane icampè:

—Isanguenaque Moisés: “Pitotima”. Queroca piquemisantiri, quero yogabisaicotajimi Tosorintsi.

²Aro ipëgatsacari Paboro aisa Berinabé, tojai inibatobaca. Te inguengaiguema. Igátaiguèri Paboro aisati Berinabé aisati basini cara iriáguè Jerosarénquè. Icanqueri:

—Pijáigue iragátanequè Jesos aisati ira omisantiri opiguemisantane. Posamitasantaiguèri oca: “¿Aisonorica icocagaiguèri iritotima basiniati matsiguenga cara inguemisanceca?”

³Aro igátaiguèri; aique iáguè. Iquenaiguè Jenisiaquè aisati Samariaquè, icomantaguepëri: —Yamai iquemisantaiguèri tojai basiniati matsiguenga.

Aro icaninasèretanè antagaisati quemisantatsiri.

⁴Yaretaigapa Jerosarénquè yobetsatai-gabacari yágacaninatobèri quemisanta-tsiri aisati iragátane Jesos aisati ira omisantiri quemisantatsiri. Iquenguatsatomotaigapëri antagaisati ora icantacacari iriro Tosorintsi. Icomantè cara iquemisantacaqueri tojai basiniati matsiguenga ira cagari jorío.

⁵Yaratingaiguè bariseo quemisantatsiri icanqueri:

—Panibati iritotima. Caninataque inguemisantiro antagaisati ora isanguenaque Moisés.

⁶Aro yapatoica iragátane Jesos aisa ira omisantiri quemisantatsiri. Icoagaiguè irogóigue irotopitiri Antioquíasati.

⁷Tojai inibatobaca. Aro yaratinganè Peroro icanque:

—Nopiguemisantane, pigóiguè obirojegui jirai cara icoiguèna Tosorintsi nocomantaiguèri basiniati matsiguenga ira cagari jorío inguemisantirica Jesos aro iragabisaicoqueri Tosorintsi. ⁸Tosorintsi igótasantèri iraneingomotoquè, aro ipaiguèri iriro Isère Caninara aisa icanquina nibega narogegui jirai. ⁹Tosorintsi niaiguèri quemisantatsiri ira cagari jorío aisati icantina nibegaiga nara. Pairiraca quemisanquerine, irojocajineri ora icantaguèri te onganinate. ¹⁰Yamai ¿Pairo pigóontobicari Tosorintsi, picanca: “Te pigóte”? Aroque yágobèri

Tosorintsi icanqueri iraisati ira basiniati matsiguenga cagari jorío. ¿Pairo te págobitiri obirojegui? ¿Pairo pobomirintsibiririti opiguemisantane cara picocagaiguëri iritotima aisati ingantina nibega naro joríojegui nametaigacaro cara notoiga? Jirai nomatsiguenga te inguemisantiro antagaisati ora isanguenaque Moisés. Aisati yamai naquemisantabecaro naroequi. Aiti ora te nanguemisantiro. Quero pobomirintsitaiguiri popiguemisantane cagari jorío. ¹¹Te iragabisaicotái Tosorintsi cara aquemisanquero ora isanguenare Moisés. Yogabisaicocái Jesoquirisito cara aquemisanqueri Iriro. Te opénatima cara icábintsaigái. Irooti iragabisaicoontëmari basiniati matsiguenga.

¹²Imairetaiguë antagaisati botoitacha. Aique iquemaiguëri Berinabé aisati Paboro iquenguitsatocoqueri Tosorintsi icanque:

—Igáquina natasongobenqueri basiniati matsiguenga.

¹³Aisati imairetaigai. Aro icomantaiguëri Santiago icanque:

¹⁴—Nopiguemisantane, pinguemina. Aroque iquenguitsacái Simón (aisati ijita Peroro) cara Tosorintsi iparintaca icábintsaiguëri basiniati matsiguenga. Icoiguëri Tosorintsi icanqueri iraisati.

¹⁵Jirai isanguenatocoquero aisati comantantatsiri jitacha Amós icanque:

¹⁶⁻¹⁷ Icanti Atingomi: “Aiquenta nopigaima quibatsiquë.

Naguipigairo iragáantane David jirai terainta ongonijataje yamai. Nobetsicaïro arota antagaisati matsiguenga ingoquina, jorío aisati ira cagari jorío, pairiraca quemisanquenane”.

Irooti oca icanti Atingomi

¹⁸icomantanquero cara jiraisonori.

¹⁹Iroro nacantaiguëmi yamai naanti te onganinate obomirintsitaiguëri basiniati matsiguenga. Aroca inguemisantiri Tosorintsi, antagati, aroque.

²⁰Caninataquejenga omagantiri sanguenari. Anganquero negaca: “Quero papiro perintsi ora aroque ipëri matsiguenga ibabane. Quero pintiro tsinane cagaro pijina. Quero paaguiri ibatsa irisitiaga aintita inëri iraraa. Queroootisi pógaro iraraa”.

²¹Antagaisati cataguiteriquë comagoriantague ainta inibatiro ora isanguenaque Moisés iquenguitsatomo-taguetiri matsiguenga omagaroguitequë poeboropaguequë cara yapatoita jorío.

²²Itsonquero irinibare Santiago. Aro iragátane Jesus, aisati ira omisantiri quemisantatsiri, omagaro, iquengaigaca iragáqueri matsiguenga iraguïatanëri Paboro aisati Berinabé irooti Antioquíaquë. Icoiguëri pite matsiguenga ira obatacaqueri quemisantatsiri. Paniro ijita Joras aisati ijita Barasabás, aisati basini ijita Siras.

²³Isanguenataiguë ipagantëri Antioquíasati sanguenari ocanti: “¿Aintabi nopiguemisantacagane? Yaca Jerosarénquë nacarataiguëri iragátane Jesus, ira omisantiri quemisantatsiri, antagaisati. Yamai nasanguenataiguë miro obirojegui cagari jorío Antioquíasati, Siriasati, aisati Sirisiasati.

²⁴Naquemocoqueri matsiguenga ipaniaca yaca aique iáque obiroquë icomëtaquimi cara yogomequimiro: ‘Pitotima, pinguemisantiro ora isanguenaque Moisés’. Teni naro agátirine. Iátasica. ²⁵Iroro napatoitaguëca naquengaigaca yamai nagáquemiri ira nocoigaiguë. Intsibatanëmari Berinabé aisa Paboro ira nanintaneegui. ²⁶⁻²⁷Aro nagáquemiri Joras aisati Siras cara ingomantantaguëmi irooti oca nasanguenaquemica.

Ica pitirooti teni intorogue ingamobitiri Atingomi Jesoquirisito. ²⁸Oquianca Isère Caninaro Tosorintsi aisati naquengaigaca narogui caninataque quero nocomantaiguimiro ora comëtaro. Iroonti nongomantaiguëmi oca: ²⁹‘Quero papiro perintsi ora aroque ipëri matsiguenga ibabane cagari Tosorintsi. Quero pógaro iraraa, querootisati paagui ibatsa irisitiaga aitinta inëri iraraa. Quero pintiro tsinane cagaro pijina’. Aroca pinganquero negaca, caninataque. Yamai caninasati pintimaigüe”.

³⁰Aique iáigüë Antioquíaquë iragátane. Yapatoipëri quemisantatsiri ipaigapëri sanguenari. ³¹Inibataigabaquero sanguenari icaninataiganaque. ³²Joras aisati Siras comantantatsiri inaiigüë, tojai icomantasantaguepëri yoganasëretaigapëri iquemisantacagasantapëri. ³³tojai cataguiteri itiomoguintiri quemisantatsiri. Aique ipiganaja Joras. Yobetsatobaari irapiguemisantacagane, icabëri:

—Caninasa pijátaje.

Irooti ipigantaja cara itimi ira agáqueri.

Pitetaque iquenaque Paboro cara yogomeantë.

³⁴Paniro iáque Joras. Iquianca Siras aito intimaje Antioquíaquë. ³⁵Aisati itimaque Paboro aisa Berinabé. Yogomeantanë icomantagueantanëro Irinibare Atingomi. Itsibatocari basini comantantatsiri. ³⁶Basiniquë cataguiteri icanque Paboro:

—Berinabé, intsome aniajantiri opiguemisantacagane, ira ocomantagueque Irinibare Atingomi jirai. Aniajantirita atiraca icantaiga yamaica.

³⁷Icoque Berinabé iráganëri Joan, aisati ijita Maricos. ³⁸Icanque Paboro:

—Cara áganëri jirai atencari, ijocanacái Pampiriaquë ipigapaa. Te intsibatái cara aquenaque. Yamai quero náganairi aisati.

³⁹Aro ipëgatsatasantobaganaca te inguengaiguema. Berinabé yáganëri Maricos, yotetanacaro pitotsi, iátocoque Chípirequë. ⁴⁰Paboro yáganëri Siras. Yamanocoqueri quemisantatsiri:

—Natingomi, pingábintsaiguëri pomitocotiri ica pitirooti arota iriáigüe caninasati.

⁴¹Aique iquenaque Siriaquë aisati Sirisiaquë yosintsisëretaigapëri ira botoibiritari Quirisito iquemisantacagasantapëri.

16 ¹Yaretaigaa Térebequë, aisati Irísitaraqüë. Canta itimi quemisantatsiri jitacha Timoteo. Iniro jorío quemisantatsiri. Iriri guiriego. ²Ira quemisantatsiri Irísitaraqüë aisa Iconioquë iniacaninatëri Timoteo. ³Icoque Paboro intsibatimari Timoteo, carari antagaisati igótocoqueri iriri cara cagari jorío irianti guiriego. Icanqueri Paboro:

—Aroca pitoquima obiroy aisa pinganquimari joríojegui, aro irágacani-natëmi.

Icanë:

—Aro.

Aro itoqueri. ⁴Aique iquenaqueque poeboropaguequë ipaigapëri sanguenari ora ipagantëri Jerosaresati, iroonti iquengaigaca ora isanguenaque iragátane Jesus aisati basini obatacaguiri quemisantatsiri. ⁵Aro yosintsisëretaigapëri iquemisantacagasantapëri ira botoibiritari Quirisito, përosati cara itojaiganaque quemisantatsiri.

⁶Icogabeca iriáigüeme Asiaquë orari Isère Caninaro ocanqueri:

—Quero picomanti Asiaquë.

⁷Aique iáigüë Jirijiaquë aisati Garasiaquë. Yaretaigaca Mísiacquë

icogabeca iriáteme Bitiniaquë.

Ocanqueri Isère:

—Querootisati piáti Bitiniaquë.

⁸Iquenaque Misiacquë yanonganaca irooti poeboroquë jitacha Toróare.

⁹Cara tsitiniriquë iquisaniqueri Paboro ira Maseroniasati. Icantasiringapëri:

—Popogopë pomitocoigapëna naroegui yaca Maseroniaquëca.

¹⁰Aroqueque iquisaniqueri Paboro iniasiringaqueri matsiguenga, aro nigóiguë iragáquina Tosorintsi Maseroniaquë, nongomantaguepërita aroca inguemisanqueri Jesus, iragabisai-cotajiri Tosorintsi. Aro nocoque pitotsi.

Iáque Paboro Eoropaquë.

¹¹Notetanaca Toróarequë naquenocoque catingasati oboguesiquë jitacha Samotorasia. Oquëtaguetanë naretaigapa poeboroquë jitacha Neáporis. Aro naguëtanë. ¹²Nogaganaca irooti poeboroquë ojita Jeripo. Irooti poeboro obatatsiri. Ainta tojai matsiguenga paniacha Iromaquë. Aito natimopë arosata cataguiteri.

¹³Sábaroquë nisotocanai Jeripoquë nanëitanë onamijaquë angaare nocoqueri jorío cara yamanaigui. Naniopëro tsinane papatoisigaca. Nisobigopë naroegui nocomantëgotapëri

Jesus. ¹⁴Ainta paniro tsinane jitacha Iriria opaniaca jirai Tiatiraquë. Irooti pimantatsiri tocoya quiraquisaamagori. Aisati oquemisanqueri Tosorintsi. Yamai Ira Atingomi iquemisantacaquero ora icomantë Paboro. ¹⁵Obaotisatata iroro aisa ora otsibata obangoquë.

Ocantasantëna:

—Aroca pigóiguë yamai cara naquemisantasantëri Atingomi, pijátaique nobangoquë, pintiomoguintina.

Aro tojai ocantopiantëna irooti cara notabitanëro:

—Aro.

¹⁶Basiniquë cataguiteri, niáiguë cara nomanaqueri Tosorintsi. Nitonguibocaro tsinane onamitaga inancaro camagari. Igótacaquero ora pairoraca abisënguitsine. Irooti yáganta tojai quirequi ira onamitaro. ¹⁷Aro poguiatëri Paboro aisa naroegui, ocaimë:

—Ica sërarica igáqueri Tosorintsi jonoquëntaberi. Icomantaiguëmi atiraca pingantima cara iragabisaicotajimi Tosorintsi.

¹⁸Aro ocantopiantë irooti tojai cataguiteri. Itsirishanacaro Paboro yapisitasitanacaro igátajinero ogamagarite icanque:

—Iriro Jesoquirisito naquemisanti. Irooti iripajiro nojogantëmi: “Pijátopitiro pijocanëro tsinane”.

Irooti ijogantanacaro camagari.

¹⁹Cara igóquero ira onamitaro icanque: —Quero nágantajaro quirequi yamai tenta irinajeni ogamagarite.

Iguisaneinqueri Paboro aisa Siras yágagantëri yáganëri aganguisati poeboro aisati cara ini itingomipague.

²⁰Ipaiguëri itingomi jitacha joes icampëri: —Teni ingomeite ica sërarica. Irooti jorío. Iguisaneintacagaigapëna naroegui timatsi yaca Jeripoquëca.

²¹Icomantaguepëro ora yametaiga. Teni onganinate nanguemisantobëri namecaronta nro basiniati. Naroegui nomatsiguengatacari Iromasati.

²²Iguisana antagaisati matsiguenga aisati itingomi. Igáqueri iromeraro:

—Pisaboquëtiri imanchaqui Paboro aisati Siras, popasatiri.

²³Aro tojai ipasatancari anchaqui, aique yomianqueri. Icantasantëri omisantiro iromingamento:

—Pomisasantantiri ica pitirooti. Pigamemari.

²⁴Iquemobëro oca, yomingasantëri itsitogantacari anchato iguitiquë.

²⁵Aganguite tsitiniri yamanocoqueri Tosorintsi Paboro aisati Siras. Inibabenqueri caninari aisati icántabenqueri. Iquemaiguèri antagaisati iromingane. ²⁶Iroguito posebatanaca omagaro quibatsi aisa iromingamento. Pasirianaquero sitècori opariganai ora itsinagantacari aisa otsaaguetanaca ora yoguèshotancari. ²⁷Icaguitanè omisantiri aro iniaquero pasiriaca sitècori ijique aroque isigaiganaca ira irinaga yominguèri. Itsoroganè yáguèro isabirite iróganëmame iriati. ²⁸Carari icaimasantèri Paboro catsigue:
—iQuero pógasitanaca obiati tenta nasiganëma! iAintana omagarojegui yaca!

²⁹Iriro icanqueri iromeraro:

—Pomapëna obotagantsi.

Aro yamapëneri, icanaque yobaticagueritotasipari Paboro aisa Siras. Imogomogoatanaca. ³⁰Aique yomisotoqueri yosamitèri:

—¿Ogomeantatsiri, paioo nanganque cara iragabisaicotajina Pitosorintsite cara irojocajinaro ora nacantaguetomotiri te onganinate?

³¹Yotabitanèri:

—Pinguemisantiri Atingomi Jesus pintingomintimari, aro iragabisaicotajimi irojocajimiro ora picantagueti te ongomeite. Aisa inganquima pomatsiguenga.

³²Aro Paboro aisa Siras icomantasantèri Irinibare Tosorintsi ira omisantiri aisa imatsiguenga. ³³Irooti tsitiniriquè iquibajineri cara ipasatèri. Aique ibaotisataca ira omisantiri aisa antagaisati imatsiguenga. ³⁴Yáganèri ibangoquè ipèri iraperi. Ira omisantiri aisati imatsiguenga icaninasèretaignaque aroquenta iquemisanqueri Tosorintsi ipabacari.

³⁵Oquètaguetanè igáqueri joes:

—Pomisotocajiri Paboro aisa Siras.

³⁶Ira omisantiri icomantèri Paboro:
—Igatájina nomisotocajimi. Yamai caninasati pijátaje.

³⁷Carari icanqueri Paboro:

—Quero niáti. Naro nomatsiguengatacari Iromasati. Te irosomitëmatina itingomi. Te irogóte pairoraca nacanque. Aisati ipasatasitëna, yomingasiquina. ¿Yamai comanoroni icogui iriocaina? Iribocapëta iriati iromisotocajintana.

³⁸Aro ipiganaja soraro icomantapèri irinibare Paboro. Cara igóiguè itingomi jitacha joes cara imatsiguengatacari Paboro ira Iromasati, aro itsorogasantanè. ³⁹Ipoçaigapè itingomi yamanopèri Paboro aisa Siras irojocajineri ora icantaguetomotiri. Yomisotocajiri caninasati, yamanaqueri iriátae. ⁴⁰Aro isotocanè Paboro aisa Siras iromingamentoquè, aisati ipiganaja obangoquè Iriria, iniopairi quemisantsiri, yogometaignapèri yoganinataigapèri. Aique yogaganaca basiniquè poeboro.

Iguisanaca Tesarónicasati.

17 ¹Iquenaque Paboro aisati Siras cara poeboroquè jitacha Ampíporis aisati Aporonia irooti yarecaro poeboro jitacha Tesarónica. Aiti pongotsi yapatoianta jorío. ²Icapè Paboro icomantaigapèri matsiguenga Irinibare Tosorintsi. Cara yameta, maba sábaro inibatobaca. ³Yogometaignapèri igótacagasantapèri ora isanguenaque comantantsiri jirai. Icampèri:

—Icomantègotèri cara iribocapè Agabisaicoontatsiri, ingamaque, ingabiritanaima igamaga inganiatanae. Ira isanguenatocoque comantantsiri aroque ipoque imoncaraquero Sanguenari, Iriro Agabisaicoontatsiri jitacha Jesus, Ira nocomantèmi yamai.

⁴¹Iquemisantobèro irinibare Paboro porocague jorío. Itsibatocari Paboro aisa

Siras. Aisati iquemisantobëri arosonori guiriego aisati icancari jorío cara iquemisantiri Tosorintsi, aisati tojaini tsinane imatsiguenga itingomipague.

⁵Aro iguisanaca tojai joríojegui, yapatoiqueru matsiguenga ira te ingomeite aisa peratachari. Iguisagantaiguëri tojai matsiguenga, iáiguë ibangoquë Jasón, icogabepari Paboro iráganëri itingomiquë. ⁶Te irine Paboro, irianti Jasón casintaro ora pongotsi. Yágaiganaqueri Jasón aisa quemisantatsiri itsibatacari, yágaiganaqueri itingomiquë, icomantëgotëri icaimëgotëri catsigue:

—Ica iguisaigacari omagaro matsiguenga! Yágacaninatobëri Jasón ibangoquë. ⁷Yogomeantë icanque: “Quero piquemisantiro ora iragáantane Sésar aintanta basini Itingomi Ira jitacha Jesus”.

⁸Cara iquemobëro oca iguisanaca itingomipague aisati matsiguenga. ⁹Icoicotaiguëri iguireguite Jasón aisa ira itsibata cara quero isiga. Icampëri Jasón:

—Teni nantiro ora te ongomeite carari jerica quirequi. Iriro pigóontënarí cara quero nisigopitimi. Aitica nacantaguëti ora quimingari, aro págasantëri naguireguite; teca paio nangante piguipigainari.

Aro yomisotoqueri. ¹⁰Otsitinanë ira quemisantatsiri igáqueri Paboro aisa Siras iriátae poeboroquë jitacha Berea. Yarecaro Berea icanaque pongotsiquë cara yapatoita jorío.

¹¹Iriro Bereasati caninari, te aisa ingantimari Tesarónicasati. Icogasantobëro Sanguenari inguemisantiro. Antagaisati cataguiteriquë inibatapininquero arota irogótasantiro aisonorica ora icomantëri Paboro. ¹²Tojai quemisanqueri Jesoquirisito, sërari aisati tsinanepague guiriego

imatsiguenga itingomi. ¹³Cara Bereaquë icomantantaguepëro Paboro Irinibare Tosorintsi. Cara igótocoqueri jorío Tesarónicasati, ipocasisaigapëri inibatëgotëri itsoiuguëgotacari Paboro, iguisacari matsiguenga. ¹⁴Aito cara igáqueri quemisantatsiri ira Paboro iriátae angaarequë. Irianti inënguitsi Siras itsibatacari Timoteo. ¹⁵Ainta ira ágaiganaqueri Paboro irooti oquibequë poeboro jitacha Atenas. Igátajiri Paboro:

—Yamai pijátaje popiganajima. Cara piretajima Bereaquë, pingomantinari Siras aisa Timoteo omanapague iribocapae.

Icomantanque Paboro Atenasiquë.

¹⁶Cara ipaniguiatëri Paboro cara irarequima Siras aisa Timoteo, yanëibaguitë Atenasiquë. Iniopëro arosonori irosiacagomento ibabanepague yobetsicasitaguëteri Atenasitati ijitasitari itosorintsite. Iroonti mopë, iroonti anchato. Paseriguëri Paboro. ¹⁷Yogometaigapëri cara yapatoita jorío, aisati ira quemisantatsi icancari jorío. Antagaisati cataguiteri iáque cara opimantaguëtanigani Atenasiquë yogometaiguëri matsiguengajegui. ¹⁸Icomantëgotëri Jesus cara icamaque, aisati cara icaniatanai itinaanaa igamaga. Ainta matsiguenga cogapinintatsiri pairoraca inguemasantë. Ainta irogomere Epicóreo aisati irogomere Isitoico. Yapatoica yosamitobagaigaca:

—¿Pairoraca icanti ira nibatasitachara?

Icanque basini:

—Icomantëgotapëri basiniati Tosorintsi.

¹⁹Ipogoqueri yágaiganaqueri otiomijaniquë oguitoja jitacha Areópago cara yametaiga yapatoita. Icabëri:

—Yamai nocogaiguini nogóiguero ora pogomeantë oca irorai nibarintsi. ²⁰Te nanguemopiantiro oca picanti. Nocogui pingomantasantinaro atiraca ocanti nibarintsi.

²¹Arosataanti itarobacaati Atenasisati aisati itsibatari paniacha basiniquë poeboropague. Irianti icogaiguë inguembèri ira iriraique quinguitsatiro pairoraca ora terai inguemi.

²²Aro yaratinganë Pabro aganguisati-quë icampëri:

—Atenasisati, nigótocotimi obirojegui cara pamanocoiguiri tojai pobabane pijitosorintsitasitari. ²³Cara naquenagueque naniopëro ora pamanocotasita. Aisati naniopëro cara pisanguenati ocanti “Amanocotiri Tosorintsi Ira te irogótigani”. Iriro piquemisantabeta te pigótiri, Iriati nongomantëgotëmi yamai.

²⁴—Ainta Tosorintsi Ira obetsiquëro quibatsi, aisati ora inaguetatsi yobetsiquëro Iriro. Teni intime pongotsiquë ora yobetsiquineri matsiguenga Irironta casintaro antagaisati Jonogaguite aisati quibatsi. ²⁵Tiguëti angantiri eiro pairoraca, Irironta tosogobentái. ¿Aroco ingoque omitocotiri eiro? Teni. Ira timagantatsiri icábintsaigái. Ira pacáiro antagaisati, operi, omire, asintsire, cara aneingui, omagaro.

²⁶Yoguibatëri Arán yobetsiquëri jirai. Aique Arán yobetsicancari antagaisati basini matsiguenga arota ontojaiganaque eiro otsatengaguetanëmaro quibatsi. Iriro Tosorintsi cantatsi atiraca intimaiguë matsiguengajeguí aisati atiraca ongantima intimaiguë canta. ²⁷Jirai yobetsiquëri matsiguenga Tosorintsi arota ingoguequeri irogóqueri Irironta aronisati ini. ²⁸Iriro timagái, aganiatái, osebataigái, Iriro inagái Tosorintsi. Aro icanque jirai ogótatsiri pomatsiguenga: “Ijicái Tosorintsi ianiquite”.

²⁹—Eiroeguica ianiquite Tosorintsi, teni onganinate yamai osiacagantiri oro, mopë, anchato, quirequi, yobetsicasita-guetari matsiguenga. Aisati quero osiacagantiri pairoraca iquenga matsiguenga. ³⁰Jirai cara te irogótiri Tosorintsi matsiguenga, te inguisanijintiri te ingantobitiri ora icantaguëti te onganinate. Yamaicari igáqueri Tosorintsi ingantima matsiguenga yacaqueroa irojocajiro ora icantaguëti quimingaro, imasiniatitanae, ³¹aroquenta yoguëri sërari joes Ira jitacha Jesoquisito iraniantaiguëmari omagaro matsiguenga ingomantëgotëri pairoraca inganque aisati negaraca iriatë. Aroque igóque Tosorintsi atiraca ongantima iraniantaiguëmari. Ingantiro Iriro caninasati aroquenta otsomaaqueri iniro imatsiguengatapë, aisati icamaque, itinaajiri Tosorintsi igamaga yoganiatairi.

Irooti itsongantacaro irinibare Pabro.

³²Cara iquemocoqueri Jesus itinaanaa igamaga, ainta icabíntsaánoigabaqueri Pabro Atenasisati. Ainta basini icabëri: —Caraquenta pogometaigaina basini aisati.

³³Aique iáque Pabro. ³⁴Ainta arosataanti matsiguenga itsibatanacari Pabro iquemisanqueri Jesus. Paniro jitacha Ironisio tsipatari itingomipague Areópagoquë. Aisati ainta tsinane jitacha Tamaris. Aintasati basini matsiguenga itsibatanacari Pabro.

Icomantagueantë Pabro canta Corintoquë.

18 ¹Aique ijocanëro Pabro Atenas, yogaganaca canta poeboroquë jitacha Corinto. ²Iniopëri jorío jitacha Aquira aisa iina Pirisira. Pontosati inabita Aquira. Irirai aretajacha ipaniaa Itariaquë itsibataparo iina aroquenta inë cobeingari jitacha Caraorio iguisanein-

taiguëri jorío ira timatsi Iromaquë.

Igåqueri:

—Atsi pijáigae basiniquë quibatsi.

Quero pinaigai yaca Iromaquëca.

Aro yarepa Corintoquë Aquira aisa iina. Canta iniopëri Paboro itiomopëri ³aroquenta aisa icantari Paboro ira Aquira ipangotacaro tocoyapango. Iroro itiomotaguëpëri arota intarobacaataiguë. ⁴Antagaisati sábaroquë yogometabecari Paboro cara yapatoita jorío. Iquemisantabetobacari jorío aisati matsiguenga ira cagari jorío. ⁵Cara ipocaigapë Siras aisa Timoteo, ipaniaca Maseroniaquë, aro iquenguitsatasanta-nëro Paboro ora Irinibare Tosorintsi. Icomantaiguëri joríojegui icanqueri:

—Jesus Iriro Quirisito Ira

Agabisaicootantsiri.

⁶Ipëgatsataigacari joríojegui aisati icantocotaguëtasicari. Aro Paboro ipotetanëro iguitsagare icanqueri:

—Aro pingamaque obirojegui tenta pinguemisantiro Irinibare Tosorintsi, quero poguibitaquinaro nara cara pijátaiguë Sharincabeniquë. Carari yamai najátasiqueri matsiguenga ira cagari jorío. Nongomantaguequerini.

⁷Yogaganaca icanaque ibangoquë Tisio Jósito. Iriro quemisanqueri Tosorintsi. Itimi toonquëquero ibango Tosorintsi iguenguitsamento. ⁸Yameta Quirisipo inibatëro Sanguenari cara yapatoita jorío. Iriro obatatsi. Carari iquemisanqueri Jesoquirisito Atingomi. Aisati iquemisantaiguëri imatsiguenga ira timatsi ibangoquë. Aisati iquemisantaigabaquero Irinibare Tosorintsi tojai Corintosati aisati ibaotisataigaca. ⁹Cara tsitiniriquë isamë Paboro iniasiringaqueri Atingomi icampëri:

—Quero pitsorogui. Përosati cara pinguenguitsataguete, quero pomaireti

¹⁰nantsibatëmininta. Quero pairi

cantaguëmatimi pairoraca. Ainta tojaini matsiguenga yaca poeboroica inguemisantaiguëna.

¹¹Aro përosati cara yogometaguequeri Corintosati Irinibare Tosorintsi. Tojai itimanteque, patiro osarini aisati aganguisati basini.

¹²Yamai Garión itingomi Acayasati cara iguisaneintaiguëri joríojegui ira Paboro. Yáganëri Gariónquë ¹³icampëri:

—Ica sërarica teni inganinate.

Icantaguequeri matsiguenga: “Pomanocotiri paniro Tosorintsi”. Teni iriátsatiro ora icanque Sésar.

¹⁴Pëníbaque irinibaqueme Paboro, irari Garión inibataiguëri jorío icanqueri:

—Obirojegui jorío, paserigaiguëna.

Aitime ingantaguete ica ora te onganinate, iróquerime pairiraca, arome cara naquëgotaiquëmime. ¹⁵Carari oca iroonti asi ora pogomeantane, iroonti asi ora isanguenaquemi pomatsiguenga jirai, antsita pingantiro obirojegui. Quero naquemiro nara. ¹⁶Yamai pijáigae.

¹⁷Iriro Sósitenes irirai obatatsi cara yapatoita jorío. Aro ira matsiguenga guiriego yágaiguëri Sósitenes, ipasataiguëri catingsatiquë iragáantamento Garión. Iriro te inguemasantiri.

¹⁸Tojai cataguiteri itimanteque Paboro Corintoquë, aro yobetsatanaari irapiguemisantacagane, iátocoque pitotsiquë irooti Siriaquë. Itsibatanacari pitirooti, Pirisira aisa ojime Aquira. Aro yapeitaca Paboro cara poeboroquë jitacha Senquerea aroquenta imoncaraquero cara yogagatsatineri Irinibare Tosorintsi. ¹⁹Yaretocotaigaca Ejesoquë cara yoganëri Aquira aisa Pirisira. Icanaque Paboro pongotsiquë cara yapatoita jorío yogometaigapëri Irinibare Tosorintsi inibatobaca.

²⁰Icabëri:

—Cosamani pintimaque yaca
pogometaiгуena.

Te ingogue Paboro. ²¹Yobetsatanaari
icanqueri:

—Aroca ingoque Tosorintsi, aiquenta
nopigaima aisati.

Aro yotetanaa pitotsiquè iátocoque
²²irooti yareca Sesáreaquè. Itonganaque
Jerosarénquè, yobetsatapari ira
botoibiritari Quirisito. Aique
yogaganaca irooti Antioquíaquè cara
ipaniaca.

Mabataque iquenaque Paboro cara yogomeantè.

²³Pabisanaque tojai cataguiteri
itimaque Paboro Antioquíaquè, aique
iátaji Garasiaquè aisati Jirijiaquè,
yogometaiгapèri yosintsisèretapèri
antagaisati ira quemisantatsiri.

²⁴Ainta jorío ijita Aporo. Ipaniaca
poboroquè jitacha Arijantiría canta
Éjípitoquè. Yareca Ejesoquè. Caninasati
iquenguitsatasanti, igótasantiro
Sanguenari. ²⁵Aroqueque
iquemocoqueri Jesus icomantègotèri.
Caninasati icomantasantè, carari te
irogótiro antagaisati ora icantagueque
Jesus. Patiro igótiro Aporo ora
yogomeantè Joan ira baotisantantsiri.
²⁶Iparintaca iquenguitsatasantapè
pongotsiquè cara yapatoita jorío. Cara
iquemobèri Aquira aisa Pirisira, icabèri:
—Nocoguini nanibatimi casiriconiati.
Icampè:

—Aro, intsome.

Aro Pirisira aisa Aquira yáganèri
ibangoquè, caninasati yogometaiгaba-
queri omagaro ora icantagueque Jesus
igótasantaqueri, yotsatianquineri
antagaisati ati angantima cara aretimari
Tosorintsi. ²⁷Aique icanqueri Aporo ira
quemisantatsiri:

—Nocoguini najáte Acayaquè aisati.
Aro yotabitanèri:

—Caninataque. Aisati nasanguenaqui-
neri opiguemisantane canta.

Aro isanguenaquineri: “Págaigaba-
queri caninasati Aporo. Pinguemisan-
tiri”.

Jirai Tosorintsi cábintsèri Acayasati
irooti iquemisantancari. Aro yamai
cara yareca Aporo tojai iquemisantaca-
gopèri yosintsisèretapèri. ²⁸Ipègatsapari
joríojegui. Yoniagantaigapèri icampè:

—Iriro Jesus Ira oquenguitsatocoti
Sanguenari Iriro Agabisaicoontatsiri Ira
igáque Tosorintsi.

Iáque Paboro Ejesoquè.

19 ¹Irootita inasegui Aporo
Corintoquè, iquenopè Paboro
cara Garasiaquè aisa Jirijiaquè irooti
yaretaja Ejesoquè. Iniopèri arosata
quemisantatsiri. ²Icampèri:

—Jirai cara piquemisantaiguèri
Quirisito, ¿Págasèretobèro Caninaro
Isère Tosorintsi?

Yotabitèri:

—Teni nanguemocotiro. ¿Pairo ojita?

³—¿Pairi pobaotisabirita?

—Nobaotisabiritari Joan.

⁴Aro icampèri Paboro:

—Ibaotisatiguèri matsiguenga Joan
aroquentia ijocajiro ora icantagueti te
onganinate. Aisati icomantèri:
“Pinguemisantiri Ira boquènguistsine,
Iriro Jesus Atingomi”.

⁵Cara iquemaigabaquero oca, aro
ibaotisabiricari Atingomi Jesus.

⁶Yoguèneri ibaco Paboro iguitoquè, aro
paguèpè Caninaro Isère Tosorintsi.
Yágasèretobèro, inibatanèro basiniati
nibarintsi, icomantagueiguè. ⁷Icarati 12
ica Ejesosati quemisantatsiri.

⁸Aro icanaque Paboro ibangoquè
Tosorintsi iguenguistsamento,
icomantaguetasantaiguèri matsiguenga
maba manchacori. Tojai iquenguitsatoco-
queri Tosorintsi, ati angantima aretimaro

iragáantane. Tojai yogomeantë. ⁹Ainta iconagaca matsiguenga ira te irágobëro ora icomantë Paboro. Te iraninte inguemisantiri tenta inguenganeintëmatima. Icantocotasicari catingasatiquë matsiguengajegui icanque:

—Teni inganinate Ica Quirisito icomantëgoti Paboro. Itsoigani.

Irooti ijogantanacari Paboro, yáganëri quemisantatsiri casiriconiati. Përosa cara iquenguitsatacagaiguëri antagaisati cataguiteri canta yogomeanti aisati Tirano. ¹⁰Pite osarini yogomeantëro Paboro Irinibare Atingomi, iroro iquemocotaguëtaigabaquero antagaisati matsiguenga timaigatsi canta Asiaquë, joríojegui aisa basiniati matsiguenga ira cagari jorío.

¹¹Tosorintsi ipëri Paboro itasorintsite. Irooti ora itasongantagueantaca ora te oneingani jirai. ¹²Yamapëneri janaitaguetatsiri ibaniote Paboro aisa manchaguintsisite, yoguëneri, irooti ibegantanaa. Irootisati ijogantaineri camagari ira inantabeca.

¹³⁻¹⁴Yaretaigapa canta Ejesoquë jorío játaguetatsiri iriro yogabisaicobintëri matsiguenga inanca camagari. Irirojegui icarati 7 itomi Isiqueba imatsiguengatacari saseriroti. Iniabecari Paboro cara igáqueri camagari. Icogaigabitaca aisa ingantimarime, icantasicari ira inanca camagari:

—Ainta Jesus Ira icomantëgoti Paboro. Iroro iripajiro nojogantëmi, pijátopitiri ica matsiguengaca.

¹⁵Yotabitanëri camagari:

—Nigótiri Jesus, aisati Paboro nigótiri, carari teni nogótimi obirojegui. ¿Pairo nanguemisantobitimi?

¹⁶Aito ira inanca camagari imatsecanë yágobëri iguisaigabaqueri omagaro siete sërari, yagobiaiguëri. Aro isigaiganaca saacanari aisa aroque icasiroabaguitëri. Ijocaiganacuëri ibangoquë.

¹⁷Iquemocotaiguëri antagaisati Ejesosati, joríojegui aisa ira cagari jorío. Itsorogasantaganaque aisati inibacaninatëgotaiiguëri Atingomi Jesus.

¹⁸Ipogaigapë tojai ira iriraini quemisantatsi, icomantagueiguë yotsatengaguetaigapëro icampë:

—Aiti nacantaguëti te onganinate.

Aisati ipocaigapë ira matsi. ¹⁹Tojai ira aroque yamanaqueri camagari, imitocoqueri jirai, yamaigapëro isanguenare ora igóontoro imatsine, yapatobompoiquero yogamatëro. Icanque:

—Teni naninte nomatobitajiri aisati nomatsiguenga, aroquenta nopabacari Tosorintsi naquemisantobëri.

Imoncarataiguëro cara ocarati pipënata sanguenari: icarati 50,000 igitso quirequi. ²⁰Tojai Ejesosati iniaigabaquero caninaro Irinibare Tosorintsi aisati cobeingaro. Iquemaigabaquero arosorori matsiguenga.

²¹Aique ipintsataca Paboro iriáte Jerosarénquë. Inguenaque Maseroniaquë aisa Acayaquë. Iquianca: —Narequimaca canta Jerosarénquë nagaganëma Iromaquë.

²²Igáqueri pite omitocontatsiri irobotanëri Maseroniaquë, Timoteo aisa Erásito. Përosati cara itimaque Paboro Asiaquë.

Iguisaneintanaca Ejesosati.

²³Teraiquerai iriáte Paboro, iguisaneintaganaca Ejesosati ora icomantëgotiri Jesoquisito Atingomi. ²⁴Iguisaneintacaganëri Temétirio ira obetsiquiri quirequi. Yosiacagantapinintiro otiomijani obango Aritemisa ibabane ora aisata ojita Tiana. Temétirio aisati itsibataigari basini ipimantaiguëro osiacagamento yágancaro tojai quirequi. ²⁵Temétirio

yapatoiqueri imatsiguenga ira obetsiquiri quirequi ibega iriro, icabëri:

—Pigóiguë obetsiquëro

osiacagomento obabane ágantaiga eiro aguireguita. ²⁶Aisati piniaiguëri ica Paboroca piquemocoqueri. Arosonori matsiguenga ira iquemisantacaque Paboro: Ejesosati aisati Asiasati itsibataigacari. Icanque ora yobetsiquë matsiguenga iroro cagari Tosorintsi.

²⁷Yamai ainta Aritemisa obabane ora iquemisantaiguë antagaisati Ejesosati aisati omagaro Asiasati. Carari përosati cara yogomeantë Paboro, icantopiantaiguëri matsiguenga cara quero yamanantairo osiacagomento obabane, aisati quero iniacaninataigairo obango caninaro obabane, quero ipocaji iniajiro. Aroca përosati cara inganquero negaca Paboro, irojoquero Aritemisa, quero iquemisantajiro matsiguenga. Aisati quero nágantajaro quirequi.

²⁸Iquemaigabaquero oca nibarintsica, iguisaneintaiganaca aro icaimapinintai-ganaque catsigue:

—Caninarosonori Aritemisa, iroro obabane eiroegui Ejesosati.

²⁹Antagaisati Ejesosati icaibaiganaque isigaiganaca irooti cara yapatoitaiga Ejesosatijegui. Yágaiganaqueri inosicaiganaqueri ira Gayo aisa ira Arisitárico. Iroro pitrooti Maseroniasati, itsibatari Paboro. ³⁰Icogabeca Paboro inganaqueme irinibatocobentërima carari te iranintacagaigueri quemisanta-siri. ³¹Aintasati itingomipague iramigote Paboro icomantagantëri:

—Quero piáti canta yapatoitaiga Ejesosati. Irógaiguëmi.

³²Aro icaimasitagueca paniropague, ira basini cajemanënguitsi ora basiniati. Icaimasitaguetaiganaca. Tojai ira te irogóigue pairoraca yapatobirita.

³³Ainta canta Arijantoro igáqueri jorío. Yacopëri matsiguenga cara iromairetai-

guë, icogabeca irinibataiguerime.

³⁴Carari cara igóiguëri iroro jorío, aro icaimaiganaque omagaro:

—iCaninarosonori Aritemisa, iroro atingomi eiroegui Ejesosati!

Cosamani cara icaibaitaiguë catsiguesonori. ³⁵Iquemocoqueri, ipogopë ira sanguenatapinintatsiri yoguimairetaigapëri matsiguenga icampëri:

—Nomatsiguenga, antagaisati igóiguë ora Aritemisa iroro obabane aisa osiacagomento cara oparigatëpái opaniapa jonoquë, aisati eiro Ejesosati omisantinero obango. ³⁶Oca igóiguë omagaro matsiguenga. Caninataque yamai pomairetaigue. Quero picantaguebiritiri catsimari ica sërarica.

³⁷Pamasitapari yaca, carari teni ingositiro obango Aritemisa, teatisati ingantocotaguetasitimaro obabane.

³⁸Ainiroca yabenta Temétirio aisa ira itsibata, irabintimarita ira atingomi joes.

³⁹Aítica ora basiniati, caninasati pingomantëgotiro, aique cara ingaimaigacái atingomi opatoiquima caninasati. ⁴⁰Yamai te opatoitaiguema caninasati. Aroca irosomitaigacái atingomi paio apatoibirita yamai, ¿Pai ri comantërina? Ingantococái eiro: “Icoguini irojoquiri atingomipague Iromasati, aro inguisaneintanacái”.

⁴¹Aroque itsonquero icampëri oca, igátaiguëri iriátae ibangopaguequë. Aique iáigai.

Iáque Paboro Maseroniaquë.

20 ¹Aroque imairetaigai Ejesosati, icaimaiguëri Paboro ira yogomeque quemisantatsiri. Aique yobetsatanaari, iáque irooti Maseroniaquë. ²Iquenagueque canta. Tojai yogometaguetaigapëri quemisantatsiri irooti yareantaca quibatsiquë jitacha Guiresia ³car

itimaque maba manchacori.
Pënibaqueme irotetanëma pitotsiquë
inguenocoque Siriaquë, aro igócototai-
guëri jorío iquengaigaca iróguiri. Iroso
iquengasëretaguëca icanque:

—Nopintsacacani nopiganajima
Maseroniaquë.

⁴Iáiguë Paboro aisa ira itsibata:
Sópatoro itomi Piro Bereasati,
Arisitárico aisa Seconto Tesarónicasati,
Gayo Térebessati, Timoteo Irísitarasati,
Tíquico aisa Torójimo Asiasati. ⁵Icaegui
obataiguëri Paboro irooti yareca
poeboroquë jitacha Toróare. Canta
yoguaiquina Paboro aisa naro Irocas
sanguenatiro oca sanguenarica. ⁶Cara
Jeripoquë aroque yapaiguëro pan ora te
ingonaguero ora piponganta, aique
nogagaiganaca Paboro aisa naro,
naquenocoque pitotsiquë. Ocarati
pabocorooti cataguiteri naretaja
Toróarequë cara yoguaiquina iraugui
obaquenguitsi. Aito cara natimaiguë 7
cataguiteri.

⁷Tomincoquë napatotaigaca cara
nantibatsaaguequero pan nanguengasëre-
tantaiguëmari Jesus cara icamobicái.
Cosamani iquenguitsapë Paboro irooti
aganguite ipintsacacantina iriátë
naramani. ⁸Aiti tojaiti obotagantsi cara
napatotaigaca jonoquë oquibe pongotsi.
Cara osobi aiti basini sitomencorentsi,
aique quibatsi osobi. ⁹Isobiaque omoroquë
ira oboina jitacha Eótico. Ipotsiquitanë
cosamaninta icomantagueantë Paboro.
Aro isamasantanë ipariganë osobi.
Nisigaiganaca nagüëtaiganaque
nágabitapari. Aroque icamaque.
¹⁰Yaguëtanë Paboro omanapague
yabitonopëri, icaniantanai. Icanque
Paboro:

—Quero pogasëretaiga aroquenta
icaniantanai, aisatitanai.

¹¹Aisati nataiganajiji jonoquë, aro cara
itibatsaaguepero pan Paboro, napaiguë.

Përosati cara inibatobagaigaca irooti
cara oquëtaguetanë niáigai. ¹²Yamapairi
ira oboina teni ati ingantima
tegotsitatsi, icaninasëretaiganajiji
quemisantatsiri.

¹³Icantaiguëna Paboro:

—Obirojegui pobataigue.

Pinguenocoque pitotsiquë irooti
poeboroquë jitacha Asón. Cantanta
páganaina. Aito nanguenaque naro
abatsiquë.

¹⁴Aro iniaigaina Asónquë, notetanaa
pitotsiquë, naquenaiguë irooti
poeboroquë ojita Mitirene.

¹⁵Oquëtaguetanai naquenocotaiguë
irooti catingasati oboguesiquë jitacha
Quío. Oquëtaguetanai aisati
naquenocoque irooti basiniquë oboguesi
ojita Samos. Cara pabisanaque maba
cataguiteri naretaiigapa poeboroquë
ojita Mireto. ¹⁶Iquianca Paboro
irabisanaque Ejesoquë, tenta iraninte
intimanë cosamani Asiaquë. Icoque
iraretima Jerosarénquë cara
queroquerai omoncarata cataguiteri
jitacha Pentecosités.

¹⁷Cara Miretoquë icaimagantaiguëri
antiasipari ira omisantiri ira
botoibiritari Jesoquirisito Ejesoquë.

¹⁸Yaretaigapa, icabëri Paboro:

—Pigóiguë ati nacanta natiomotai-
guëmi obirojegui jirai cara naraini
arequenguicha Asiaquë. ¹⁹Pigóiguë cara
naquemisantasanotëri Atingomi. Aisati
nacantari pomeraro. Niraicotopiantëri
matsiguenga. Itsipiriopiantagaiguëna
jorío. ²⁰Te nomairetëmate carari
nocomantasanguëmiro antagaisati
ora Caninaro Nibarintsi, notsatengaiguë
miro. Nogometaguëmi cara papatoita
aisati pobangopaguequë. ²¹Nocomantëri
jorío aisati basiniati matsiguenga ira
cagari jorío nacanqueri:

“Pingantaigaima yacaqueroca. Pijoquiro
ora picantaguëti te onganinate.

Pabentimari Tosorintsi pinguemisantiri Itomi, Irianti Atingomi Jesoquirisito”.

²²—Yamai najáqueni Jerosarénquë, ojátacaquina Isère Tosorintsi. Teni nogóte pairoraca ingaintëna canta. ²³Patiro nigóquero ora ocomantëna Isère Tosorintsi. Antagaisatiquë poeboro ocomantapinintina cara iromingaiquëna iratsipiriacaquina. ²⁴Cara te nontsorogue. Jemita nangame. Teni nongogue nantime yaca quibatsiquë, iroonti nocoguini notsonquero ora igáquina Tosorintsi jirai nantëneri. Aisati igáquina Atingomi Jesus nongomantaguetiri matsiguenga ora Caninaro Nibarintsi: “Icogasanoti Tosorintsi ingábintsaiguëri matsiguenga. Icogasanoti irojocajineri ora icantagueti te onganinate”. ²⁵Yamai nigóque quero piniaigaina aisati. Cara nacarataiguëmi jirai, aroque nocomantasantëmiro iragáantane Tosorintsi, Iriro Atingomi aneingomentoquë. ²⁶Nocomantasantëmi yamai, aintaca paniro ira te inguemisantiri Jesus, iriátëca Sharincabeniquë, quero poguibitaquinaro ²⁷aroquenta notsatengaiguëmiro naquenguitsatomotimiro antagaisati ora icanti Tosorintsi.

Oca icomantaiguëri Paboro. Përosati icanqueri:

²⁸—Pigamaiguema obiatiegui. Aisati pomisantobentiri antagaisati popiguemisantacagane aisa icancari ira casintari omisantiri iroishate. Aroquenta pinanquimi Caninaro Isère Tosorintsi, obirojegui pomisantobentaiguëri quemisantatsiri ira botoibiritari Tosorintsi. Itomi icamobitaiguëri omagaro matsiguenga ora iragabisai-coontimari antagaisati ira quemisanti-rine. ²⁹Nigóque naro cara najáque, iribocaigapë ogameantatsiri irianti matobiantatsiri ingoque pijocaiquëri Jesus Ira piquemisantaiguë. Iriro aisati inganquimari otsitiniro catsimari

iragamagaiguëri oisha. ³⁰Aintasati yaca obirojeguiquëca aikuenta ira ogameantë nguitsine ora cagaro catingaro iromatobitagarantëri quemisantatsiri iraguiatanëri iriati ira ogameantatsiri.

³¹Pingaguite pigamaiguema. Pinguenguero ora nogometaiguëmi maba osarini. Tsitiniriquë aisa cataguiteriquë niraicoquemi nocomantasantaiguëmiro Irinibare Tosorintsi pinguemisantasantiro. ³²Namanocoquemi Atingomiquë: “Pomisantiri Ejesosati, pingábintsaiguëri arota inguemisantaiguero Pinibare”. Onguemisantacaganëmi Irinibare Tosorintsi onganquimi pintsibataiguemari ira yoguëtetai Tosorintsi ijitiri ianiquite. ³³Te nanebetimaro ora yasinta basini: aisa quirequi teatisati iguitsagare. ³⁴Pigóguë cara nantanontaca irooti napantaigaca naro aisati ira natsibatata. ³⁵Nacanque caninasati. Aisati pingantana nibega naro. Pintarobacaate pomitocotaiguëri ira te irine iguireguite. Icanque Atingomi Jesus: “Caninataque omitocotaiguëri. Teni onganinate cara përosati imasitaigacái”.

³⁶Itsonquero Paboro ora icanqueri Ejesosati, aro yobaticagueritotaigaca yamanaque. ³⁷Iragaigaca antagaisati. Yabitsonotaiguëri ira Paboro yasaraacari iboroquë. ³⁸Yogasëretaigaca aroquenta icanque Paboro cara quero iniajiri aisati. Itentaigaari cara ibitoquë, inetsaigabaqueri cara iátocoque.

Iáque Paboro aikuero Jerosarénquë.

21 ¹Irooti nojogantaiganacari quemisantatsiri Ejesosati. Notetaiganaca pitotsiquë, catingasati naquenocotaiguë irooti oboguesiquë jitacha Cos. Oquëtaguetanë nogagaiganaca oboguesiquë jitacha Iroras, aique poeboroquë ojita Pátara.

²Canta, naniaigapëro basini pitotsi ojáque Jenisiaquë. Aro notetaiganacaro, naquenocoque. ³Nanianëro oquibe oboguesi jitacha Chípíre aiquero nomatequë nabisaiganaquero catingasati naquenocoque irooti Siriaquë. Naguëtaiganaque poeboroquë jitacha Tiro cara yoguëtanëro ora yamapë ira casintaro pitotsi. ⁴Canta naniaigapëri quemisantatsiri. Natiomotaiguëri 7 cataguiteri. Pogometaiguëri Caninaro Isëre Tosorintsi, icantaigabaqueri Paboro:

—Quero piáti Jerosarénquë.

⁵Pabisanaque 7 cataguiteri, nogagaiganaca. Aro yoguiataiganaquina irooti sotoquë Tiro antagaisati quemisantatsiri aisa iina aisa ianiquite. Cara onamijaquë nobaticagueritotaigaca namanocobintaigaca. ⁶Aro nobetsataiganajari niáque. Notetaiganacaro pitotsi. Iraegui aguiataigapëna ipigaiganaja ibangopaguequë. ⁷Cara Tiroquë naquenocoque poeboroquë jitacha Toremaira. Canta nobetsataigapari opiguemisantane, natiomotaiganaqueri poro cataguiteri. ⁸Oquëtaguetanë nogaganaca, naretaigaca irooti Sesáreaquë. Nacaigapë ibangoquë Jeripe ira comantantatsiri natiomopëri. Iriro icarataiguëri jirai ira omitocoontatsiri icarati 7. ⁹Ainta otsibasati irisinto terai oneiri sërari ocomantanti aisati iroro.

¹⁰Pabisanaque arosata cataguiteri, yarepa comantantatsiri jitacha Agabo ipaniaca Jerosarénquë. ¹¹Ipcasitai-guëna, yáguëro irisitigatsaquiuro Paboro. Yoguëshotiacaro iguitiquë iriati aisa ibacoquë, icampë:

—Canta Jerosarénquë aisati inganquengani iraguëshotiaqueri jorío ira casintaro oca irisitigatsaquiuroca. Imaiguëri basiniati matsiguenga ira cagari jorío. Ocanti negaca Caninaro Isëre Tosorintsi.

¹²Naquemaigabaquero oca nibarintsi, naro natsibatari aisa ira Sesáreasati quemisantatsiri nacamanaaqueri Paboro:

—Quero piáti Jerosarénquë.

¹³Yotabitaiganaquena Paboro:

—¿Pairo piraicobiriquina? ¿Pairo pogasëretacobiquina? Jemita iraguëshotaiguenata canta Jerosarénquë. Jemita irógaiguena. Jirai yogabisaicoquina naro Atingomi Jesus, yamai nangamobiqueri Iriro.

¹⁴Te inguemisantaiguena, aro nomairetaiguë. Nacantaiguë:

—Ongantimata ora icogui Atingomi.

Yaretaigaca Jerosarénquë.

¹⁵Aique nobetsicaigaca narogui, aro nitongaiganaque irooti Jerosarénquë.

¹⁶Iconagaigaca ira aguiataiganaquina quemisantatsiri Sesáreasati. Yáganëna ibangoquë Manasón paniënguicha Chípírequë jirai; yamai itimi Jerosarénquë. Tojai osarini iquemisanti Manasón. Iriro natiomotaiguë. ¹⁷Aroque naretaigaca Jerosarénquë, yágacanina-taigabaquina opiguemisantane icaninasëretaiguë. ¹⁸Oquëtaguetanë iáiguë Paboro aisa narogui iniopëri Santiago. Iriro botoitaiguëri omagaro ira omisantiri quemisantatsiri.

¹⁹Yobetsatobagaigaca iquenguitsatomo-taiguëri Paboro yotsatengaiguëneri antagaisati ora icantacacari iroro Tosorintsi. Aisati icomantë cara Tosorintsi oniagaigacari basiniati matsiguenga cagari jorío iquemisantai-guëri Jesoquirisito aisati.

²⁰Iquemaigabaquero irinibare Paboro icanquë:

—Caninari Tosorintsi.

Aisati icantaiguëri:

—Paboro, nopiguemisantaneegui, pigóque arosonoriguinte ini jorío opiguemisantane. Aisati antagaisati iroro

quemisantasantiro ora isanguenaque Moisés jirai. ²¹Iquemocotaiguëro cara pogometiri joríojegui ira timatsi basiniatiqùè quibatsi: “Quero piquemisantiro isanguenare Moisés. Querootisati pitotiri pitomijegui. Querootisati pametaro ora yogomeanti Moisés”. ²²¿Pairoraca anganque? Caraquenta inguemocotaiguëmi cara paretaja. ²³Caninataquejengari pijátsataiguena. Ainta itsibasati opiguemisantacagane iquengaigaca icasiriconiatiquineri Tosorintsi. ²⁴Páganëri oquibequë pongotsi irasi Tosorintsi, piguëtetanontaiguema cara yogomeanti Tosorintsi aisati ora yameta jorío. Popeitima popënabentineri cara irapeiquima ira itsibasati, aisati popënabentineri iroishate ira iritaineri Tosorintsi. Aique irogóiguë joríojegui te aisonori ora iquemocoquimi. Irogóiguëta cara aisa obiro piquemisantiro isanguenare Moisés. ²⁵Aroque naquengaigaca ora inganque quemisantsiri ira cagari jorío. Aroque nopagantëri sanguenari. Iroro oca nocomantëri: “Quero papi perintsi ora aroque ipëri matsiguenga ibabane. Quero paaguiri ibatsa irisitiaga aitinta inëri iraraa. Querootisati pógaro iraraa. Quero pintiro tsinane cagaro pijina”.

²⁶Aro iquemisanqueri Paboro. Oquëtaguetanë yáganëri ira sërari icarati itsibasati, yoguëtetanontaigaca cara yogomeanti Tosorintsi, icanaque oquibequë pongotsi irasi Tosorintsi icomantapë:
—Ongaraque 7 cataguiteri nomoncaraquero ora icanti Tosorintsi jirai aisa ora isanguenaque Moisés. Aroca nangantaiguëro, aro nomaiguëri Tosorintsi oisha.

Yágagantëri Paboro yomianqueri.

²⁷Pënibaque omoncaraquima 7 cataguiteri. Canta oquibequë pongotsi

irasi Tosorintsi iniaigabaqueri ira Paboro jorío Asiasati. Iguisaneinqueri yapatotaiguëri imatsiguenga, aro yágaiguëri Paboro. ²⁸Icaimaiganaque:
—Nomatsiguenga, pomitocotaiguena. Iroro ica quenaguetatsi yamatobitaiguëri matsiguenga. Cara yogomeanti icanqueri: “Teni inganinate jorío. Teni onganinate ora isanguenare Moisés. Teni onganinate oca pongotsica irasi Tosorintsi”. Iroro oca icantiri matsiguenga. Yamai pinetseri. Yamapëri ira basiniati matsiguenga ira cagari jorío, yoguimingatëro oca pongotsica.

Iroro inibataiguë jorío. ²⁹Antagaisati iniaiguëri Torójimo Ejesosati itsibatari Paboro cara Jerosarénquë. Iroro ijitaguëque cara iroro Paboro cajaganëri tsomagui oquibequë pongotsi. ³⁰Aro iguisaneintaiguëri antagaisati Jerosaresati, yapatotaigaca canta. Yágaiguëri Paboro inosicanëri sotoquë pongotsi, yasitocoqueri sitëcoriquë. ³¹Iroontita ipasataiguëri ira Paboro pënibaqueme iróqueri, iquemocoqueri igomantantite soraro icarati 1,000. Icomantëntiri:

—Omagaro Jerosaresati iguisaiganaca.

³²Omanapague yáganëri isorarote aisa igapitantepague isigaigapa comantanti. Iriroque joríojegui cara iniaigabaqueri, aro yapabaquëanëri Paboro.

³³Yaresërepari comantanti yágagantëri Paboro, yoguëshotancari pite sogatsa coshori. Yosamitapëri:

—¿Pairo pijita obiro? ¿Pairo picanque?

³⁴Yotabitaiguëri jorío icaimaguëtanë, carari te inguemiri comantanti atiraca icanca Paboro. Te irogótocotiri pairoraca iguisabiritaigaca jorío, aro igáqueri isorarote:

—Páganëri ibangojeguiquë soraro.

³⁵Yareparo atomentotsi. Tojai icaibaitaiganaque jorío yosibisibitoba-

ganaca. Aro yanatanëri Paboro soraro.

³⁶Përosati cara yoguiataiguëri matsiguenga icaimaguetaiguë:

—iPóguiri! iIngameta!

³⁷Cara omoroquë ibango soraro, yamaqueri comantanti Paboro icanqueri:

—¿Caninaroco nanibatimi?

Yotabitanëri:

—¿Pigóti pinibatiro guiriego?

³⁸¿Cagarico obiro Ejpitosati ira quisaacari matsiguenga cani? ¿Teco páganëri ógueri icarati 4,000 cara tera ontimingani piriaguiteroquë?

³⁹Yotabitanëri Paboro:

—Cagarina. Naanti jorío. Nopaniaca Tárisoquë. Iro ro poeboro obatatsi canta Sirisiaquë. Nomanaquimini, pinintacaguina nanibatiri nomatsiguengaca.

⁴⁰Aro inintacqueri. Yaratianque Paboro jonoquë atomentotsiquë yacopëri matsiguenga. Imaireitanë, aro inibatancari irinibare ebreo.

Paboro iquenguitsatomoqueri joríojegui.

22 ¹—Nomatsiguenga aisati natingomiegui, pinguemaiguena yamai nongomantëgotëmani naro.

²Iquemaigabaquero ebreo irinibare, aiqero imairetasantaiguë jorío. Përosa icanqueri Paboro:

³—Narori jorío paniacha Tárisoquë canta Sirisiaquë. Yaca Jerosarénquëca nasanguenaque, aisati yogometasantëna Gamariel icomantasantënaró antagaisati ora yameta omatsiguenga timënguítisi jirai. Nocogasanti nanganque pairoraca ingocaquina Tosorintsi, aisati nacantabetaiguëmi pibega obiro yamai.

⁴Nacantaguebiritiri catsimari ira quemisantiro ora yogomeque Jesus irooti nógancari. Nágaiguëri noguëshotaiaguëri sërari aisati tsinane nomianqueri iromingamentoquë.

⁵Igótiro oca itingomi saseriroti aisa itsibatari. Ora nocomantëmi yamai igóigui. Iriro itingomi saseriroti isanguenaquineri Támasicosati.

Igáquina Tamásicoquë náganëneri sanguenari. Niátasiqueri nágaiguërimeraegui quemisantiri Jesus naguëshotaiaguërimera nomapërimera yaca ingasitígataigabaquërimera itingomi saseriroti. ⁶Cara pënibaquë narequimaro Tamásico, naquenaque abatsiquë, aro catinga paba, iroguito jonoquë oconijapë yosanguëguitetocopëna Tosorintsi.

⁷Nopariganë quibatsiquë. Naquemobëro irinibare Jesus ocampëna: “Saoro, Saoro, ¿Pairo picantobiquinaro catsimari?” ⁸Nosamitëri: “¿Pairo pijita, Natingomi?” Yotabitanëna: “Naro Jesus Nasaresati, naro picantobique catsimari”. ⁹Ira tsipataiguina iniaiguëro cataguiteri cantaca omanarontsi carari te inguemobëro ora icanque Jesus.

¹⁰Nacabëri: “¿Pairo picogui, Natingomi?” Icampëna: “Pingabiritima pijáte Tamásicoquë. Canta ingomantëmi pairoraca pinganque”. ¹¹Aroque pogomarajapëna cataguiteronori. Te naniana. Icatsabagotanëna irooti Tamásicoquë. ¹²Itimi canta matsiguenga jitacha Ananías. Iquemisantantiro isanguenare Moisés, aisati iniacaninataiguëri joríojegui timaigatsi Tamásicoquë.

¹³Iriro bocasitapëna icampëna: “Saoro, yamai obiro nopiguemisantane.

Igáquina Tosorintsi naniacagajimi aisati”. Aito cara naniana. ¹⁴Përosati icanquina: “Omatsiguenga jirai iquemisantiri Tosorintsi. Obiro icoque yamai pigótirota ora icogui pingante. Aisati icoiguëmi piniaquerita ira Caninatasannotatsiri pinguemiri. ¹⁵Aisati pinguenguitsatomotiri antagaisati matsiguenga. Pingomantëgotiri Jesus Ira piniaque aisa Ira piquemaque. ¹⁶Yamai ¿Pairo picosamanibirique?

Pomaotísatima, pabentimari Jesus, aro irojocajimiro ora picantaguéti te onganinate”.

¹⁷⁻¹⁸Perosati icanque Paboro:

—Aro nipigapaa yaca Jerosarénquë. Cara namanasegui oquibequë pongotsi irasi Tosorintsi, iconijatompëna Atingomi icampëna: “Omanapague pijocanëro Jerosarén, pisiganëma, queronta iquemobëro ora picomantëgotina yaca”. ¹⁹Notabitobëri: “Natingomi, irirojegui igóiguëna cara naro ágaiguëri ira quemisantimi obiro nomingaiguëri nipasataiguëri pongotsiquë cara yapatoita. ²⁰Aisati cara icamaque Isiteban pigomantantatsirite, nacaninatë najique: ‘Caninataque ingameta’. Nomisantëneri iguitsagare ira basiaqueri mopëquë”. ²¹Aro Ira Natingomi icanquina: “Atsi pijáte. Nocoguini nagátimi naro canta jaanta basiniatiquë matsiguenga”.

²²Iquemabecari jorfojegui irooti oca. Yamai cara icanque basiniati matsiguenga, icaimasantaiguë icantaiguë:

—¡Pijoquiri! ¡Teni ongomeite intime! ¡Ingameta!

²³Icaibaitasanotanë, iguisaneintasantanaca imionguëro jonoquë iguitsagare aisati pojongamamori. ²⁴Iniaquero comantanti igáqueri isorarote:

—Páganëri tsomagui pobangoquë. Popasatiri ingomantanëta pairoraca icantaguéti ora iguisancari imatsiguenga.

²⁵Aro yoguëshotabitacari iripasataiguëri. Aro Paboro yosamitëri igapitante soraro:

—Naro matsiguengatacari Iromasati. Terai irosomitëmatina itingomi. ¿Caninarico iripasatasitina quero yosamitobënanta?

²⁶Iquemaquero capitán oca nibarintsi, iáque comantanti quë icampëri:

—¿Pairo pinti? Ica sérarica irianti matsiguengatacari Iromasati.

²⁷Aro ipocasipëri comantanti yosamitapëri Paboro:

—¿Obiroco matsiguengatacari Iromasati? Pingomantina.

Yotabitanëri Paboro:

—Jee, naro.

²⁸Icanëri comantanti:

—Tojai nipënenbenqueri Iromasati cara nomatsiguengatacari naro.

Icanqueri Paboro:

—Naro aito ninë niquibiaque nomatsiguengatacari.

²⁹Aito cara ijocanëri Paboro ira pasaantënguitsineme. Itoroganë comantanti cara igótanë Paboro imatsiguengatacari Iromasati aroquenta yoguëshotásitacari. Te onganinate iraguëshotásitimari ira Iromasati.

Yáganëngani Paboro catingasatiquë jorío obatsisiri icarati 71.

³⁰Icoguini comantanti irogóasantë paio ca icantaguebiriqueri jorío ira Paboro. Aro oquëtaguetanë, icaimagantaiguëri irapatotaiguëma jorío: itingomipague saseriroti aisati ira obatsisiri icarati 71. Yomisotoqueri Paboro, yáganeri catingasatiquë jorío.

23 ¹Inetsasantaiguëri obatsisiri ira Paboro icanque:

—Nomatsiguenga, nigóti iniacaninatëna Tosorintsi irooti yamai. Teni nontsorogue naneingomentoquë.

²Aro Ananías itingomi saseriroti igáqueri itsibatari:

—Pinchotangabagantetiri.

³Icanque Paboro:

—Obiro inguisë Tosorintsi obironta matobiantatsiri. Pisobiaque yaca, picoque pomoncaratirome ora isanguenaque Moisés. Yamai pinguisagantëna. Te pomoncaratirome ora Sanguenari.

⁴Ira matsiguenga aronisatiquè Paboro icanqueri iriro:

—¿Picantocotaguetasitari obiro itingomi saseriroti?

⁵Yotabitanèri Paboro:

—Teni nogóte cara iriro itingomi saseriroti. Nogóquerime, quero nacantirime aronta ocanti Sanguenari: “Quero picantocotaguetasitari itingomi pomatsiguenga”.

⁶Igóque Paboro cara ainta iconagacari saroseo aisati bariseo. Icaimanè:

—Nomatsiguenga, naro bariseo, naatisati itomi. Najiti cara intinaajiri Tosorintsi ira camènguitsi iraganiatairi aisati. Iroto iguisabiritaiguèna yamai.

⁷Iquemobèro oca inibatè Paboro, ipègatsatobaca catsigue bariseoegui aisa saroseoegui. Iguisaneintobaca. ⁸Ira saroseo jitatsi: “Quero icaniatai aisati ira camatsiri. Querojenga pini isère matsiguenga, queroootisatijenga ini ironomire Tosorintsi”. Ira bariseo icantaiguè: “Intinaajima aintinta isère matsiguenga. Inganiatanae. Aintasati ironomire Tosorintsi irisaanganetite”. ⁹Tojai iguisatsatobagaigaca catsigue. Aro yaratingaiguè ira ogameantiro Sanguenari, iriro bariseo. Icantasantai-guè:

—Tenjengari ingantaguete ica sèrarica ora te onganinate. Iriroca nibaqueri ironomire Tosorintsi, irineta.

¹⁰Aiquero tojaisonori iguisatsatobagaigaca. Itorogobiqueri Paboro comantanti cara iroguiripitèri intibatsaqueri jorío. Aro icaimèri isorarotepague igáqueri:

—Págabitsatiri, páganèneri pobangoquè.

¹¹Aro yáganèri. Otsitinitanai iconijatompèri Paboro Atingomi icampèri:

—Pinganinaserète. Piquenguitsatocoquina yaca Jerosarénquè, aisati pinganquima pinibatè canta Iromaquè.

Yáganèngani Paboro Sesáreaquè.

¹²Oquètaguetanè yapatoica joríopague, iquengaigaca cara quero yapi queroootisa yóga nija irooti cara iróqueri Paboro. ¹³Icarati 40 jorío quinguènguicha iróguiri. ¹⁴Iátasitaiguèri saserirotijegui aisati antiasipari icantaigapèri:

—Catingasatiquè Tosorintsi naquengaigaca naroegui nóguèri Paboro. Quero napi, queroootisa nóгаа nija irooti cara nóguèri. Queroica nóguiri, iratsipiriacagaiguenata naroegui Tosorintsi. ¹⁵Yamai obirojegui manaantirine comantanti iromapèri Paboro obiroquè. Pingantiri picogaiguè posamitasantiri arota pigóiguero ora icantaguete. Naroegui nomaguetaiguèri nógobèri cara queroquerai yareta obiroquè.

¹⁶Ainta itineri Paboro iquemocoqueri jorío cara isariacari iróguiri Paboro. Aro iáque ibangoquè soraro icomantapèri iriconguiri. ¹⁷Paboro cajemaqueri capitán icanqueri:

—Páganèri ica oboinaca comantantiquè. Aiti ora ingomantèri.

¹⁸Yáganèri capitán, icanqueri comantanti:

—Icaimagantèna Paboro ira iromingane yamanaquina: “Páganèri ica oboinaca comantantiquè. Aiti ora ingomantèri”.

¹⁹Icatsabagotanèri ira janequi casiriconiati cara irosomiqueri comantanti, yosamitèri:

—¿Pairo ojita pingomantèna?

²⁰Yotabitanèri:

—Ira jorío iquengaigaca cara iromanajimiri naramani páganairi Paboro catingasatiquè ira obatsisiri icarati 71. Icoagaiguini iromatobiquimi, inganquimi icoguini irosomitasantiguèri aisati. ²¹Quero piquemisantiri

aintanta sërari icarati 40 iquengaigaca iróguiri. Icantaugüé: “Quero napaigui querootisati nóгаа nija irooti cara nóгаигуëri Paboro. Queroca nóguiri, iratsipiriacagaiguenata naroeGUI Tosorintsi”. Yamai aroque yobetsicaigaca. Yoguiaquimi yamai, pinganqueri ora iromanaquimi.

²²Aro igátajiri oboina comantanti icantasantobëri:

—Quero picomantiri pairiraca ora picomantëna yamaica.

²³Aique isotocanë. Iriro comantanti icaimëri pite capitán igáqueri:

—Pobetsicaigueri pisorarote ingaraque 200 iranëitaiganaque aisati 70 ingueicotanëma imorane, aisati 200 áganënguistsine irosataamento. Iriáguë Sesáreaquë aganguitesata. ²⁴Aisati pobetsiquineri Paboro imorane, ingueicotanëma. Páganëri caninasati canta Bériquis itingomiquë.

²⁵Aique isanguenaquineri sanguenari ocanti negaca: ²⁶“¿Aintabi, Bériquis, natingomi? ¿Tegotsitatsibi? Naro yaca Caraorio Iriásias nasanguenaquimi.

²⁷Nongomantëgotëri ica sërarica nagáquimirini. Yáгаигуëri jorío icogaigabitaca iróguirime. Naquemocoqueri, aro natentaigacari soraro nágabitsataiguëri aroquenta nigótoocoqueri iriro matsiguengatacari Iromasati. ²⁸Nocoque nogóteme pairoraca iguisabiritaiguëri, aro náganëri cara itingomiquë obatatsi icarati 71. ²⁹Patiro icantocotaiguëri jorío negaca: ‘Iriro teni inguemisantiro ora isanguenaque omatsiguengajegui’. Te ingantaigue pairoraca ora nagamagobi-queri naro teatisati ora nomingabiriqueri. ³⁰Cara nigótanë iquengaigaca jorío cara iróqueri, aito cara naquianca nagáquimiri. Aisati nocomantaiguëri ira quisaneinqueri iriátaigue obiroquë arota ingomantëgotasantiri”.

Irooti isanguenaquineri, aro ipabaqueri capitán icanqueri:

—Jeroa, páganëneri Bériquis, aisati páganëri Paboro.

³¹Aro ira sorarogegui yáгаиганаqueri Paboro tsitiniriquë. Yaretaigacaro Antípatiris. ³²Oquëtaguetanë ipigaigaa ira soraro anëitasitanënguicha.

Yáгаиганаqueri Paboro ira quijëgotai-гуënguicha imoranequë ³³irooti yaretaigacaro Sesárea. Ipapëri sanguenari Bériquis itingomi aisati ipapëri Paboro. ³⁴Iniobëro sanguenari Bériquis, yosamitobëri Paboro:

—¿Nega popaniaca obiro? ¿Pairo ojita piguebatsite?

Icomantëri Paboro:

—Nopaniaca Sirisiaquë.

³⁵Icanqueri itingomi:

—Caraquenta nanguemasantëmi cara iribocaigapë ira comantëgotëmine.

Aique igáqueri soraro:

—Pomingueri canta ibangoquë Eroris. Pinetsasantiri.

Paboro icomantëgotaca catingasatiquë Bériquis.

24 ¹Pabisanaque cataguiteri pabocorooti, aro yanonganaca yarepa Ananías ira itingomi saseriroti canta Sesáreaquë. Iconagaca antiasipari ira aguiatapëri aisati nibabintantatsiri jitacha Téteroro cara iromitocoqueri Ananías. Irirojegui iátasitaiguëri Bériquis itingomi ingomantëgotëri Paboro. ²Icaimëngani iriro, aro iparintaca inibatë Téteroro icanaque:

³—Caninari natingomi, nacarasiatai-гуëmi pitingomibintasantaiguëna caninasatisonori. Yamai caninasati natimaigui. Picantaiguëna ora caninaro. Aro nacarasiatasantëmiro antagaisati.

⁴Quero nocosamanitiro basini. Përosati obironta cábintsantatsi, aro nocoque yamai pinguemina arosata. ⁵Naniaiguëri

ica Paboro icomantëri jorío omagaropaguequë quibatsi ijocagantëro ora nametaiga naro. Aisati iriro obatatsi ira quemisanqueri Jesus Nasaesati.

⁶Icogabeca iraguimingatirome pongotsi oquibe irasi Tosorintsi, carari nágaiguëri nocogabeca nanganquerime cara isanguenaquenaro Moisés. ⁷Carari yareca Irísias inta comantanti aisa tojai isorarote yágabitsaquinari, igátaiguëna nopocauquë obiroquëca nongomantëgotëri. ⁸Yamai posamitërica obiati, pigótanëro omagaro oca nocomantëgotërica.

⁹Icantaiguë joríojegui:

—Aisonori ora icanque Téretoro.

Inibatë catingasati.

¹⁰Aique Bériquis yacoqueri Paboro irinibaque. Icanque iriro:

—Nigóti tojai osarini pitingomibintai-guëri picomantëgotai-guëri nomatsiguenga. Iroro nacaninasëretaguëque nongomantëgobentima yamai.

¹¹Quero ocomëtati pigótocotanëna omoncaraca 12 cataguiteri nareca Jerosarénquë. Niátasiquero

nomanocoquerini Tosorintsi. ¹²Te iraniaiguena nopëgatsatimari pairiraca cara oquibequë pongotsi irasi Tosorintsi, teatisati basiniati-quë pongotsi cara yapatoita jorío, teatisati poeboroquë.

¹³Querootisati iniantinero ora icomantëgotasitëna yamai.

¹⁴—Carari yamai nongomantasantëmi cara naquemisantiri Tosorintsi aisa icanta nomatsiguenga jirai iquemisantaiguiri. Naquemisantiro isanguenare Moisés aisa ora irasi comantantatsiri. Aisonori, naquemisantiri Jesus ira te iraniacaninataigueri irirojegui ica. ¹⁵Aisati nacantaigari iriro, nigótiri Tosorintsi cara iraganiatairi antagaisati camaguetatsi, ira caninatatsi, aisa ira te inganinate, omagaro intinaigairi Tosorintsi. ¹⁶Iroro

nocogasantaguëti iraniacaninatina Tosorintsi aisati matsiguenga. Nocogui nantime caninasati. Nigóque cara iniacaninatëna Tosorintsi.

¹⁷Pabisanaque osarinipague niátagueque canta jaanta. Yamai nipigaa namapëneri nomatsiguenga quirequi ipagantiri timatsi jaanta. Aisati nomasitëmari oisha Tosorintsi nataquineri. ¹⁸Cara oquibequë pongotsi irasi Tosorintsi iniaiguëna. Aroque noguëtetaca. Te nopatoitiri matsiguenga, teatisa nanguisaguimari.

¹⁹Ainta inasegui joríopague paniacha Asiaquë iniaiguëna pongotsiquë iguisaneintaiguëna. Aitime nangantaguetiri ora te onganinate, caninataqueme iribocapë yaca iriro ingomantëgotëna. ²⁰Queroca ipoqui, ingomantëgotinata icaegui ora pairoraca nacantagueque te onganinate cara catingasati-quë itingomi ira obatatsi icarati 71. ²¹Patiro nacanque: “Nigóti cara iraganiatairi Tosorintsi ira camaguetatsi. Iroroco picogui posamitina arota pigótina”.

²²Aro itsonquero Paboro cara icomantëgotaca. Aro Bériquis igótasantëro ora yogometocotagani Jesoquirisito cara iquemocotiro jirai. Icanqueri:

—Antagati yamai. Aiquenta iribocapëca Irísias ira comantanti, aro cara nongomantëgotëmiri naro ora pinganque.

²³Aisa Bériquis igáqueri capitán:

—Páganëri Paboroca, pomingueri. Pinetsasantiri. Pinintacaguiri pairoraca ingoque. Aisati pinintacaguiri cara iraniaqueri imatsiguenga iromitocoqueri.

²⁴Pabisanaque arosata cataguiteri. Ipigapaa Bériquis aisa iina jitacha Torosira. Iroro jorío. Icaimagantëri Paboro, icoque inguemiri cara atiraca angantima anguemisantiri Jesoquirisito.

²⁵Iquenguitsatocoquero Paboro atiraca angantima aganinasëretima, aisati antime caninasati. Aisati iquenguitsatocoqueroi Tosorintsi atiraca ongantima ingomantëgotëri antagaisati matsiguenga ora pairoraca inganque aisati negaraca iriátë. Aro itsorogasantanë Bériquis icanqueroi Paboro:

—Aroque yamaica. Atsi pijátaje. Caraquenta, queroca natarobacaati, aro nangaimaimi aisati.

²⁶Icogabeca Bériquis imabaquerime quirequi Paboro arota iromisotocajiri. Iroto icaimapinintobitabecari, inibatabitacari. ²⁷Pabisanaque pite osarini. Aro Pórisio Jésito pëgairi ira Bériquis. Icoque Bériquis iraganinataigueri ira jorfojegui, iroro përosati yomingaguëqueri ira Paboro.

Paboro yabencari ira Sésar.

25 ¹Yareca Jésito Sesáreaquë cara iripëgairi Bériquis itingomi. Pabisanaque maba cataguiteroi itonganaque irooti Jerosarénquë.

²Canta, itingomipague saseriroti aisa ira obatatsiri jorfo irirojegui ipocasitaiguëri Jésito icomantëgotaguëri Paboro.

³Aisati yamanaiguëri:

—Poganinataiguena. Pigátinari Paboro Jerosarénquëca.

Iquengaigaca iromaguetiroi abatsiquë, aro irógaigabaqueri. ⁴Yotabitanëri Jésito:

—Ainta Paboro yomianqueroi Sesáreaquë. Queroquerai ocosamaniti najáque naro canta. ⁵Aisati nocoguini iraguiatanëna ira obatatsiri obiroquë. Ingomantëgotëri ora icantaguetomiquimi ira Paboro.

⁶Pabisanaque poro tominco arosata cataguiteroi basini, ipigapaa yanonganaca irooti Sesáreaquë. Oquëtaguetanë isobiaque iragáantomentóquë, aro icaimgantëri Paboro.

⁷Yarepa iriro. Ira jorfojegui paniacha Jerosarénquë ishonganacari icantocotagueticari tojai, carari te ingantima irogótasantaguiri Jésito aisonorica ora icomantëri. ⁸Aro icantocobintaca Paboro icanque:

—Teni nangantocotëmatimi te onganinate ora icanti Tosorintsi isanguenaque Moisés. Teatisati nangantocotëmatiro ora pongotsi irasi Tosorintsi. Teatisati nangantocotaguëtë matiri Sésar ira itingomi.

⁹Icoque Jésito iraganinataigueroi jorfojegui. Aro yosamitëri Paboro:

—Piquemaque yamai ora icomantëgotëmi icaegui. ¿Picoguico pijáte Jerosarénquë? Canta nongomantëgotëmi naro.

¹⁰Icanë Paboro:

—Quero niáti. Nomatsiguengatacari Iromasati. Caninataque pingomantëgotina obiro yaca ora nanganque. Pigótasanti cara te nangantaguetomotiroi jorfo. ¹¹Aítica nacantaguëti ora te onganinate, jemita irógaiguenata. Cara itsoiguëgotaguetasitënaca ica jorfojeguica, te ongomeite irágasitanëna pairiraca canta irirojeguiquë. Nabencari Sésar igobeingarite antagaisati Iromasati. Iroro comantëgotënnane.

¹²Inibatobaca Jésito aisa ira itsibataiga. Aique icanqueroi Paboro:

—Pabencari ira Sésar. Aro nagáquimi iriroquë.

Paboro iquenguitsatacakeri Aguiripa.

¹³Pabisanaque arosata cataguiteroi yareca basini itingomi jitacha Aguiripa otsibatapari iritsiro jitacha Berinisi. Ipocasiqueroi cara irobetsatapëmari ira Jésito. ¹⁴Itimopë Aguiripa tojai cataguiteroi. Aique Jésito icomantëgotëri Paboro. Icanqueroi:

—Ainta yaca poro sërari ira yomianque Bériquis jirai. ¹⁵Cani niáque

Jerosarénquë. Canta icomantëgotobëri itingomipague jorío: saseriroti aisa antiasiparipague. Yamanaquina cara nagamaguëri. ¹⁶Notabitanëri: “Naro Iromasati. Teni nometaiguema nangantocotiri pairiraca cara queroquerai icantiri ira cantëgotëri”.

¹⁷—Aroque ipocaigapë joríopague yaca, oquëtaguetanë nisobiaque nagáantomentuquë, nacaimagantairi Paboro. ¹⁸Yaratianque ishonganacari. Teni ingomantëgotíri ora pairoraca te onganinate aisa ora naquengabeca.

¹⁹Iguisatsabiritasicari ora yameta basiniati Paboro. Aisati iguisatsabiritasicari sërari jitacha Jesus ira camënguitsi, carari icanque Paboro: “Icaniatanai”.

²⁰Teni nogóte paio nanganque atiraca nosamitëcobenqueri, aro nosamitëri Paboro: “¿Picoquico pijáte Jerosarénquë? Canta nongomantëgotëmi naro”. ²¹Carari te iraninte iriáte. Icoque yabencari Sésar ogobeingarite comantëcobenquerine. Aro nigáqueri nosorarote iromingairi irooti cara nagáqueri canta Sésariquë.

²²Icanqueri Aguiripa:

—Aisati naro nocoguini nanguemiri. Icanë Jésito:

—Naramaniinta pinguemaqueri.

²³Oquëtaguetanë icanaque Aguiripa caninaro imanchaqui yareca iriro aisa Berinisi iritsiro. Yareca cara yapatoiqueri Jésito ira matsiguenga. Icarataiguëri comantantiegui aisa ira obatatsiripague ira timatsi Sesáreaquë. Aique Jésito icaimagantairi aisati Paboro. ²⁴Icanqueri:

—Nobingatsarite Aguiripa, aisati omagaro obirojegui nagaimane yaca. Pinetseri ica sërarica. Iguisaneintaiguëri antagaisati jorío Jerosaresati, aisati jorío timatsi yaca. Icantocotaiguëri: “Teni intime caninasati”. ²⁵Carari nigótocoqueri naro te ingantaguate ora

irógobitaiguëri, cara yabencari Sésar, aro yamai nocogui nagáqueri Sésariquë.

²⁶Te nogóte pairoraca nasanguenatocoqueri ora nomagantëri Sésar nogobeingarite. Iroro namaguëtaiguemiri ingomantaguetimi, nobingatsarite Aguiripa, aisati obirojegui. Nocogui pingomantinaro ora nasanguenatocoqueri. ²⁷Ainta ica iromingaga jirai. Tenijengari ongomeite nagátasitimari, teca ine ora nongomantëgotëri.

26 ¹Aique icanqueri Paboro Aguiripa:

—Yamai nanintacaquemi obiro comantëgotachane.

Aro yacotanë Paboro icomantëcobentanaca icanque:

²—Natingomi Aguiripa, pigóti cara icomantëgotëna joríojegui ora te onganinate. Nacaninasëretanë yamai cara nongomantëgotëma catingasatiquë obiro ³aroquenta pigótasanti ora yametaiga jorío. Nocogui pinguemasantina antsinisati. Quero pitsirisina.

⁴Antagaisati jorío igótocoquina ati nacanta natimaque Jerosarénquë cara jirai oboinaquerai naro. ⁵Ingomantëgotënaca jorío, igóiguë jirai cara nobariseotabeca. Nacantari iriro naquemisasantiro ora isanguenaque Moisés. ⁶Jiraisonori icanqueri nomatsiguenga Tosorintsi iraganiatairi ira camatsiri. Oca naquemisantiro. Iroro inintaguëque jorío yamai irógauguëna. ⁷Jirai itimi Jacob aisa itomijegui icarati 12. Antagaisati cataguiteri aisa tsitiniri iquemisantiguëri Tosorintsi irooti yamai. Përosati cara yoguiaqueri ira Tosorintsi inganquero ora icantasantë Irinibarequë jirai. Natingomi, aisati naro noguiaqueri. Iroro icantocotaiguë quina yamai jorío ora te onganinate.

⁸—¿Paio pijitobique obirojegui cara quero itinaajiri yoganiatairi Tosorintsi ira camatsiri? ¿Paio pitsoingobiquer?

⁹Jirai najitabeca naro caninataque cara nacantaguebiritiri catsimari ira quemisantiri Jesus ira Nasaresati.

¹⁰Nacantaguebiritiri catsimari canta Jerosarénquë. Nomingaiguëri tojai ira quemisanqueri Jesus irironta agáquena itingomiegui saseriroti. Cara yogamagaiguëri nacanque: “Caninataque”. ¹¹Nacasitígatapinintai-guëri pongotsipaguequë cara yapatoita arota ingantocotaguezasitimari Tosorintsi, naguisasantobërinta. Cara isigaiganaca basinipaguequë poeboro noguiabiritaguetaiguëri.

¹²—Iro-ro niátaguëque ai-queri Tamásicoquë. Igáquina itingomiegui saseriroti. ¹³Niáque abatsiquë, aro catinga paba. Omanapague oquëtague-tasantë naniobëro cataguitersonori-guinte yosanguëquitocopëna Tosorintsi naro aisati ira tsipataiguina. ¹⁴Nitëaiganaque quibatsiquë, aique naquemobëro cara inibatankinaro irinibare ebereo icanquena: “Saoro, Saoro, ¿Pairo picantobiquinaro catsimari? Obiro aisa picantari sërari baaca cara imeratëmani iripasaqueri casintari. Ira baaca iragaitguitetabequi-mari carari iratsipiriopiantë. Aisati obiati casitígatacha cara piguisanein-quina”. ¹⁵Notabitanëri: “¿Pairo pijita, Natingomi?” Icanquina: “Naanti Jesus Ira piguisaneinti. ¹⁶Carari pingabiritima. Noniaguëmi Naati pomitocotiri matsiguenga pingomantëgotaguetina ora piniaque aisati ora noniaguëmi ai-quenta. ¹⁷Atiraca ongantima ingantobitaiguëmiro catsimari pomatsiguenga, aisa ira basiniati matsiguenga, nagabisaicoquimi cara quero yóguimi queronta nanintacaguiri. Yamai nagáquimi basiniati-quë matsiguenga. ¹⁸Pogometai-guenari irogóguenata. Yamai cantaca yanëitaiguini tsitiniriquë intaguetiro ora

te onganinate yamatobitaiguërinta Satanás camagari. Pogometai-guenari arota irogóguena irojocajiro ora icantagueti te onganinate, iranëitaigae cara cataguitëri-quë, ingantajiro ora caninaro, inguemisantiri Tosorintsi. Aro irojocagajiri Tosorintsi ora icantagueti te onganinate quero iquengairo, iraguëtaiguëri Tosorintsi, coshoni iroqueri intsibataiguëmari ira quemisantina”.

¹⁹—Yamai, natingomi Aguiripa, nocomantëmi cara te nopëgatsatimari Jesus. Naquemisantasanotëri ora icanquina. ²⁰Iritsita nocomantaiguë Tamásicosati, aique Jerosarésati, aique Joresati. Aique nocomantaguequeri ira basiniati matsiguenga. Nocomantëri irojocaigairo ora icantagueigui te onganinate, inguemisantaigairi Tosorintsi, imasiniatitanae, ingantague-teta ora caninaro. ²¹Iro-ro yáguëquina oquibequë pongotsi irasi Tosorintsi icogabeca iróguiname. ²²Carari yogabisaicoquina Tosorintsi imitocoquina yamai nocomantaguetiri omagaro matsiguenga ira itingomi, aisati ira cagari itingomi. Patiro nocomantëgotiro ora cantënguichane ora icanque jirai comantantatsiri aisati Moisés. ²³Icanque iratsipireirota Ira Agabisaicoontatsiri ingamaque. Aique irobaque inganiatanae. Ingomantaguei-guëri jorío aisa basiniati matsiguenga cara inganiataigae aisati.

²⁴Iroontita inibatë Paboro, icaimëri Jésito:

—Paboro, teni pineicotima. Aroquenta tojai pisanguenatanë teni pineicotanaima.

²⁵Yotabitanëri Paboro:

—Teni, caninari natingomi Jésito. Naneicotasantaca cara nocomantëmiro ora catingaró nibarintsi. ²⁶Igótasantiro Aguiripa ora ninibatëgotë.

Naquenguitsatiro caninasati najiquenta
igótasantiro tenta ománima oca.

²⁷Natingomi Aguiripa ¿Piquemisantiro
ora isanguenataiguè comantantatsiri?
Nigóquimi cara piquemisantiro.

²⁸Yotabitèri Aguiripa:

—Omanapague picogabeca
pinguemisantacaquina pinganquiname
iraisati Quirisito.

²⁹Icanqueri Paboro:

—Omanapagueca pinguemisantiri,
queroca aiquenta, teni nogóte.
Nocogasanti aisati pingantima nibega
naro obiro aisa antagaisati ira
quemaiquèna ingantinata nibega naro.
Patiro teni nongogue iraguèshotantai-
guemaro oca sogatsa coshotsari.

Aroque itsonque inibatè Paboro.

³⁰Icabiritanaca Aguiripa, aisa Jésito,
aisati Berinisi, aisa ira itsibata, ³¹iaíguè
casiriconiati, inibatobaganaca
icantobaca:

—Teni ingantaguetiro ica sèrarica ora
te onganinate. Quero icami. Teatisati
irante pairoraca ora iromingabiriqueri.

³²Aguiripa icanqueri ira Jésito:

—Querome yabentari Sésar,
pomisotocajirime.

Igáquengani Paboro Iromaquè.

27 ¹Ainta inasegui sèrari jitacha
Jorio. Iriro capitán itingomi
soraro icarati 100. Ira sorarojegui
yágapajirotaiguèri Aogósito
igobeingarite. Cara pobetsicaca
antagaisati iragáqueri Paboro Itariaquè,
Jésito icanqueri Jorio:

—Aiti yamai oquíbe pitotsi. Páganèri
Paboro Itariaquè aisa inta basini
iromingaga.

²Aro notetaiganaca pitotsiquè
opaniaca Aramisaiquè, yágairo
ágomentotsi asi pitotsi nanguenocotai-
guè poeboropaguequè onamijaquè Asia.
Itsibataiguèna Aristáríco Tesarónicasati

ipaniaca Maseroniaquè. ³Oquètaguetanè
naretocotanaca Sirónquè. Canta,
icábintsèri Paboro Jorio, inintacaqueri
iriáte Paboro cara iraniaqueri
imatsiguenga ira pabaqueri iraperi.

⁴Aique nogaganaca. Sintsiro coguentima
ocoguintimatocoquina. Naquenocotai-
guè aiquero cara oboguesiquè jitacha
Chípire. ⁵Nimontiaiganacaro angaare
noguiataiguèro onamijaquè Sirisia aisa
Pampiria naretaigaca poeboroquè
jitacha Mira Irisiaquè. ⁶Canta, iniaquero

Jorio basini pitotsi oquibe opaniaca
Arijantiríaquè. Yotetaiganacuina aique
piáque Itariaquè. ⁷Tojai cataguiteri
antsinisati naquenocotaiguè
comètaronta naretocotaigaca catingasati
Caniroquè. Opomirintsitomotaiguèna
coguentima, noshonganaca irooti
oboguesiquè oquibeguite ojita Quereta.

Nabisanaquero Saramona
⁸naquenocotanè onamijaquè irooti
canta pini pitotsi santècoguitèriquè
jitacha Caninajaro aronisati poeboroquè
jitacha Irasea.

⁹Aroque nogabisaiguè tojai tominco,
abisaque cataguiteripague cara ititaiga
joríojegui. Aro ocobeingatasantanè
nanguenocotaiguè angaarequè
aroquenta omotoncaatasantanaca,
icomantaiguèri Paboro, ¹⁰icanqueri:

—Obirojegui, pinguemina. Nigóti
ocobeingatocotasantacái anguenocota-
nèca yamai. Najique omiaquima ora
amaguèti aisatijengari eiro.

¹¹Carari ira capitán te inguemisantiri
Paboro. Iquemisanqueri casintaro pitotsi
aisati ira játaguiro pitotsi. Icanque:

—Intsome.

¹²Tenta ongomeite cara pini pitotsi
ojita Caninajaro cara tsaengaquè,
iquengaigaca iragagaiganaquima.
Icogabetaigaca naretocotaiguèmame
Jenisequè cantiqueronta Queretaquè.
Canta, quero paretta sintsiro coguentima

cara icondeti paba. Iroero Jenise caninaro nantimaiguè tsaengaquè nantsatocoquero pitotsi canta. ¹³Oparintaca coguentimainga aique piáque toonquè. Ijitaiguèro caninaro, aro yáairo ágomentotsi asi pitotsi. Naquenocotaiquè aronisati onamijaquè Quereta. ¹⁴Iroguito paretocotaiquèna oquibeguintesonori coguentima jitacha Norésite opaniaca quibatsiquè. ¹⁵Páganèro pitotsi. Te ojábintsate pitotsi aiquero coguentimaquè, aro nanintacaquero áganèro. Ojátagueque. ¹⁶Cara nabisaiganaque santècoguitèriquè oboguesiquè arosata jitacha Cáora, aro nopomiritaigaaro cara nágairo otiomijani pitotsi ora onosicapè notetajiro. ¹⁷Aroque notequero, aro yobetsicaiguèro ora oquibe pitotsi, yoguèshotantaguetajaro oquibe sogatsa osobi pitotsi arota quero otingaraanaca. Itsorogaiganaque nanguenocotaiquè omaniquiquè jitacha Sírite aintata nija jintaaro arosonori omaniqui tsmaguaia. Aro yoguètaiguèro tocoya páganèronta pitotsi coguentima. ¹⁸Oquètaguetanè, iparintaca ijocaiguèro ora yamaguèti sintsironta coguentima. ¹⁹Cara oquètaguetanai maba, ijocaiguèro tojai tinari. ²⁰Ocaratanè tojai cataguiteri, te naneiri paba teatisati jonogasati. Pèrosati ocoguintimatasantanè najitaiguè nangamaiguè. ²¹Pabisanaque tojai cataguiteri te nopaique, yaratianque Paboro icanque: —Obirojegui, caninataqueme pinguemisantina cara inaiguènime canta Queretaquè. Arome pinguemisanquina quero pijocaiguèro yamai ora pamaguèti pitotsi. ²²Carari yamai pinganinasèretaigue queronta picami poro. Patiro ocaraaque pitotsi. ²³Naraningui iconijatomopèna ironomire Tosorintsi Natingomi Ira naquemisanti. ²⁴Icampèna: “Quero

pitsorogui, Paboro. Aro pirequima catingasatiquè Sésar. Aisati Tosorintsi cábinsaiguèrine antagaisati ira tsipatimi pitotsiquè”. ²⁵Aro pinganinataigue, natsipajegui, aroquenta naquemisanqueri Tosorintsi cara inganque ora icomantèna. ²⁶Aganèro pitotsi coguentima irooti oboguesiquè cara ocaraaquè.

²⁷Ocaratanè 14 cataguiteri yamai otsitinitanè. Naquenocotasitanaca angaarequè jitacha Atiriático. Aganguite igóiguè pitotsiberi cara notsitiparo quibatsi. ²⁸Imoncarataiguèro nija, aro omoncaraca nija pini 37 métero. Cosamanisata yogatsitairo. Omoncaraca 28 métero. ²⁹Itsorogasantaiquè cara picoranganèro mopè. Ijocaiguèro otsibasati ágomentotsi cara otioiguèquè pitotsi arota ontsaguipè quibatsiquè aro omaireque pitotsi. Itsorogasantè aro yoguiaiguèrota onguètaguetasantanè. ³⁰Icogabetaigaca pitotsiberi irisigaiguemame. Yoguètaiguèro otiomijani pitotsi. Yamatobitabecari ira cagari pitotsiberi icanqueri:

—Nojoqueroti basini ágomentotsi cara otsobaquè pitotsi.

³¹Paboro comantèri igapitante soraro: —Queroca inaigui iriro pitotsiquè, querootisati pabisaicoti obirojegui.

³²Aito cara yobèshaquero sogatsa soraro opariganè otiomijani pitotsi. ³³Terai onguètaguetasante, Paboro icantaiguèri ira basini matsiguenga irapaigue. Icanqueri:

—Yamai ocarati 14 cataguiteri ititaigaca eiro te opaigue. ³⁴Yamai nomanocoiguè miro poperi arota pisintsitanè cara pomatanè. Aisati quero opega poro piguisi piguitoquè. Quero ati picantèmata.

³⁵Aroque icanque negaca, yáguèro pan icanqueri Tosorintsi:

—Pabati, aronega nacarasiaquemiro oca perintsica.

Iroontita inetsaiguëri pitotsiberi aisa soraro omagaro, itibatsaaguequero pan Paboro yapëro. ³⁶Icaninasëretaiquë antagaisati, cara yapaiguë.

³⁷Aintajeguina naro pitotsiquë nacarataiguë 276. ³⁸Aroque yapaiguë iquemaigaca, ijocaiguëro tirigo aisa antagaisati ora pamapë pitotsi irooti cara opoongatanë pitotsi.

³⁹Oquëtaguetanë iniaiguëro quibatsi ora te irogóguero. Aiti potsitiataca nija aisati oparaguëti. Aro icogabetaigaca iriátaquerome pitotsi cara oparaguequë.

⁴⁰Aro ijocaiguëro ágomentotsi angaarequë. Itsaicotaiguëro sogatsa aguëshotiro ogomaro, itinaiguëro tocoya, naquenocotabetaigaca aiquero oparaguequë. Posíbiquero pitotsi coguentima. ⁴¹Aro naquenocotabetai-gaca aganguijaquë picoriantanë pitotsi omaniquiquë ora te ongonijate. Oquëshotasantapë pitotsi omaniquiquë te osebataima. Omotoncaatasantanaca oparintaca picaraaguëtanë pitotsi cara otioquiquë. ⁴²Icogabetaigaca soraro iróguirime ira iromingaga arota quero imatanë irisigaigaima. ⁴³Irari igapitante te iranintacaguiri iróguiri. Icoque iragabisaicoqueri Paboro. Igátaiguëri icanque:

—Irobatanë ira ogótatsi imati irooti quibatsiquë. ⁴⁴Obiro basini pinguenantaiguëmaro anchabata aisa pairoraca asi pitotsi.

Aro antagaisati yaretaigaca caninasati quibatsiquë.

Itimaque Paboro Márataguë.

28 ¹Aroque nabisaicoigai cara icomantaigabaquina ora oboguesi ojita Márata. ²Icantaneintëgo-taiguëna Máratasati. Yágaigabaquina yogamataigabaquina tsitsi icaimaiguëna arota notataigapë opariaquetinta angani ocatsingauetë aisati. ³Aro Paboro

yágaguepë anchaime ijoquero tsitsiquë. Cara ocatsiringaguitetanë isotocanë marangue itsiaqueri Paboro përosati cara inëri ibacoquë. ⁴Cara iniaqueri Máratasati ira marangue itsiaqueri përosati, aro icantobaca:

—Irirojengari ógueri. Tenta irojogatima angaarequë, quero inintacaguiri Tosorintsi itimi.

⁵Carari ipotetëri Paboro tsitsiquë, te irapanireima. ⁶Inetsaigabaqueri Máratasati ipaniguiabecari cara irapanirianëmame queroca iriguito imariganëme ingamaque. Tojai ipaniguiabecari te irapanireima arosata, aro iquengaigaca aisati icantobagaigaca:

—Irirojenga Tosorintsi tetsi irapanireimatsi.

⁷Aronisati pinë iguebatsite itingomi Máratasati. Iriro jitacha Póborio ira ágaigabaquina caninasati ipabaquina noperi maba cataguiteri. ⁸Inariasega iriri Póborio irisomamintoquë. Ijanaitapininti aisati pógüeri arantseinga. Yotsitipari Paboro, yamanocopëri Tosorintsi, yotsagapëri yoguibegajiri. ⁹Iquemocotaiguëro oca, ipocasitaiguëri Paboro antagaisati basini janaitaguetatsiri. Yoguibegajiri omagaro. ¹⁰Iniacaninataiguënantá Máratasati ipaguetaguëna tojai. Cara niáigai ipaguetobaina pairorapageraca ora nocoguitiaca.

¹¹Yabisanaque maba manchacori notetaigaca basiniquë pitotsi opaniaca Arijantiríaquë. Iroro, aito pogabisëro tsaenga cara oboguesiquë. Ira pitotsiberi yobetsiquëri pite ibabane otsobaquë pitotsi, icantacacari iribogagane jítaigacha Cásitori aisa Pórosi.

¹²Naquenocotaigapë poeboroquë jitacha Siracosa. Canta natimaiguë maba cataguiteri. ¹³Aique naquenaiguë onamijaquë naretaigacaro poeboro jitacha Irejio. Oquëtaguetanë

ocoguintimapë oquenopë toonquë, posibitaiguëna pite cataguiteri irooti Posoriquë. ¹⁴Canta, naniopëri quemisantatsiri icogaiguë nantiomotai-gapëri poro tominco. Aique nogagaiganaca cara naretaiguëma Iromaquë. ¹⁵Aroqueque iqemocotai-guëna quemisantatsiri Iromasati, ipocasitaiguëna itonguibotobëna poeoroquë jitaicha Joroápío. Aisati ipocasitaiguëna basini nopiguemisan-tane poeoroquë ojita Maba Pongotsi. Cara iniobëri Paboro icarasiaqueri Tosorintsi icaninasëretanë. ¹⁶Canta Iromaquë inintacaqueri Paboro intimopë casiriconiati pongotsiquë. Itsibatacari paniro soraro ira omisantiri.

Itimaque Paboro Iromaquë.

¹⁷Ocarati maba cataguiteri icaimagantëri Paboro ira obatatsi jorío. Cara yapatoica icabëri:

—Nomatsiguenga, nongomantaiguë mini cara te nangantaguetomotaiguëri omatsiguenga, teatisati nojoquiro ora yametaiga omatsiguengajegui jirai.

¹⁸Irari jorío ágaiguëna Jerosarénquë, ijogatëtanënarí Iromasati icanqueri: “Pógui ica”. Yosamitaiguëna itingomipague, te nangante pairoraca ora te onganinate irógobiquina. Aro icogaiguë iromisotocajina ¹⁹carari ipëgatsaquina joríojegui. Iro-ro nabentaguëcari Sésar. Te nongomantë gotaiguëri nomatsiguenga pairoraca. ²⁰Iro-ro nacaimobiquimi obirojegui yaca naniobëmi aisati nanibatobëmi.

Naquemisantiro ora icantái Tosorintsi jirai cara iriboquë Agabisaicoontatsiri aisa intinaajiri igamaga iraganiatairi. Yamai nocomantëmi aroque yareca Quirisito, icamaque icaniatanai. Iro-ro yoguëshotataguëquinaro oca sogatsa coshotsari.

²¹Yotabitaigapëri:

—Teni nágobë sanguenari isanguenatocoitëmi canta Joreaquë, teatisati iraretima poro nomatsiguenga ingomantëgotëmi. ²²Carari nocogaigui pingomantasantaiguënarora piquianca, nigótinta omagaroquë poeoro iguisaneintiri ira quemisantiri Quirisito.

²³Iquengaigacaro cataguiteri, aro ipocasitaiguëri tojai jorío ibangoquë Paboro. Icomantaigabaqueri ora iragántane Tosorintsi. Coniamaniquë irooti tsitiniriquë Paboro icomantëgotëri Jesus. Icoque irogótasanotaguiri ora isanguenatocoqueri Moisés Ira Jesus, aisa ora isanguenatocotaiguëri comantantatsiri. ²⁴Ainta ira quemisanquero irinibare Paboro. Ainta basini ira tsoenguëri te inguemisantiri. ²⁵Tenta inguengaiguëma, teraiquerai iriáigae, icanqueri Paboro:

—Caninasati ocanque Isëre Caninaro Tosorintsi ocomantaqueri Isaías comantantatsiri cara isanguenataguë neri nomatsiguenga jirai, ²⁶ocanqueri:

Pijáte joríojeguiquë pomatsiguenga pingomantiri: “Pinguemabetai-guemaro Nanibare, carari quero piquemobëro. Piniabequimaro ora noniagaiguëmira, carari quero pigóiguero ora nocomantabitaiguëmi”. ²⁷Tenta inguengasëretima ica matsiguengaca, te inguemaigue, te iranee tenta iranintiro. Yamatsibocasëretasitaca arota quero igóitiri ora icanti Tosorintsi catingaró, quero iqemiro, quero iquenguero isërequë, quero ipasiniatitaji, quero nogabisaico-tajiri Naro.

—Aroque ocanque Isëre Tosorintsi isanguenarequë Isaías. ²⁸Pigóigue yamai, igáqueri Tosorintsi quemisanta-siri iriátaiguë basiniatiquë matsiguenga

ira cagari jorío. Inguemisanqueri
Tosorintsi, aro iragabisaicotaiguëri iriro.

²⁹Itsonquero irinibare Paboro. Aro
isotocaiganaji joríojegui, përosati
inibatobagaigaca.

³⁰Ocarati pite osarini itimanë Paboro
pongotsiquë ipënabentiro. Canta,

yágacaninatiri antagaisati ira
bocasitaiguëri. ³¹Iquenguitsatocotaiga-
baquero iragáantane Tosorintsi. Aisati
yogomeantë Paboro iquenguitsatoco-
quero ora iraisati Jesoquirisito
Atingomi. Te irine ira pëgatsatimarine.
Irocas